

## اُيُوب رُو شاستر تعارف

ايئي شاستر ۾ هيڪي اهڙي نيڪ منڪ ري باري ۾ سُٿايوڙو هِي، جڪي رو نون اُيُوب هتو. آي هيڪ موتو امير منڪ هتو. اُيُوب ني تموم گهڙي مُصيبتون هان آفتون رو مُقابلو ڪرڻو پڙيو. اُوي را شجائي اولاد مري گيا هان اُوي ري ملڪيت هان ڏڻ مال پي برباد هوئي گيا. اُوي ري شجي ڏيل مائي گڙ نڪريا، جڪي شون اُوي ني تموم گهڙي تڪليف هوئي، پڻ تو پي اُيُوب صبر ڪري شجائي ڏڪ برداش ڪينا. اُوي ڪڏي پي ايشور ري خلاف بات ڪونهي ڪي، پڻ ڪهيو ڪم، ”پرميشور ڏينوم پرميشور ليئوم پرميشور رو نون ڏن هي.“

ايئي شاستر ۾ اُيُوب ري تين دوستون ري باري ۾ پي سُٿايوڙو هِي، جڪو شاعري ۾ باتون ڪري هِي. او اُيُوب ني ڪي هِي ڪم، ”تي ضرور ڪو پاپ ڪيو هِي، ايئي ري ڪري تي مائي آي آفتون آئي هِي.“ اُيُوب را دوست اُوي ني فرق فرق طريقي شون همت ڏيوڻ ري ڪوشش ڪري هِي. اُون رو خيال هتو ڪه ايشور هميشا نيڪ منڪون ني اُونون ري نيڪي رو اجر ڏي هِي هان بچڙون ني اُونون ري بچڙائي ري سزا ڏي هِي. ايئي شون تال ايئي شاستر ۾ ايشور ري قدرت ري بڪوڻ ڪيوڙي هِي، جهڙو ڪه ايشور رو جگت هان ايئي ۾ ريوڻ آئي شجي شيون ناوڻ. ايشور رو هونهو اُيُوب ايشور تي پروسو راڪي هِي هان اُوي ري نون ري بڪوڻ ڪري هِي، ايئي ري ڪري ايشور اُوي ني پڙي خوشحال ڪيو هان اُوي ني پيل شون پي وڌيڪ برڪت ڏيني.

## خاص مضمون

اُيُوب، اُوي رو خاندان هان آزموتو	13:2-1:1
اُيُوب هان اُوي را دوست	40:31-1:3
پيلڪو گهمرو باتون ڪرڻ	22:14-1:4
بيجو گهمرو باتون ڪرڻ	34:21-1:15
تيجو گهمرو باتون ڪرڻ	23:27-1:22
ڏاهپ هان شمعجھ رو پيد	28-1:28
اُيُوب رو آپري سُني تيم ني ياد ڪرڻ	40:31-1:29
اليهو ري باتون	24:37-1:32
پرميشور ري اُيُوب ني بلتي	6:42-1:38
اُيُوب ري توبهون هان ايشور ري برڪت	17-7:42

### اُيُوب هانَ اُوئي رو خاندان

1 <sup>1</sup> غوض مُلك ۾ هيڪ منڪ ريتو، جڪي رو نون اُيُوب هتو. اُيُوب نيڪ هانَ شاچو منڪ هتو. او ايشور شون بيناجتو هانَ بچڙائي شون الگو ريتو. <sup>2</sup> اُيُوب را سات ڏيڪرا هانَ تين ڏيڪري هتي. <sup>3</sup> اُوئي ڪڍي سات هزار رڍون، تين هزار اُونٽ، پونج سئو ڍڳون را جوڙا، پونج سئو گڏي هانَ تموم گهڻا نوڪر هئا. او اُوگوتِي پاشي ريوڻ آئون ۾ تموم گهڻو امير منڪ هتو.

<sup>4</sup> اُيُوب را ڏيڪرا هيڪي پيڄي ري گهري دعوت تي آتا جاوتام، هر هيڪ باري باري آڀري گهري شجون ري دعوت ڪرتو. او ايني دعوت ۾ آڀري تبئي بنون پي آتاوتام. <sup>5</sup> جڏي دعوت ختم هوتي، تو اُيُوب آڀري اولادون ني هيلو ڪري اُوئون ني پويتر ڪرتو، او ساڪلي تارهي اُننو هانَ شجون ري گڻپ تي باڻڻ آڻو بليدون پي ڪرتو. ڪيونڪه اُيُوب شوچتو ڪم، ”هوني شگهي، مهاري اولادون ڪو پاپ ڪيو هووي هانَ آڀري من ۾ ايشور ري خلاف ڪو بات ڪي هووي.“ ايني ري ڪري او هر دعوت شون پيڄي، هميشا ايجو ڪرتو.

### شيطون رو اُيُوب ني آزماون

<sup>6</sup> پيڄي هيڪ ڏن جڏي فرشتا پرميشور آگهي حاضر هويام، تو شيطون پي اُوئون پيڙو آيو. <sup>7</sup> ايني تي پرميشور شيطون شون پوچو ڪم، ”تو ڪيت شون آوي پڙيو؟“ تو شيطون بلتي ڏيني ڪم، ”هُون ڌرتي تي اينا اونا جوتو هانَ ڦرتو ائون پڙيو.“ <sup>8</sup> پيڄي پرميشور شيطون ني ڪهيو ڪم، ”ڪي ئي مهاري شيوڌاري اُيُوب تي ذهيون لگايو هي؟ ڪيونڪه ڌرتي تي اُوئي جهڙو نيڪ هانَ شاچو منڪ پيڄو ڪو پي ڪونهي، جڪو مهي ايشور شون بيناجتو هانَ بچڙائي شون الگو ريتو هووي.“ <sup>9</sup> ايني تي شيطون پرميشور ني ڪهيو ڪم، ”او تي شون ايني ري ڪري بيناجي هي، ڪيونڪه <sup>10</sup> تو اُوئي ري، اُوئي ري خاندان هانَ جڪو ڪئين اُوئي ڪڍي هي، هر نموني سنپال ڪري هي. او جڪو پي ڪوم ڪري هي، تو اُوئي ني برڪت ڏي هي هانَ مُلك ۾ اُوئي را شجائي ڏن مال تموم گهڻا ٻڌبا هي. <sup>11</sup> جي تو آڀرو هات ٻڌائي جڪو ڪئين اُوئي ڪڍي هي، او شجو لي چوڙي، تو پيڄي او ضرور تاري موڏي تي تاري خلاف بولشي.“ <sup>12</sup> پيڄي پرميشور شيطون ني ڪهيو ڪم، ”جو، جڪو ڪئين اُوئي ڪڍي هي، او شجون تاري اختيار ۾ هي. تو رگو اُوئي ني هات ني لگائي.“ پيڄي شيطون پرميشور شون بوڻو گيو.

<sup>13</sup> پيڄي هيڪ ڏن جڏي اُيُوب ري ڏيڪري هانَ ڏيڪرا آڀري موٽي پائي ري گهري بائي کاوتا پڙيا هانَ انگورون رو رس پينا پڙيا، <sup>14</sup> تو هيڪ نوڪر ناشتو اُيُوب ڪڍي آيو هانَ ڪهيو ڪم، ”مهني بني ۾ ڍڳون شون هل ڪيڙا پڙيا هانَ پاشي ۾ گڏي پي چرتي پڙي.“ <sup>15</sup> پيڄي اوچتو سڀا علائقي ري منڪون آئي حملو ڪيو هانَ او ڪوشي لي گيا را. اُوئون تارا شجائي نوڪر تلوار شون ماريام، رگو هونج بچي نانو هون ڪه ٿئي سٿائون.“ <sup>16</sup> او آجون بولتو ئي پڙيو ڪه هيڪ بچو نوڪر اوڻ آيو هانَ سٿايو ڪم، ”آسموني ڪيوڻ ڪري، جڪي شون شجي رڍون هانَ ڌارڙا ٻلي راک هويام را. رگو هونج بچي نانو هون ڪه ٿئي سٿائون.“ <sup>17</sup> او آجون بولتو ئي پڙيو ڪه هيڪي پيڄي نوڪر آئي سٿايو ڪم، ”ڪسڊي قوم آئون تين تولا نائي مهون تي حملو ڪيو هانَ شجائي اُونٽ ڪوشي لي گيا را. اُوئون شجون اُونٽ چارڻ آئون ني پي تلوار شون قتل ڪيئا را. رگو هونج بچي نانو هون ڪه ٿئي سٿائون.“

18 او آجون بولتو ئي پڙيو ڪه هيڪي بيچي نوڪر آئي شُٿايو ڪم، ”آج ٿارا ڏيڪرا هان ڏيڪري آڀري موٽي پائي ري گهري بائي کاوتا پڙيا هان انگورون رو رس پيتا پڙيا 19 هان جو رڻ پت شون زور شون جونڪ آئي هان اُوئي گهر ري چوڌاري ٽڪر هڻي. او جونڪ اترِي تيز هتي، جڪي شون او گهر اوئون مائي ڪريو هان او شجائي مونا را. رگو هونج بجي نانو هون ڪه ٿئي شُٿائون.“

20 اِئي تي اُيُوب اُنيو هان ڏڪ ۾ آڀرا گاپا ڦاڙيا، بال ڪترايا هان زمين تي ڪري ايشور آگهي شيش نمائي 21 ڪهيو ڪم،

”هُون آڀري ما ري پيت شون ڪالي هات آيو هون

هان ڪالي هات اِئي جگت شون پاچو جائين.

پرميشور ڏينوم پرميشور ليئوم،

پرميشور رو نون ڏن هي.“

22 اِئي شجي باتون ۾ اُيُوب ٺڪو پاپ ڪيو هان ٺڪو ايشور ري خلاف ٻوليو.

### شيطون رو اُيُوب ني پڙي آزماوڻ

2 1 ڀڄي هيڪ ڏن جڏي فرشتا پرميشور آگهي پڙي حاضر هويام، تو شيطون پي اوئون پڙيو آيو ڪه او پرميشور آگهي حاضر هووي. 2 اِئي تي پرميشور شيطون شون پوچو ڪم، ”تو ڪيت شون آوي پڙيو؟“ تو شيطون بلتي ڏيني ڪم، ”هُون ڌرتي تي اينا اونا جوتو هان ڦرتو ائون پڙيو.“

3 ڀڄي پرميشور شيطون ني ڪهيو ڪم، ”ڪي ئي مهاري شيواداري اُيُوب تي ڏهيون لگايو هي؟ ڪيونڪ ڌرتي تي اُوئي جهڙو نيڪ هان شاجو منڪ

بجو ڪو پي ڪونهي، جڪو مهِي ايشور شون بيٺاجتو هان بچڙائي شون الگو ريتو هووي. جو ٿي مهني هرو پڙو اُوئي ري خلاف ڪيو ڪه اُوئي

ني برباد ڪرون، ٻڻ تو پي او آڀري شاج تي پڪو هي.“ 4 اِئي تي شيطون پرميشور ني ڪهيو ڪم، ”ڪال ري بدلي ڪال يعني انسون آڀري جان

بچاڻ ري شارو آيو شجو ڪئين ڏي هي. 5 پڻ جي ٿو آيو هات ٻڌائي اُوئي ري ڏيل ني ڏڪ ڏي، تو ڀڄي او ضرور ٿاري موڏي تي ٿاري خلاف

ٻولشي.“ 6 پرميشور شيطون ني ڪهيو ڪم، ”جو او ٿاري اختيار ۾ هي، پڻ ٿو اُوئي ني ٺپ ماري ني.“

7 ڀڄي شيطون پرميشور شون ٺوئو گيو هان اُوئي اُيُوب رو ڏيل، مائي شون لي بگون توڻي سُور ڏيون آلي گوپڙون شون پري چوڙيو. 8 اِئي تي اُيُوب آڀري

ڏيل تي ڪاج ڪڻڻ ري شارو هيڪ نيڪري لي راک تي بينو. 9 ڀڄي اُيُوب ري لگائي ڪهيو ڪم، ”ڪي ٿو آجون توڻي آڀري شاج تي پڪو رئي؟ ٿو

ايشور ري خلاف ٻول هان مري جا.“ 10 پڻ اُيُوب آڀري لگائي ني ڪهيو ڪم، ”تو ڪالهي آلي ڪار اهڙي باتون ڪيون ڪري پڙي؟ ڪي ايشور

آپون ني سُڪ ڏي، پڻ ڏڪ ني ڏي؟ اِئي شجي باتون ۾ اُيُوب ايشور ري خلاف ڪو پي بات ڪونهي ڪي.“

اُيُوب رَا تَيْن دُوسْت

11 اُيُوب رَا تَيْن دُوسْت هَتَام تِيْمَان شَهْر شُون يَلْفَزَم سُوحْ عَلَانَقِي شُون بِلْدَد هَانْ نَعْمَا عَلَانَقِي شُون ضُوفَر. جَدِي اُوْتُون اُيُوب رِي دُكُون رِي بَارِي مِر شُتِيُوم تُو او اُپَرِي اُپَرِي عَلَانَقِي شُون آيَا كِه پِيژَا هُوِي اُيُوب رِي دُك مِر شَامَل هُوَوِي هَانْ اُوِي نِي تَسْلِي دِي. 12 جَدِي اُوْتُون اَلْغِي پُون شُون اُيُوب رِي حَالْت دُيُنِي، تُو اُوِي نِي اُوَلْكِ كُونَهِي شُكْهِيَا، جَدِي اُوَلْكِوَم تُو او زور شُون رُوئُ لَاگَا. پِيچِي اُوْتُون دُك مِر اُپَرَا گَايَا قَاژِيَا هَانْ اُپَرِي مَانِي مِر مَتِي گَهَاتِي. 13 او شَات دُنْ هَانْ شَات رَاتُون اِهِي حَالْت مِر اُيُوب پِيژَا زَمِين تِي بِيْنَا رَهِيَا، پِنْ اُوِي شُون بُولِيَا كُونَهِي. اُوْتُون دُيُنُو كِه اُيُوب رُو دُك، مَوْتُو دُك هِي.

اُيُوب رُو اُپَرِي جَنَم دُنْ تِي لَعْنَت

1 پِيچِي اُيُوب اُپَرِي جَنَم دُنْ تِي لَعْنَت كِي **3**  
 2 هَانْ كِيوُنْ لَاگُو كِه

3 ”او دُنْ بَرِيَاد هُوَوِي، جَكِي دُنْ هُون جَايُو،  
 او رَات پِي بَرِيَاد هُوَوِي،

جَكِي رَات هُون مَا رِي پِيْت مِر پَرِيُو.

4 پِلُو هُوَوْنْت، اُوِي دُنْ اِنْدَارُو هُوَوْنْت،

ايشُورَ آكَاش شُون اُوِي دُنْ رُو خِيَال نِي رَاكُونْت

هَانْ او دُنْ نِي اُگُونْت،

5 اِنْدَارِي هَانْ مَوْت رِي چَان اُوِي دُنْ تِي قَبْضُو كَرُونْت،

كَالُو بَاذَلْ اُوِي دُنْ اُيُونْت،

اِنْدَارِي اَلِي شِيُون. اُوِي دُنْ بِيَاژُونْت.

6 جَكِي رَات هُون مَا رِي پِيْت مِر پَرِيُو،

پِلُو هُوَوْنْت او رَات نِي هُوَوْنْت،

او رَات مَهِيْئِي، پِنْ شَال مِر نِي هُوَوْنْت،

تُو پِلُو هُوَوْنْت.

7 اُوِي رَات كُو پِي بَال، جَايُو نِي هُوَوْنْت

هانَ اُوئي رات خُوشي رو آواز ني اُونت.

8 ڏن تي لعنت ڪرڻ آلا اُوئي رات تي لعنت ڪرونت،

يعني او جادوگر جڪو موتي شُوندرِي بلا ني آڀري قبضي ۾ ڪري هي.

9 ڀلو هوونت، اُوئي رات تارا ني ڏيڪيجنت،

او رات شاڪلي هوڻ رو انتظار ڪرونت،

پڻ شاڪلي ني هوونت

هانَ ني او رات شاڪلي رو اُجالو ڏيڪنت.

10 ڪيونڪه جي او رات،

مهاري ما ني مهاري جنم ڏيوڻ شون پالونت،

تو آج مهني آي ڏڪ ڏيڪتا ڪونهي پڙونت.

11 هون ما ري پيت ۾ ڪيون ڪونهي موڻو؟

هون جنم ليوڻ شون پيل ڪيون ڪونهي موڻو؟

12 مهاري ما، مهني آڀري ڪوڙي ۾ ڪيون ليئو؟

مهاري ما، مهني ڪيون ڏوڏ پيٽايو؟

13 جي هون موڻو هوونت، تو آي ڏڪ ڪونهي ڏيڪونت،

هون اُونگاجوڙو هوونت هان مهني آروم ملونت.

14 هون اُونون بادشاهون هان وزيرون آلي ڪار پڙيو رونت،

جڪون آڀري شارو محل نڙايا هان او برباد هوئي گيا.

15 هاوي، هون اُونون آميرون آلي ڪار اُونگاجوڙو هوونت،

جڪون را گهر شون هان چوندي شون پريوڙا هتا.

16 ڀلو هوونت، مهني پي اُوئي ٻال آلي ڪار مڪوم ۾ ٻورونت،

جڪو پوري مهيتون رو ڪونهي هوتو.

17 جيٽ ٻيڙا منڪ، ٻيڙائي ڪري ڪونهي شگهتا

هانَ ٿڪوڙا آروم ڪري هِي۔

18 اوٽ شجائي قيدي آروم شون ري هِي

هانَ اوئون نِي جيلر رو آواز سُٿڻ ۾ ڪونهي آوتو۔

19 اوٽ نيا موتا شجائي برابر هووي هِي

هانَ غلوم آڀري مالڪ شون آزاد هووي هِي۔

20 جڪو مُصيبَت ۾ هِي، اوئون نِي زندگي ڪيئون مَلي هِي

هانَ جڪو آپ شون بيزار هِي، او مرتا ڪيئون ڪونهي؟

21 او موت مونگي هِي، پڻ ملتي ڪونهي،

او موت نِي ايئون تلاش ڪري هِي،

جهڙو ڪو لڪيوڙي خزوني ري تلاش ڪري هِي۔

22 جڏي او مُڪوم ۾ ٻوريڃي هِي،

تو خوش هوئي جشن ملهاوي هِي۔

23 او مِنڪ جيتو ڪيئون ري هِي،

جڪي نِي ڪو پي مارگ لادتو ڪونهي

هانَ جڪي را شجائي مارگ ايشور بند ڪري هِي۔

24 مهاري ڪاوڻ ري شارو ڏسڪا هِي

هانَ مهارا انشو پوڻي آلي ڪار بيتا ري هِي۔

25 جڪي بات رو مهني پي هووي هِي، اوج هووي هِي۔

هاوي، اوج هووي هِي، جڪي رو مهني پي هووي هِي۔

26 مهني نڪو تسلي ملتي، نڪو آروم

هانَ نڪو سڪون،

پڻ رگو ڏک ئي ڏک مَلي هِي۔“

اليفز رو پيلڪو گُهمرو بات ڪرڻ

<sup>1</sup> پڇي اليفز تيماني، اُيُوب نِي ڪهيو ڪم،

4

<sup>2</sup> ”جي ڪُن ٿي شون ٻولي،

تو هوئي شگهي ٿي خراب لاڳي،

پڻ ٻولڻ بنا، ڪيو ريشي؟

<sup>3</sup> جوم ٿي تموم گهڻا منڪ شيڪايا هي

هان ٿي سُست منڪون نِي همت ڏيني هي.

<sup>4</sup> تاري باتون ڪرتون نِي سنپاليا

هان ڏڪي گوڏون نِي طاقت ڏيني.

<sup>5</sup> پڻ همي جڏي ٿي تي ڏڪ آيا، تو تُو همت هاري بينو هي.

جڏي اُوئي ٿي هات لگايو، تو تُو تموم گهڻو گهڻايو.

<sup>6</sup> ٿي تو ايشور ري پگتي ڪي هي

هان آڀري حياتي ۾ ڪو پي پاپ ڪونهي ڪيئو،

ايئي ري ڪري ٿي ايشور تي ڀروسو ڪرڻ ڪڀي.

<sup>7</sup> ياد ڪم ڪي ڪڏي بي ذوهي منڪ مُوئو هي،

جون نيڪ منڪ قتل هويا هي؟

<sup>8</sup> پڻ مهِي ڏينو هي ڪم،

جڪو منڪ بچڙائي رو هل ڪيڙي هي

هان ڏڪون رو بيچ پوکي هي،

اوج اُوئي ري پوک لئي هي.

<sup>9</sup> او ايشور ري فُوك شون راک هوئي جاشي،

هاوي، اُوئي ري ڪهر آلي فُوك شون مري جاشي.

<sup>10</sup> جهڙي نموني ٻير شير رو گرجڻ بند هووي هي

هانَ جوان شينهن را ڏونت ڀاڳي هِي۔

11 شڪار نِي ملڻ شون بُوڊو شينهن مري هِي

هانَ شيرڙي را بچيا رُئي هِي۔

12 هيڪ بات لڪ ۾ مهي توڙي ڀڳي

هانَ مهاري ڪونون، او ڦسڪا سُٺيا۔

13 مهي رات رو گهور اُونگ ۾ هيڪ خراب شينو ڏينو،

جڪي نِي ڏيڪي هون گهرايو۔

14 پي ۾ مهارو ڏيل ڏوجڻ لاگو۔

15 پچي هيڪ آتما مهاري آگهي شون لنگهي

هانَ مهارا بال اُڀا هوئي ڳيا۔

16 او آتما مانو مان، مهاري آگهي آئي اُڀي،

پڻ هون اُوئي نِي اولڪي ڪونهي شگهيو۔

هيڪ شڪل مهاري اونڪيون آگهي هتي،

پچي مهي خاموشي ۾ هيڪ آواز سُٺيو ڪم،

17 ڪي، فاني انسون ايشور آگهي نڪ هوئي شگهي هِي؟

ڪي، ڪو انسون آپري خالق آگهي پوئتر هوئي شگهي هِي؟

18 جو، ايشور آپري فريشتون تي ڀروسو ڪونهي ڪرتو

هانَ آپري فريشتون را عيب پي ڪاڍي هِي۔

19 تو پچي انسون تي ڪيڪر ڀروسو ڪرشي،

جڪو مٽي ري ٺاهيوڙي ڏيل ۾ ري هِي

هانَ جڪون رو بُنياد پي مٽي تي هِي،

او ڪيڙون آئي ڪار لٽاڙيجي هِي۔

20 او شاڪلي توڙي جيتا ري هِي،

پڻ شام رو ماريجي هي۔

ڪو پي ڪونهي جڪو اُونون ري رڪالڻي راڪي

هان او هميشا ري شارو ماريا جاوي هي۔

<sup>21</sup>اُونون ري تنبُونون ري رنڊوڙي باڊيجي هي

هان شمعجھ آوڻ شون پيل مري جاوي هي۔“

مدد ري شارو پُڪار

<sup>1</sup> اليغزم اُيُوب ني آي پي ڪهيو ڪم،

5

”اي اُيُوب، همي پلي تو هيلو ڪري جو،

ڪن ٿي تسلي ڏيشي؟

ڪي ڪو پويتر هستي آني ٿاري مدد ڪرشي؟

<sup>2</sup> بيشڪم ريش هان شالم،

بي وقوف ني نپ ماري هي۔

<sup>3</sup> مهِي بي وقوف ني پال لاگتي ڏينوم،

پڻ مهِي اُوڻي ري گهر ني پتيو۔

<sup>4</sup> اُوڻي را بال سنپالڻ آلو ڪو پي ڪونهي،

او شهر ري در تي چيليا جاوي هي

هان ڪو پي اُونون ني بچاوڻ آلو ڪونهي۔

<sup>5</sup> بي وقوف منڪ ري پوک، بُوڪيا ڪاوي هي

هان او ڪونتنن ۾ پي، پوک ڪاڍي ڪائي جاوي هي۔

لالچي منڪ اُوڻي ري ملڪيت گني جاوي هي۔

<sup>6</sup> ڪيونڪه ڏڪم، ٻني شون ڪونهي اگنا

هان نڪو ڏڪ ٻني شون نڪرنا۔

<sup>7</sup> جهڙي نموني چڱگون ماڻي اڏي هي،

اُوَيْحَ نُمُونِي اِنْسُونِ يِي دُكْ دِيكُن رِي شَارُو جايوڙو هِي.

<sup>8</sup> پڻ اي اُيُوب، جي هُون تاري جگها تي هويو هوونت،

تو رُگو ايشور نِي پُڪارونت

هان آڀرا شجائي دُڪ اُوئي تي چوڙنت.

<sup>9</sup> بيشڪم ايشور را موتا موتا كوم شمعجه شون باهر هِي

هان اُوئي را عجيب كوم گيڻن دُڪيا هِي.

<sup>10</sup> ايشورم، ذرتي تي مي برشاوي هِي

هان بني نِي پوڻي دِي هِي.

<sup>11</sup> ايشورم، كسيس منكون نِي كامياب كڙي هِي

هان دُڪ آئون نِي همت دِي هِي.

<sup>12</sup> او چالاڪ منكون رِي رٿائون برباد كڙي هِي،

ڪه اُوئون رِي ناهيوڙي رٿائون ناکام هووي.

<sup>13</sup> او ڏاهون نِي آڀري چالاڪي ۾ قشاوي هِي

هان او آڀري مشورون ۾ چيڪا ناکام هووي هِي.

<sup>14</sup> ڏن رو اُوئون مائي اندارو هووي هِي

هان او بپيار رو اونڌون آڻي ڪار نِي هِي.

<sup>15</sup> ايشورم، مُحْتاجون نِي طاقت آئون رِي زبون آڻي تلوار

هان ظلم شون بجاوي هِي.

<sup>16</sup> ايئي رِي ڪري مُحْتاج نِي اُميد هووي هِي

هان بُوڙون را مونڌا بند هوئي جاوي هِي.

<sup>17</sup> ڏن هِي او جڪي نِي ايشور چيني هِي،

ايئي رِي ڪري قُدرت آڻي ايشور رِي چڻپ نِي گهت نِي شمعجه.

<sup>18</sup> جي ايشور زخم دِي، تو اُوئي رِي پتي يي ڪري هِي.

او زخم دَڙي، تو شفا پي اوج دَڙي هي۔

19 او تني اينون دُڪون شون بچاشي،

پڻ او تني هر هيڪ دُڪ شون بچاوتو ريشي۔

20 جڏي دُڪال پڙشي، تو ايشور تني مرڻ ڪونهي دَڙي،

او جنگ ۾ پي تني تلوار شون بچاشي۔

21 تُو گِلا ڪرڻ آئون ري مهيتون شون بچوڙو رئي

هان جڏي دُڪ آشي، تو بيتاجي ڪونهي۔

22 تُو بربادي هان دُڪال پڙڻ تي هاشي

هان ڌرتي ري حرومي جنارون شون ڪڏني ڪونهي بيتاجي۔

23 تاري بني ۾ ڪو پي پڙ ڪونهي هووي

هان خطرناڪ جنار تي حملو ڪونهي ڪري۔

24 پڇي تني خبر پڙشي ڪه تاري گهر ني ڪو پي خطرو ڪونهي

هان جڏي تُو آپري مال ري باڙي ۾ جائي،

تو تارو ڪو پي جنار گهٽ ڪونهي هووي۔

25 تني آي پي خبر پڙشي ڪه،

تارا تموم گهٽا اولاد هوشي،

او بني ري گاش آئي ڪار بدتا جاشي۔

26 تُو موتي عمر آتو هوئي مري هان پوريجي،

جهڙي نموني ڪڻڪ را گڏا آپري مُند تي پڙا ڪريجي هي۔

27 جو، آي بات شاچي هي،

ڪيونڪه مهون آپ ايئي بات ري جانچ ڪي هي۔

آي بات ذهيون دَڙي سُڻ هان فائدو لي۔“

اُيُوب رُو اليغز نِي بِلتِي دَبوُڻ

<sup>1</sup> پِچِي اُيُوب كِهِيو ڪم.

6

<sup>2</sup> ”جي مهاري دُڪون رو حساب ڪيو جاوي

هانَ شَجِي مُصِيبَتون رِي تول هووي،

<sup>3</sup> تو او شَمُوندر رِي بيئُو شون پِي وڌيڪ پارِي هوشِي.

اِيشِي رِي ڪري مهاري باتون بيڪار هي.

<sup>4</sup> قُدرت آلي ايشور را تير مهني لاگا هي

هانَ تيرون رو زهر مهاري ذيل ۾ پڪڙي پڙيو.

ايشور را خوفناڪ حملا مهاري شارو تيار هي.

<sup>5</sup> ڪي جهنگلي گڏو گاش ملڻ شون پِچِي هڪات ڪري هي؟

هانَ ڪي دِگو گاش ملڻ شون پِچِي هڪات ڪري هي؟

<sup>6</sup> ڪي قِيڪو ڪاڌو لُوڻ بنا ڪائيجشي؟

ڪي اينڌي رِي آچوڻ ۾ ڪو سواد هي؟

<sup>7</sup> هُون اهڙي شيون نِي هات پِي ڪونهي لگاوتوم،

ڪيونڪه مهني ايتون شون نفرت هي.

<sup>8</sup> ايشور ڪري مهاري منت شُڻيجي

هانَ ايشور مهاري اُميد پوري ڪري.

<sup>9</sup> جي ايشور رِي آي مرضي هوونت،

ڪه او مهني چيلي چوڙنت

هانَ آپري هاتون مهني ماري چوڙنت.

<sup>10</sup> تو مهني تسلي هوونت

هانَ هُون اِيشِي هميشا رِي دُڪ ۾ پِي خُوش رونت،

ڪيونڪه مهني اوئي پويتر هستي رِي باتون لڪائي ڪونهي.

11 مَهِي ۾ اترِي طاقت ڪونهي ڪه هُون اِنْتَظار ڪرون

هانَ شُنيَ زندگِي رِي شارُو صبر ڪرون-

12 هُون پترِ آلي ڪار مضبوط ڪونهي

هانَ نڪو مهارو ذيل بيتل رو نهيوڙو هي-

13 همي هُون لاچار هون،

مهاري جيتي ريوڻ رِي ڪو پي اُميد ڪونهي-

اُيُوب رِي آپري دوستون شون شڪايت

14 اُيُوب آي پي ڪهيو ڪم،

”جڪو آپري نا اُميد دوست تي مهربون ڪونهي،

او اُوني مينڪ جهڙو هي،

جڪو قُدرت آلي ايشور شون بيٺاجتو ڪونهي-

15 مهاري دوستون مهني اهڙو دوکو ڏينوم،

جهڙو مي رِي مُند ۾ ندي ڪپ توڻي ني هي-

16 او ندي برف شون پريجي هي،

17 پڻ گرمي ۾ اُونون نديون رو پوڻي ختم هووي هي

هانَ او شوڪي جاوي هي-

18 پچي تولا پوڻي رِي تلاش ۾ مارگ ڦٽو ڪري هي

هانَ او رڻ پت ۾ پڳي مري جاوي هي-

19 تيما علائقي را تولا پوڻي رِي تلاش ڪرتا رِي هي

هانَ سڀا علائقي را مُسافر پوڻي رِي اُميد ۾ رِي هي-

20 اُونون ني ڀروسو هي ڪه پوڻي لادشي،

پڻ جدي پوڻي ڪونهي لادتوم، تو او پريشون هووي هي

هانَ اوڻ پڳي پچتاوي هي-

21 اُوئون نديون آلي كار تي پي مهاري كي كوم را كونهي،

ڪيونڪه تي مهارا دُڪ ڏيڪي گهبرايا هو.

22 ڪي مهِي تون شون ڪو تحفو مونگيو؟

جون، تون آڀري ملڪيت ۾ مهاري شارو ڪو رشوت ڏيني؟

23 ڪي مهِي توني ڪهيو ڪم،

تي مهني دشمن شون چوڙائو؟

جون، قيمت ڏي ظلميون ري هاتون بچائو؟“

اُيُوب رو آپني بي ڏوهي ثابت ڪرڻ

24 پڇي اُيُوب ڪهيو ڪم،

”تي مهني شنائو هان مهارو ڏوه ثابت ڪرو،

تو هون ماڻ هوئي جائين.

25 شاڄي باتون تموم گهڙي اثر آلي هووي هي،

پڻ تونري باتون ۾ ڪو پي اثر ڪونهي.

26 تي جڪو باتون بيڪار سمجهو هو،

او مهِي، نا اميدي ۾ ڪيئي.

تي اوئون باتون ري ڪري مهِي تي ڏوه ني لگائو.

27 تي آڀرا دوست پي بيچو هو

هان يتيم ني ليون ري شارو ڀڪو گهاتو هو.

28 همي مهربوني ڪري مهاري بات شئوم،

هون تون آگهي ڪوڙ ڪونهي بولون.

29 مهربوني ڪري بي انصافي ني ڪرو

هان آڀري غلطي منوم ڪيونڪه هون شاڄو هون.

30 ڪي هون ڪوڙو هون؟

ڪي مهني ٺڳي آئي باتون ري سمجه ڪونهي؟“

ايوب ري ايشور شون شڪايت

1 پڇي ايوب ڪهيو ڪم،

7

”انسون جگت ۾ سخت محنت ڪري هي

هان اوئي ري زندگي هيڪي مڙور جهڙي هي۔

2 جهڙي نموني ڪو غلوم چان رو انتظار ڪري هي

هان مڙور آڀري مڙوري ملڻ ري اميد ڪري هي۔

3 مهاري شارو ڏڪ را مهڻا

هان تڪليف ڏيوڻ ري راتون راکيوڙي هي۔

4 جڏي هون پڇوڻي تي شونون هون،

تو شوچون هون ڪه ڏن ڪڏي اڳشي؟

ڪيونڪه راتون موڻي هي۔

هون ڏن اڳڻ توڻي پنا ڦورتو رون هون۔

5 مهارو ڏيل ڪيون هان مڻي شون پريجوڙو هي،

مهارا ڦٽ شاجا ڪونهي هوتا،

پڻ اوئون ۾ رشي پريجي هي۔

6 مهاري زندگي را ڏن بيگا بيگا بي پڙيا

هان هون بنا اميد جيتو هون۔

7 اي ايشور، ٿني خبر هي ڪم،

مهاري زندگي پل پر هي،

مهاري اونڪي پڙي خوشي ڪونهي ڏيڪي۔

8 تو هتون مهني ڏيڪي پڙيو،

پڻ پڇي ڪڏي ڪونهي ڏيڪي۔

تُو مهنِي جُوئي، بِنُ لادُون كُونهي۔

<sup>9</sup> جِهڙِي نمُونِي جُهڙ لنگهي گُم هووِي هي،

ايئوج جڪو پُوريجِي هي،

او ڪڏي پي باهر كونهي آتو۔

<sup>10</sup> او پاچو آپري گهري كونهي آوي

هانَ منڪ اُوئي ني پونترِي جاشِي۔

<sup>11</sup> ايئي ري ڪري هُون آپرو مونڌو بند ڪري كونهي سگهتو،

هُون آپري ڏُڪون ۾ بولتو رئين

هانَ آپري ڏُڪون ري دانهن ڏيتو رئين۔

<sup>12</sup> ڪي هُون شُمندرم جون شُمندري بلا آئي ڪار خطرناڪ هون،

جڪو تي مهِي تي پهرو لگايو هي؟

<sup>13</sup> جڏي هُون ڪونه هون ڪه پڇوئي تي مهني آروم ملشي

هانَ شوئڻ شون مهارو ڏُڪ گهت هوشي۔

<sup>14</sup> تو تُو شپنون ۾ آئي مهني پيئاري هي

هانَ شپنون ۾ آئي مهني پريشون ڪري هي۔

<sup>15</sup> همي ايئي ڏُڪون آئي زندگي شون پلو هي،

ڪه ڪو مهني گهتو ڏي ماري چوڙي۔

<sup>16</sup> مهني آپري زندگي شون نفرت هوئي ري،

هُون وڌيڪ ني جيئون، تو پلو هي،

مهني هيڪلو چوڙم

ڪيونڪه مهاري زندگي توڙڪي هي۔

<sup>17</sup> انسُون ري ڪهڙي حيثيت،

جڪو تُو اُوئي ني عزت ڏي هانَ اُوئي رو ذهيون راڪي؟

18 جون، هر روز شاڪلي رو اُوئي ري خبر راڪي

هانَ هر تيم اُوئي ني آَماوي؟

19 تُو مهني هيڪلو چوڙ

هانَ مهني موهلت ڏي، تو هُون سُڪ رو شاش ليئون-

20 اي ايشور، تُو جڪو اِنسون تي نظر راڪي هي،

جي مهني پاپ ڪيئو هي،

تو تارو ڪهڙو نقصون هويو؟

تي مهني ڪيئون نشونون ناهيو هي؟

هون تاري شارو پار ڪيئون هويو هون؟

21 همي تُو مهارو پاپ معاف ڪيئون ڪونهي ڪرتو

هانَ مهاري بچڙائي مهني شون الڳي ڪيئون ڪونهي ڪرتو؟

ڪيونڪه همي هون مٽي ۾ ملي جائين،

پچي تُو مهني جوتو رئي، پڻ هون لادون ڪونهي-“

بلدد ري اُيُوب شون بات ڪرڻ

1 پچي بلدد سُوخي اُيُوب ني ڪهيو ڪم

8

2 ”تُو ڪتري توڻي اهڙي باتون ڪرتو رئي

هانَ تُو ڪتري توڻي طوفون آلي ڪار تيز ٻولتو رئي؟

3 ڪي، ايشور بي اِنصاف هي؟

نام قُدرت آتو ايشور شاچ شون اِنصاف ڪري هي-

4 هوئي شگهي، تاري اولادون ايشور رو ڪو پاپ ڪيئو هووي

هانَ اُوئون ني اُوئون ري پاپون ري سزا ملي هووي-

5 همي جي تُو قُدرت آلي ايشور شون مدد مونگي

هانَ اُوئي ني دايا ري شارو پُڪاري،

6 جي تُو پويتر هانَ شاجو هووي،

تو او ضرور تاري مدد ڪرشي

هانَ تارو گهر پڙي آباد ڪرشي.

7 بيشڪ، شروع ۾ ٿي ڪڍي ٿوڙو هتو،

پڻ اوڻ آڻي ڏنون ۾ ٿي ڪڍي ائيني شون پي وڌيڪ هوشي.

8 همي پروڻي زموني ري منڪون ري باري ۾ پوڄا ڪر

هانَ جڪو ڪئين باپ ڏاڏون شيڪايو، اوئي تي دهيون ڏي.

9 آبي هٿون پال هون هانَ ڪئين ڪونهي جوڻا

هانَ ڌرتي مائي آڻي زندگي ٿوڙڪي هي.

10 تُو باپ ڏاڏون ري ڏاهپ شون شيڪ

هانَ اوئون ري باتون تي دهيون لگا.

11 ڪي ڪنول رو گل، گپ بنا اُگي هي؟

جون سَر، بنا پوڻي ري موتو هووي هي؟

12 او شاوا هووي هي هانَ جڏي پوڻي ني ملي،

تو پيڄي ٻوتون شون پيل شوڪي جاوي هي.

13 اوئون منڪون شون پي ايشوج هووي هي،

جڪو ايشور ني پونتري هي،

او بنا اُميد جيتا هي.

14 اوئون رو پروسو ڪلاتري آڻي جال جهڙو هي،

جڪو چيڪو ٿوڙي هي.

15 ڪي ڪڻ جائي ني تڪ لگائي شگهي هي؟

جون ڪڻ جائي ني جهالي اُبي شگهي هي؟

16 پيڙا منڪ اوئون بئون جهڙا هووي هي،

جڪون ري تائي تڻڪو لاڳڻ شون پيل شاوي هووي هي

هان باگ ري چوڌاري پڪڙي جاوي هي.

17 اُونون ري پاڻون جبلون مائي پڪڙي هي

هان پٿرون شون بيڙهيڃي هي.

18 جڏي اُونون ني اوني جگها شون اڪوڙي هي،

تو او سولي نموني نڪري هي

هان ڪو پي ڪونهي ڪي ڪه پيل اوڻ ڪئين هتو.

19 جو، اُونون ري زندگي رگو اِٿري هي،

پڇي اوني جگها بيجا ٻڻ اڳي هي.

20 ياد راک، ايشور، بچڙون ري نام

پڻ نڪ منڪون ري مدد ڪري هي.

21 ايشور ٿي پڙي خوشي ڏيشي

هان ٿو خوشي را نارا لگائي.

22 جڪو ٿي شون نفرت ڪري هي،

او شرمندا هوشي

هان بچڙون را گهر برباد هوشي.

اُيُوب ري بلدد ني بلتي ڏيوڻ

1 پڇي اُيُوب، بلدد ني بلتي ڏيني ڪه،

2 ”مهني خبر هي ڪه ٿاري باتون صحيح هي،

پڻ انسون ايشور اگهي ڪيڪر نڪ هوئي شگهي هي؟

3 جي انسون ايشور شون بحث ڪري پي،

تو او هزار باتون ڀه،

ڪي پي بات ري بلتي ڏي ڪونهي شگهتو.

4 ايشور ڏاهو هان ڦڌرت آڻو هي،

ڪٺ اُوئي شون بحث ڪري ڪامياب هويو هي؟

5 ايشور جبل هٽائي چوڙي هي

هان اُونون ني خبر پي ڪونهي پڙتي،

او آپري ڪهر ۾ آئي اُونون ني اُونڌا ڪري چوڙي هي.

6 ايشور زمين ني اُوئي ري جگها شون، هلائي چوڙي هي

هان اُوئي رو بُنياد لڏي جاوي هي.

7 او ڪي ڪه سُورج ني نڪري، تو او ڪونهي نڪرتو.

او تارون تي ٺپو لگاوي، تو او ڪونهي اُگتا.

8 هيڪج ايشور هي، جڪي آڪاش ناهيا

هان او شَموندر ري چوليون مائي ني هي.

9 ايشور، ڪات، تپرو هان ڪتي نون را تارا ناهيا

هان اُوئي ڏڪڻ را بُرج پي ناهيا.

10 ايشور، تموم موتا موتا ڪوم ڪيئا هي،

جڪون ني ڪو پي سمجهي ڪونهي سگهتو

هان اُوئي اِترا تو پرچا ڪيئا هي، جڪو گِٺڻ ڏُڪيا هي.

11 جو، ايشور مهِي شون هوئي بُوڻو جاوي هي،

پڻ هُون ڏيکتو ڪونهي.

او مهاري آگهي تو هووي هي،

پڻ مهني خبر ڪونهي پڙتي.

12 جو، جي او ڪئين ڪوشي لي،

تو ڪٺ اُوئي ني پالشي؟

هان ڪٺ اُوئي ني ڪشي ڪه، ’تو آي ڪي ڪري پڙيو؟‘

13 جڏي ايشور آڀري ريش بتاوي هيءَ،

تو شمنوندري مخلوق رهب را سائي پي

بي ۾ اُوئي آگهي جُهڪي هيءَ.

14 مهاري ڪهڙي حيثيت ڪه هون اُوئي ني بلتي ڏيئون؟

هان اُوئي شون بحث ڪرڻ ري شارو سنا آڪر ٻولون؟

15 بيشڪ هون شاجو هون، تو پي اُوئي ني بلتي ڪونهي ڏيئون،

پڻ هون دايا ري شارو اُوئي ني منت ڪرين.

16 جي او مهاري پڪار ري بلتي ڏيئون،

تو پي هون ڀروسو ڪونهي ڪرون،

ڪه اُوئي مهاري فرياد سُڻي هيءَ.

17 او طوفون ميلي مهني برباد ڪري هي

هان بنا ڏوه مهني گهڙي گهڙي ڏڪ ڏي هيءَ.

18 او مهني شاش پي ليون ڪونهي ڏيون،

پڻ مهاري طاقت شون پي وڌيڪ ڏڪ ڏي هيءَ.

19 جي طاقت ري بات ڪي جاويءَ،

تو ايشور شون نال بيجو ڪو پي طاقت آلو ڪونهي.

جي انصاف ري بات ڪي جاويءَ،

تو ڪن مهني انصاف ڏيراشي؟

20 جي هون ڏوهي ڪونهي،

تو پي مهاري زبون مهني ڏوهي ڪرشي

هان جي هون نيڪ هون،

تو پي مهاري زبون مهني ڏوهي ڪرشي.

21 مهارو ڪو پي ڏوه ڪونهي،

مهني مهاري جان ري پرواه كونهي

هان مهني آبري زندگي شون نفرت هي.

<sup>22</sup> ايئي ۾ ڪو پي فرق ڪونهي پڙتو،

ڪيونڪه ايشور بي ڏوهي هان بچڙون،

پيئون ني ماري چوڙي هي.

<sup>23</sup> جڏي پي اوچتو ڏک ۾ بي ڏوهي منڪ مري هي،

تو ايشور آي ڏيکي هائي هي.

<sup>24</sup> ايشور، جگت ني بچڙي منڪون ري حوالي ڪيو هي

هان اوئي اگووڻون ري اونڪيون مائي پتي بونڊي هي.

آي شجو ايشور شون ٿال پيجو ڪيو ڪري شگهي هي؟

<sup>25</sup> مهاري زندگي را ڏن،

بنا خوشي هان بنا اُميد، تموم گهڻا چيڪا ختم هووي پڙيا.

<sup>26</sup> مهاري زندگي را ڏن،

شرون آلي پڙي آلي ڪار هي،

جڪو چيڪي بي پڙي،

اُوئي باز آلي ڪار، جڪو آبري شڪار تي حملو ڪري هي.

<sup>27</sup> جي هون آي ڪونه ڪم،

هون آبرو ڏک پونترون

هان پريشوني چوڙي خوش رئين.

<sup>28</sup> تو پي مهني اوڻ آلي ڏڪون رو بي هي،

مهني خبر هي ڪه ايشور مهني ڏوهي ڪرشي.

<sup>29</sup> جڏي مهني ڏوهي ڪيو جاشي،

تو هون هرورپرو ڪيون خوش ريوڻ ري ڪوشش ڪرون؟

30 جي هُون شاؤو شون جهيلون

هانَ آڀرا هات ڪار شون ڌوئون،

31 تو پي ايشور مهني ڪن آئي ڪڏي ۾ گوتا ڏيشي

هانَ مهارا گاپا مهني شون نفرت ڪرشي-

32 او ايشور هي، مهني جهڙو انسون ڪونهي،

ڪه هون ڪورت ۾ جائي اوئي رو مقابلو ڪرون-

33 جي مهون ۾ ڪن فيصلو ڪرڻ آڻو هوئي،

جڪو مهارو هانَ ايشور رو فيصلو ڪري،

34 ڪه ايشور مهني وڌيڪ سزا ني ڏي

هانَ اوئي رو پي مهني پريشون ني ڪري،

35 تو پچي هون ايشور شون، بنا پي باتون ڪرون،

پڻ هون ايئي حالت ۾ اوئي شون ٻولي ڪونهي شگهتو-“

اُيُوب ري ايشور شون شڪايت

1 پچي اُيُوب ڪهيو ڪه،

# 10

”هون آڀري زندگي شون بيزار هون،

ايئي ري ڪري دل ڪولي ايشور شون شڪايت ڪرين

هانَ آڀرا من را ڏڪ اوئي ني شنائين-

2 اي ايشور، تُو مهني ڏوهي ني ڪم،

پڻ مهني شٽا، تُو مهني شون ڪيئون جهڙو ڪري هي-

3 ڪي تني ظلم ڪرڻ سُنو لاڳي هي،

ڪه آڀري هات ري ناهيوڙي انسون ني رد ڪري؟

ڪي تُو ايئون ڪري ٻچڙي منڪون ري رٿائون پوري ڪونهي ڪرتو؟

4 ڪي تاري اونڪي انسون آئي ڪار هي؟

ڪي تُو اِنسون آئي ڪار ڏيکي هي؟

<sup>5</sup> ڪي تاري زندگي را ڏن هان شام،

اِنسون آئي ڪار ٿوڙا هي؟

<sup>6</sup> تو پڇي تُو مهني ۾ ڪيئون پاپ هان ڏوه جووي هي؟

<sup>7</sup> تني خبر هي ڪه هون ڏوهي ڪونهي

هان مهني تاري هاڻون ڪو پي بجائي ڪونهي سگهي.

<sup>8</sup> تي مهني آڀري هاڻون شون ناهيو هي،

ڪي همي تُو مهني ماري؟

<sup>9</sup> اي ايشور، ياد ڪر، تي مهني متي شون ناهيو هي،

ڪي تُو مهني پڙي پاڇو متي ۾ ملاوڻ رو سوچي پڙيو؟

<sup>10</sup> تي هيڪي بوند ري شڪل ۾،

مهني مهاري ما ري پيت ۾ راڪيو

هان اوڻ مهارو ڏيل نيون شروع هويو.

<sup>11</sup> پڇي تي مهاري ڏيل ماڻي موش پريو،

مهارو هاڏڪي هان نئون ناهي

هان اونون ماڻي ڪال چاهي.

<sup>12</sup> تي زندگي ڏي مهني تي دايا ڪي

هان مهاري جان ري رڪائي راڪي.

<sup>13</sup> تو پي تي اي باتون آڀري من ۾ لڪائي راڪي،

پڻ مهني تاري مرضي اوڻڪي ري،

<sup>14</sup> ڪه جڏي هون ڪو پاپ ڪرين،

تو تُو مهني جوتو هوئي

هان مهارو ڏوه معاف ڪونهي ڪري.

15 جي هُون ڏوهي هون، تو مهِي تي افسوس،

جي هُون ڏوهي ڪونهي، تو پي هُون شرميدو هون،

ڪيونڪه مهاري تموم گهڻي بي عزتي هونِي

هان مهني تموم گهڻا ڏک ڏينا گيا هي.

16 جي هُون ٻڌائو ڪرون،

تو تُو بَر شير آلي ڪار مهارو شڪار ڪري

هان عجيب ڪومون شون گهڙي گهڙي مهني ڏک ڏئي.

17 تُو مهاري خلاف نونا گواه اُپاڙي

هان ٿاري فوج مهني تي چڙهي آهي،

ايئي نموني مهارا ڏک آيون پي ٻڌي جاشي.

18 ٿي مهني مهاري ما ري بيت شون ڪيئون جنم ڏينو؟

پلو هوونت، هُون ڪيري جوڻڻ شون پيل مري جائونت.

19 پلو هوونت، هُون جنم شون پيل مري جائونت

هان بوريجونت، جهڙو هُون هتو ئي ڪونهي.

20 مهاري زندگي را ڏن تموم ٿوڙيا رهيا هي،

هنو ڪر، مهني ڦٽو ڪر،

ڪه هُون ٿوڙي دير ري شارو شڪ رو شاش ليئون.

21 ڪيونڪه مهني چيڪو اوئي جگها تي جاوڻو هي،

جيٺ شون ڪو پي پاچو ڪونهي آونم،

يعني پتال لوڪ، جيٺ رگو انداري هان موت ري چان هي.

22 اوٺ گهور اندارو هان موت ري چان هي

هان اوٺ رو اُجائو پي انداري جهڙو هي.

ضُوفَر رُو پِيلڪو گُھمرو بات ڪرڻ

<sup>1</sup> پڇي ضُوفَر نعماتي ڪيُوڻ لاگو ڪم.

# 11

<sup>2</sup> ”ڪي اِئي شَحي باتون رِي بِلتي ني ڏيوڻ ڪِپي؟“

ڪي وڌيڪ ٻولڻ آڻو مَنڪ نيڪ سَمجھو جاشي؟

<sup>3</sup> اي اُيُوب، ڪي تازي بيڪار باتون شون مَنڪ مات هوشي

هانَ جڏي تُو هاشا ڪري، تو ڪو تني شرميدو پي ني ڪري؟

<sup>4</sup> تُو ڪي هي ڪم، ’مهاري عقل آئي باتون شاجي هي

هانَ هُون ايشور رِي نظر ۾ بي ڏوهي هون-‘

<sup>5</sup> ڪترو پلو هوونت، ايشور آپ تي شون ٻولنت

هانَ تني بِلتي ڏيونت-

<sup>6</sup> ايشور آپ، آپري ڏاهپ را پيد تي ظاهر ڪرون

هانَ تُو اُوئي را پيد سَمجھونت،

تو تني خبر پڙونت ڪه جترا پاپ تي ڪينا هي،

ايشور تني اُتري سزا ڪونهي ڏيني-

<sup>7</sup> ڪي تُو آپري سَمجھ شون ايشور رو پيد جوئي شگهي؟

ڪي تُو ڦڌرت آئي ايشور رو موتو پيد سَمجهي؟

<sup>8</sup> ايشور رو پيد آڪاش شون ماتي هي،

جيٺ تُو پُگي ڪونهي شگهتو،

او پتال شون پي موتو هي،

تُو اُوئي رِي باري ۾ جوئي ڪونهي شگهتو-

<sup>9</sup> اُوئي رِي لُونبائي زمين شون گهڻي،

هانَ ويڪرائي شموندر شون پي وڌيڪ هي-

<sup>10</sup> جي ايشور تني ٻونڌي هانَ عدالت ۾ آڻوي،

تو اُوئي نِي كُنْ پالشي؟

11 ايشور بچتون نِي اولڪي هي،

او اُون رِي پُونڌائي تي نظر راڪي هي

هان اُون را كوم پي اولڪي هي.

12 بي وقوف منڪ رو آي باتون سمجهڻ، اِترُو ڏُڪيو هي،

جِترُو جهنگلي گڏي شون اِنسون رو جنم.

13 اي اُيُوب، تُو آڀري پوري من شون ايشور تي ڀروسو راڪ

هان آڀرا هات پراتنا رِي شارو اُوئي ڏيشا ڪر.

14 جي ٿاري هاتون، ڪو پاپ هويو هي،

تو اُوئي رو اقرار ڪر

هان بچڙائي نِي آڀري گهر شون ڪاڍ.

15 تو تُو شرميدو ڪونهي هوڙي،

تُو دليري شون اُڀو رِي

هان ٿني ڪو پي بي ڪونهي هوڙي.

16 تُو آڀرا ڏڪ پونٿري جائي،

او ٿني رُو پيلڪي بوڏ آئي ڪار ياد ريشي.

17 ٿاري زندگي پيپار آئي اُجائي شون پي وڌيڪ چمڪشي

هان ٿاري زندگي رو اندارو شاڪلي آئي اُجائي آئي ڪار بدليجشي.

18 تُو آروم شون رِي، ڪيونڪ ٿني اُميد هوشي،

تُو آڀري چارئي پاشي بنا پي اُونگاجي.

19 جڏي تُو اُونگاجي،

تو ٿني ڪيرو پي بي ڪونهي هوڙي،

پڻ تموم گهڻا منڪ ٿني خوش ڪرڻ رِي ڪوشش ڪرشي.

20 پڻ بڻجڙا مينڪ ڪئين ڪونهي ڏيکي شگهي

هانَ اُوئون نِي بچڻ رو ڪو پي مارگ ڪونهي لاڏي

اُوئون ري آخري اُميد موت هوشي-“

اُيُوب رو آپري دوستون نِي بلتي ڏيوڻ

1 ايني تي اُيُوب ڪهيو ڪم

# 12

2 ”ايئون لاڳي هي ڪه رگو تيج ڏاها هو

هانَ جڏي ٿي مرشوم تو ڏاهپ پي تون پيڙي ختم هوني جاشي-

3 پڻ مهِي ۾ اُتري شمعجھ هي جتري تون ۾-

ڪي ٿي مهِي شون وڌيڪ شمعجهدار هو؟

اهڙو ڪڻ هي، جڪو آي باتون ڪونهي جوڻو؟

4 مهارو حال اُوئي مينڪ جهڙو هي،

جڪي را دوست پي اُوئي تي هاشا ڪري هي-

هُون او مينڪ هون، جڪي ري پرائنا ايشور سُنتوم

پڻ شاجي هانَ نيڪ مينڪ تي ننولي هوي هي-

5 جڪي ري زندگي ۾ سُڪ هوي،

او ڏڪ آلي تي ننولي ڪري هي

هانَ ڪرتي نِي ڌڪو ڏي هي-

6 ڌاڙيل آپري گهري آروم شون ري هي

هانَ جڪو ايشور نِي ريش ڏيراوي هي،

او آروم شون ري هي

هانَ اُوئون را ڏيوئا اُوئون ري هات ۾ هوي هي-

7 ڏنو ڌرتي ري چنارون شون پوچ،

او ٿئي شيڪاشي

هانَ آڪاش ري پڪيون شون پوچ،

تو او پي تني سُٺاشي-

8 تُو ڌرتي ري ڪي جنار شون پوچ،

تو او تني شيڪاشي-

جون شُونڊري مڇيون شون پوچ،

تو او تني سُٺاشي-

9 ايئون شجون ني خبر هي ڪ،

آي شجائي پرميشور ناهيا هي-

10 هر جنار هانَ هر هيڪ انسون ري زندگي،

ايشور ري هات ۾ هي-

11 آبي ڪونَ شون بات اولڪون هون،

جهڙي نموني زبون شون ڪاوڙ رو سواد اولڪون هون-

12 ڏوڪرا ڏاها هووي هي

هانَ موتي عمر آلا سمجهدار هووي هي-

13 ڏاهپ هانَ قدرت ايشور ڪڍي هي

هانَ سمجه هانَ سُني صلاح ڏيوڻ آڻو پي اوج ايشور هي-

14 ايشور جڪي ني پونگي،

اُوئي ني پڙي ڪو پي نائي ڪونهي شگهتو

هانَ جڪي ني او بند ڪري، اُوئي ني ڪو پي ڪولي ڪونهي شگهتو-

15 جي ايشور مي ني برشاوي، تو ڏڪال پڙي هي

هانَ جي گهڻو مي برشاوي، تو ڌرتي تي بوڏ آوي هي-

16 ڏاهپ هانَ قدرت ايشور ڪڍي هي-

نگي ڪرڻ آڻو هانَ نڱيجڻ آڻو، پئي اُوئي ري هات ۾ هي-

17 او وزيرون شون اُونون رو اِختيار پاچو لي هي

هان اَگووئون ري شمجھ پي لي هي۔

18 او بادشاهون ري بادشاهي كوشي،

اُونون ني غُلم ناوي هي۔

19 او پوجاريون شون اُونون رو اِختيار كوشي لي هي

هان طاقت آتون ني هراوي هي۔

20 او پروسِي آلي منكون رو مونءو بند كري هي،

او ذوكرون ري ذاهپ كوشي لي هي۔

21 او اِختيار آتون ني خوار كري هي

هان طاقت آتون ني كمزور كري هي۔

22 او انداري ۾ لِكِيوڙا پيد پءرا كري هي

هان گهور اندارو، اُجائي ۾ بدلاوي هي۔

23 او قومون ني بدائي، پڙي متاوي هي۔

او قومون پيڙي كري، پڙي ڌار ڌار كري هي۔

24 او جگت ري اَگووئون ري عقل كوشي،

اُونون ني اهڙي رڻ پت ۾ رلاوي هي،

جيٽ ڪو پي مارگ ڪونهي لادتو۔

25 او اُجائي بنا، انداري ۾ ايئون رلنا ري هي،

جون نشي آتو اينا اونا ڪرتو ري هي۔“

<sup>1</sup> پچي اُيُوب ڪهيو ڪم

# 13

”جوئو، مهِي آي شجو ڪئين آپري اونڪيون ڏينو

هان آپري ڪونون سُنيو هان شجو ڪئين شمجھو هي۔

<sup>2</sup> جڪو ڪئين ٿي جوئو هوم، او هون پي جوئون هوم،

ڪي ٿي مهي شون وڌيڪ سمجهدار هو؟

<sup>3</sup> مهاري مرضي هي ڪم

هُون قُدرت آئي ايشور شون بات ڪرون

هان اُوي شون بحث ڪرون.

<sup>4</sup> پڻ ٿي تو ڪوڙي باتون ڪرڻ آلا

هان شجائي بيڪار ڊاڪٽر جهڙا هو.

<sup>5</sup> پلو هتو ٿي ماڻ رونت

هان اُيچ ٿوري ڏاهپ هوونت.

<sup>6</sup> همي هون آپري باتون ثبوت شون ڪونه هون

هان هون جڪو ڪونه اُوي تي ذهيون لگائو.

<sup>7</sup> ڪي ٿي ايشور ري حق ۾ ڪوڙي باتون ڪرشو

هان اُوي ري باري ۾ شاج ڪونهي بولو؟

<sup>8</sup> ڪي ٿي ايشور رو پاسو ليشو

هان اُوي ري شارو ڪيس پڙهشو؟

<sup>9</sup> جي ايشور ٿوني پرڪي،

تو ڪي ٿي اُوي ني دوکو ڏي شگهو هوم

جون انسون ني ڏيئو هو؟

<sup>10</sup> جي ٿي لڪي اُوي رو پاسو ليشوم

تو او ٿوني ضرور چينپشي.

<sup>11</sup> ڪي ٿوني اُوي ري قُدرت رو بي ڪونهي هووي

هان اُوي ري طاقت رو بي ڪونهي لاگي؟

<sup>12</sup> پچي ٿونرا آي ڪيٽوئا بيڪار هي

هان ٿونرا ثبوت مٿي ۾ ملي جاشي.

13 ٿي ماٺ ڪرو، مهڻي ٻولڻ ڏيئو.

پڇي مهڻي شون جڪو پي هوسڻي، او ڏينو جاشي.

14 هُون خطرون ۾ جاوڻ ري شارو تيار هون،

مهڻي آڀري جان ري ڪو پي پرواه ڪونهي.

15 پلي ايشور مهڻي ماري چوڙي،

تو پي مهاري اُميد اُوڻي ۾ هي.

همي هُون اُوڻي آگهي آڀري حق ۾ بولين.

16 ايئي نموني هُون بچي جائين،

ڪيونڪه جڪو ايشور ني ڪونهي منٿا،

او اُوڻي آگهي جائي ڪونهي شگهتا.

17 مهاري باتون ذهيون ڏي سُٽو،

هُون جڪو ڪونه اُوڻي تي ذهيون لگائو.

18 جوئو، مهڻي آڀري ڪيس تي ذهيون لگايو هي

هان مهڻي خبر هي ڪه هُون ڏوهي ڪونهي.

19 جي ڪُن مهڻي ڏوهي ثابت ڪري،

تو هُون مرڻ توڻي ماٺ هوڻي جائين.

اُيُوب ري پراٽنا

20 پڇي اُيُوب ڪهيو ڪه،

”اي ايشور، تُو مهاري بي منٿون من،

تو هُون ئي آگهي آئي شگهون.

21 پيلڪي منٿ آي هي ڪه،

تُو مهڻي وڌيڪ سزا ني ڏي.

پڇي منٿ آي هي ڪه،

تارو ٻي مهني پريشون ني ڪري.

22 پڇي تُو مهني اَنا هان هُون تَني بلتي ڏئين،

جون مهني ٻولڻ ڏي هان تُو اِئي ري بلتي ڏي.

23 مهني شون ڪترا پاپ هان ڏوه هويا هي؟

تُو مهارا ڏوه هان مهارا پاپ مهني سُئا.

24 تُو مهني شون ڪيئون ريشاجوڙو هي؟

تُو مهني آبرو ڏشمن ڪيئون سمجهي هي؟

25 هُون اُڏتي شوڪوڙي پون هان بوه آلي ڪار هون،

تُو مهني ڪيئون پريشون ڪري هي؟

26 تاري مرضي شون مهني تي اي الروم لاڳا،

ڪه هُون آڀري جواني ري پاپون ري سزا ڪئون.

27 تي مهاري پگون ۾ شونڪڙ گهاتي هي.

تُو مهاري هر هيڪ مارگ تي نظر راڳي هي

هان مهاري پگون را نشون پي اولڳي هي.

28 هُون شَڙيوڙي شي جهڙو هون، جڪو ختم هووي هي

هان اهڙي ڳايي آلي ڪار هون، جڪي ني ڪيڙون ڪتريو هووي.

### فاني زندگي

1 پڇي اُيُوب ڪهيو ڪه،

# 14

”انسون جڪو لڳائي شون جنم لي هي،

او توڙي ڏنن رو هي هان ڏڪون شون پريوڙو هي.

2 او گل آلي ڪار ڦوڻي هان ڪومانيجي هي.

او چان آلي ڪار گم هوئي جاوي هي هان هيڪي جگها اُپنو ڪونهي.

3 تُو ڪيئون انسون تي نظر راڳي هي؟

تُو كِيُون مَهَنِي عَدَالَت مِر اُتَاوِي هِي؟

4 كِي كُڻ پَلِيَت شَي شُون،

پَوِيَتَر شَي كَاڊِي شِگَهِي هِي؟

كُو پِي كُونَهِي.

5 اِنَسُون رِي عُمَر رِي حُد رَاكِيوڙِي هِي.

تَنِي خَبَر هِي كِه اُو كِتَرَا ڏَن جِيَتُو رِيَشِي،

تِي اُوڻِي رِي عُمَر رِي حُد رَاكِي هِي،

جِڪِي نِي اِنَسُون بَدَاڻِي كُونَهِي شِگَهَتُو.

6 تُو اُوڻِي شُون آڀَرِي نَظَر پَرَهِي كَر،

كِه اُو شُك رُو شَاش لِي شِگَهِي،

جُون مَزُور آڀَرُو كُوم پُورُو كَرِي،

پَچِي اُو آروم كَرِي هِي.

7 جِي بَڻ بَاڊِيُو جَاوِي،

تُو اُوڻِي رِي پَڙِي اُگَڻ رِي اُمِيَد هُووِي هِي

هَان اُوڻِي رَا نُونَا گَنوَنج نَكَرِي هِي.

8 بِيَشِڪَم اُوڻِي رِي پَالُون ڌَرَتِي مِر پَرُوڻِي هُوڻِي جَاوِي

هَان اُوڻِي رُو تَر مَتِي مِر گَرِي جَاوِي،

9 تُو پِي جَدِي اُوڻِي نِي تُوڙِيُو پُوڻِي مَلِي هِي،

تُو اُوڻِي شُون نُونَا گَنوَنج نَكَرِي هِي

هَان اُو نُوڻِي بَڻ آڻِي كَار پَڙِي شَاوُو هُووِي هِي.

10 پِي جَدِي اِنَسُون رُو شَاش نَكَرِي جَاوِي هِي،

تُو اُو مَرِي جَاوِي هِي

هَان اُوڻِي رِي طَاقت خَتَم هُوڻِي جَاوِي هِي،

پڇي او پڙي جيتو ڪونهي هونو.

11 جهڙي نموني ندي رو پوڻي شوڪي

هان دريا رو پوڻي گهت هوڻي ختم هوڻي هي،

12 ايڻوج انسون مرڻ شون پڇي،

پڙي جيتو ڪونهي هونو.

جتري توڻي آڪاش ريشي،

انسون نڪو جاگي هان نڪو اوڻي ني جگايو جاوي.

13 سُنو هوونت ڪه تُو مهني پتال ۾ لڪائي چوڙنت

هان جتري توڻي ٿاري ريش گهت ني هوونت،

اوڻي تيم توڻي تُو مهني لڪائي راکونت

هان پڇي تيم اوڻ تي مهني ياد ڪرونٽ.

14 جي انسون مري پڙي جيتو هوونت،

تو هون آپري تڪليفون برداش ڪرتو رونت،

جتري توڻي تُو مهني ني چوڙنت.

15 پڇي تُو مهني ڀڪارونٽ هان هون ٿني بلتي ڏينونٽ

هان تُو مهني تي ذهيون ڏينونٽ،

ڪيونڪه ٿي انسون ني آپري هاڻون ناهيو هي.

16 تُو مهاري هر هيڪ مارگ ۾ مهاري سنپال ڪرونٽ

هان مهاري پاپون رو حساب ني ڪرونٽ.

17 تُو مهارا شجائي پاپ معاف ڪرونٽ

هان مهارا شجائي ڏوه ڍڪي چوڙنت.

18 جهڙي نموني جبل ڪري ختم هوڻي هي

هان ڏونگر آپري جگها شون گشڪي هي.

19 جون پٽر ماڻي پوڻي ڪرتو ري،

تو او گشي جي هي

هانَ بوڏ متي ني لوڙهي لي جاوي هي،

اُوئيچ نموني تو انسون ري اُميد ختم ڪري هي.

20 تو انسون تي هميشا روب راڪي هي،

ايئي ري ڪري او مري جاوي هي.

تو اُوئي رو روپ بگاڙي اُوئي ني ختم ڪري هي.

21 پڇي بيشڪ اُوئي ري ٻالون ني عزت ملي، جون ڏڪ،

اُوئي ني ڪو پي خبر ڪونهي پڙتي.

22 او رگو آڀري ڏيل رو ڏڪ محسوس ڪري هي

هانَ آڀري شارو ماتم ڪرتو ري هي.

### الفز رو پيجو گهمرو بات ڪرڻ

1 پڇي الفز تيماني اُيُوب ني ڪهيو ڪ،

# 15

2 ”جي تو ڏاهو هوونت، تو صحيح بلتي ڏيئونت

هانَ اجائي باتون ڪري بلتي ڪونهي ڏيئونت،

جون ڪو بي وقوف اجائي باتون ڪري هي.

3 ڪي تني صحيح لاڳي هي،

ڪه تو اجائي هانَ بيڪار باتون ڪري؟

4 تني ايشور رو ڪو پي بي ڪونهي

هانَ تو اُوئي ري پگتي ني، ڪئين ڪونهي سمجهتو؟

5 تاري باتون شون خبر پڙي هي ڪه تو ڏوهي هي،

ڪيونڪه تو نگون آلي ڪار ٻولي پڙيو.

6 تو آڀري باتون ڀر ڏوهي هي.

هُونَ نَامَ يِنِ تَارُو مَوْنَدُو تَارِي خَلَافِ گَوَاهِي دَئِي پُتِيو۔

7 کِي دُنِيَا مِ پِيلِڪُو اِنْسُون تُو جَايو هَتُو؟

کِي تُو جَبَلِ نَهِيَجُ شُونِ پِيلِ جَايو هَتُو؟

8 کِي تُو ايشُوَرِ رَا پِيْدِ جُوڻِي هِي؟

کِي رُگُو تُوچِ هِيڪَ دَاهُو مَنڪَ هِي؟

9 تَنِي اِهڙِي كِي بَاتِ رِي خَبَرِ هِي، جِڪِي رِي مَهُونِي خَبَرِ كُونهي؟

تِي مِ اُو كَهڙِي شَمَجِهَ هِي، جِڪُو مَهُونِ مِ كُونهي؟

10 مَهُونِ مِ آچِي مَائِي آلا هَانِ دُوڪَرَا هِي،

جِڪُو عُمَرِ مِ تَارِي بَابِ شُونِ پِي مَوْتَا هِي۔

11 کِي ايشُوَرِ رِي تَسْلِي تَارِي شَارُو گَهڙِي كُونهي؟

کِي اُو بَاتُونِ جِڪُو تِي شُونِ نَرَمِي شُونِ كِيِي جَاوِي هِي،

اُو گَهَتِ هِي؟

12 تُو آيَرُو جُوَشِ كَابُو مِ كِيئونِ كُونهي رَاڪتُو

هَانِ رِيَشِ مِ تَارِي اَوَنڪِي كِيئونِ رَاتِي هِي؟

13 تُو رِيَشِ مِ ايشُوَرِ رِي خَلَافِ كِيئونِ بُولِي هِي؟

تُو آيَرِي مَوڏِي شُونِ رِيَشِ مِ كِيئونِ بُولِي هِي؟

14 اِنْسُونِ رِي كَهڙِي حِيثِيَتِ،

ڪَ اُو پُوِيَتَرِ هُوڙِي؟

لُگَائِي شُونِ جَايوڙُو اِنْسُونِ، ڪِيڪَرِ نِيڪَ هُوڻِي شِگَهِي هِي؟

15 جُو، ايشُوَرِ آيَرِي فَرِيَشْتُونِ تِي پَرُوَسُو كُونهي ڪَرَتُو،

ڪِيونڪَ اُوڻِي رِي نَظَرِ مِ اُو پِي پُوِيَتَرِ كُونهي۔

16 تُو پِيچِي اُو اِنْسُونِ تِي ڪِيڪَرِ پَرُوَسُو ڪَرَشِي،

جِڪُو بُرُو هَانِ نَفَرَتِ رِي لَائِقِ هِي،

يعني او بُجڙائي ڪرتو ري هي.

17 مهاري بات سُڻم، هُون تني سمجهائون هون.

جڪو مهِي ڏينوم، او تني پي سُڻائون هون.

18 هُون او باتون سُڻائينم،

جڪو مهِي ڏاهون منڪون شون سُڻئي هي

هان اُون آڀري ڀاپ ڏاڏون شون سُڻئي

هان اُون آي باتون لڪائي ڪونهي.

19 ايشور آڀي ڀاپ ڏاڏون ني ريوڻ ري ساڙو ملڪ ڏينو

هان اُون ۾ ڪو پي پرديسي ڪونهي هتو.

20 بُجڙا منڪ جڪو بيچون تي ظلم ڪري هي،

او سڄي زندگي ڏڪ ۾ تڙپتا ري هي

21 هان او پي آلا آواز آڀري ڪونون ۾ سُڻتا ري هي.

جڏي او آروم شون ريتا هوشي،

تو ڏاڙيل اُون تي حملو ڪشي.

22 اُون ني اندازي شون بچڻ ري ڪو پي اُميد ڪونهي،

ڪيونڪه تلوار اُون رو انتظار ڪري پڙي.

23 او آپ رُلنا رُلنا گريجون ري ڪاڌ هوني جاشي،

اُون ني خبر هي ڪه همي موت نيڙي هي.

24 ڏڪ هان مُصيبت اُون ني ايئون پيڙي هي،

جهڙو ڪو بادشاهه حملو ڪري پيڙي هي.

25 آي سڄو ڪئين ايڙي ري ڪري هويوم،

ڪيونڪه او ايشور ري خلاف هويا

هان قدرت آي ايشور آگهي ٻڌائو ڪيو.

26 او ضدي مِنك آئي كار آڀري موتي هان مضبوط ڍال ڪئي،

ايشور شون مُقابلو ڪري هي.

27 خوشحالي ري ڪري اُون رِي موڏي

هان ڏيل تي شار چڙهيوڙي هي.

28 تو پي او ويرون شهرن ۾ ريشي،

هاوي، اهڙي ويرون گهرون ۾،

جڪو ڪري برباد هوڻ آلا هئا.

29 او امير ڪونهي ري،

اُون ري ملڪيت هميشا ڪونهي ري

هان نڪو ڌرتي تي اُون ري ملڪيت ٻڌي.

30 او موت ري موڏي شون ڪڏي پي ڪونهي نڪري،

باشڏي اُون را گئونچ ٻائي چوڙشي

هان ايشور اُون ني هيڪي ڦوڪ شون ٻائي راک ڪرشي.

31 او ڪوڙ تي ڀروسو ڪري آڀني دوکو ني ڏي،

ڪيونڪه ڪوڙ اُون رو اجر هوشي.

32 تيم شون پيل اُون را گئونچ سُوڪي جاشي

هان اُون ري ٽائي ڪڏي پي ساوي ڪونهي هووي.

33 او انگور ري اُوئي بيل آئي كار هوشي،

جڪي رو ڦل پڪڻ شون پيل ڪري هي

هان زيتون ري اُوئي ٻن آئي ڪار، جڪي را گل ڪري هي.

34 جڪو مِنڪ ايشور ني ڪونهي مننام،

اُون را ڪڏي پي اولاد ڪونهي هووي

هان رشوت ليون آتون را گهر باشڏي شون ٻلي راک هوئي جاشي.

35 او شرارت شون پريجوڙا ري هي

هان بچڙائي ني جنم ذي هي،

اوتون را من هميشا دوکي شون پريجوڙا هووي هي۔“

اُيُوب رو اليغز ني بلتي ڏيوڻ

1 ايئي تي اُيُوب كهيو ڪم،

# 16

2 ”مهني اهڙي تموم گهڻي باتون سُڻي هي،

جڪي شون مهني تسلي نام پڻ ڏک ملي هي۔

3 ڪي تو اجائي باتون ڪڙ بند ڪونهي ڪري؟

اهڙي ڪئي بات هي، جڪو ٿي بولڻ تي مجبور ڪري هي؟

4 جي هون ٿوري جگها تي هوونت،

تو هون پي آڀرو ماڻو لوڏي لوڏي،

ٿوري خلاف بولي شگهونت۔

5 پڻ هون ايئون ڪونهي ڪرونت،

پڻ مهاري باتون شون ٿوني تسلي ملونت

هان ٿورا ڏک گهت هوونت۔

6 پڻ جڏي هون بولون هون، تو مهني تسلي ڪونهي ملتي

هان جي ماڻ رون، تو مهني آروم ڪونهي ملنو۔

7 اي ايشور، ٿي مهني ڏک ڏي ٿڪايو رو

هان مهارو شجو خاندان برباد ڪيو رو۔

8 ٿي مهني تموم گهڻا ڏک ڏينا هي

هان اي بات مهاري خلاف گواه هوئي هي،

ڪيونڪه مهاري ڪمزوري مهاري خلاف گواهي ڏي هي۔

9 ايشور ريش ۾ آئي مهني شون ايئون ڪيو،

جون ڪو جهنگلي جنار آڀري شڪار نِي چيري ڦاڙي هِي  
هانَ جون ڪو منڪ ڪِي تي ڏونت پيشِي هانَ اونڪي ڪاڍي هِي۔

10 منڪ هُل ڪري مهِي تي هاشا ڪري هِي

هانَ مهاري گال تي ٿاپ هڻي، مهاري بي عزتي ڪري هِي،

او سڃاڻي مهاري خلاف ڀڙا هويا هِي۔

11 ايشور مهني ظلميون ري حوالي ڪيو هِي

هانَ اُوئي مهني بچڙي منڪون ري هائون ۾ ڏينو هِي۔

12 مهاري زندگي شڪ ۾ بيتي پڙي،

ايشور مهني ڇپليو

هانَ مهني ڪونڌي شون جهالي چڪنا چور ڪري چوڙيو،

اُوئي ڏڪ ڏيوڻ ري ساڙو مهني نيشونون ناهيو هِي۔

13 اُوئي ري تير هلاوڻ آئون مهني چارئي پاشي گهريو هِي۔

ايشور مهني تي دايا ڪونهي ڪي،

اُوئي تير شون مهارا گڙدا چيري چوڙيا

هانَ مهارو لوئي ڌرتي تي بيوڻ لاگو۔

14 اُوئي مهني گهڙي زخمي ڪري ڪمزور ڪيو هِي،

او هيڪي پهلوون آلي ڪار مهني تي حملو ڪري هِي۔

15 مهني ڪئي نِي آڀرا گاپا ناهيا هِي

هانَ مهارو شجو مونَ مرتبو راک ۾ مليو هِي۔

16 روئي روئي مهارو مونڌو شوجو رو

هانَ مهاري اونڪيون تي اندارو آيو هِي۔

17 بيشڪم مهاري هائون ڪو پي پاپ ڪونهي هيو

هانَ هون صاف من شون پرائنا ڪرون هون۔

18 اي ڌرتي، مهارو لوئي ني لڪا

هانَ انصاف ري شارو مهني پڪارڻ ڏي.

19 جو، مهارو گواه آجون توڻي آڪاش تي هي،

مهاري گواهي ڏيوڻ آڻو ماڻي آڪاش تي هي.

20 مهارا دوست مهني تي هاشي هي،

پڻ هون روئي روئي مدد ري شارو ايشور ني پڪارون هون.

21 سَنو هوونت ڪه ڪو ايشور آگهي مهاري بات ڪرونت،

جون انسون آپري دوست ري حق ۾ بات ڪري هي.

22 مهاري زندگي را ڏن پورا هوڻن آلا هي

هانَ پيچي هون اوئي مارگ ڏيما جائين،

جيٽ شون ڪو پي پاچو ڪونهي آونو.

1 مهارو شاش ٻڙي ۾ اٽڪيوڙو هي،

# 17

مهاري زندگي را ڏن گهتايو گيا هي

هانَ مڪوم مهاري انتظار ۾ هي.

2 بيشڪ، شجائي مهني تي هاشي هي.

هون اوئون ري شرارت جوتو رون هون.

اُيُوب رو ايشور ني پڪارڻ

پيچي اُيُوب ڪهيو ڪه، 3 ”اي ايشور، تُو مهارو ذومن هو،

ڪيونڪه تِي بنا، بيجو ڪو پي ذومن ڪونهي.

4 تِي مهاري دوستون ري سمجه ختم ڪي هي،

ايئي ري ڪري تُو اوئون ني باتون ۾ جيٽن ڪونهي ڏي.

5 هيڪ ڪيتوڻو هي ڪه،

جڪو آپري دوستون ري خلاف ڪوڙي گواهي ڏي هي،

اُوي را بال اوندآ هوئي جاشي-‘

پڻ او آپري دوستون ري دعوت ڪري هي-

6 اي ايشورم

هُون منڪون ري شارو هيڪ ڪنو مثال هويو هون-

منڪ مهني ڏيڪي، مهاري موڏي تي ٽوڪي هي-

7 ڏڪون ري ڪري مهاري نظر گهٽ هوئي ري

هان مهاري ڏيل ري رگو هاڏڪي بچي هي-

8 آي جوئي نيڪ منڪ حيرون هي هان شوچي هي ڪم

مهني ايشور ري خلاف ڪو پاپ ڪيو هي-

9 تو پي نيڪ منڪ آپري ساچ تي پڪو ريشي

هان جڪي ري هاڻون ڪو پي پاپ ڪونهي هويو،

او مضبوط هوتو جاشي-

10 جي ٿي شجائي پڙي مهني شون بات ڪرشم

تو پي مهني ٿون ۾ هيڪ پي ڏاهو ڪونهي لاڏي-

11 مهاري زندگي را ڏن پورا هويا را

هان مهاري خواهشون هان من ري اميدون،

آي شجائي راک ۾ مليا را-

12 مهارا دوست رات ني ڏن ڪي هي

هان ڪي هي ڪم، ’اُجالو نيڙو هي‘

پڻ مهني خبر هي ڪم هون انداري ۾ هون-

13 جي هون آي اميد راکون ڪم پتال مهارو گهر هوشي

هان انداري ۾ آيو بچوڻو بچائي،

14 مُڪوم ني ڪونه ڪم، ’تو مهارو پتا هي-‘

ڪيڙي نِي ڪونه ڪم، ’تُو مهاري ما هانَ ٻين هيءَ‘

15 تو پڇي آي ڪهڙي اُميد هوشي؟

هانَ مهاري اُميد ڪُن جوشي؟

16 پتال ۾ جاوڻ شون پڇي،

هُون هانَ مهاري اُميد متي ۾ ملي جاشون۔“

بلد ري پڙي بات ڪرڻ

1 پڇي بلد سوخي ڪهيو ڪم

# 18

2 ”اي اُيُوب، تُو ڪتري توڻي ٻولتو رئي؟

شمجهدار هو هانَ مهوري بات سُڻ۔

3 تُو مهوني جنارون آلي ڪار،

بي عقل ڪيئون شمجهي هي؟

مهني ٿاري نظر ۾ شمجهدار ڪيئون ڪونهي؟

4 تُو ريش ۾ آڀرو نقصون ڪيئون ڪري هي؟

ڪي ٿاري ريش ڪرڻ شون بني ويرون هوي جاشي؟

ڪي جبل آڀري جگها شون هتي جاشي؟

5 بيشڪم، ٻُڇڙي منڪون ري زندگي متي جاشي

هانَ اُوئون ري زندگي ختم هوي جاشي۔

6 ٻُڇڙون ري گهرون ۾ اندارو ئي اندارو هوشي

هانَ اُوئون ري زندگي رو ڏيڻو ٻُجهي جاشي۔

7 اُوئون ري بيوڻ ري طاقت ختم هوي جاشي

هانَ او آڀري رٿائون ري ڪري متي جاشي۔

8 او آڀري ٻُڇاڙي جال ۾ قاشي جاشي

هانَ آڀري ڪوتريوڙي ڪڏ ۾ ڪرشي،

9 اُونون را پڳ آپري قاشي ۾ قاشي جاشي.

10 اُونون ني جهالڻ ري شارو ڌرتي ۾ رنڊوڙي رو جال پڇاڙو هي،

اُونون ري مارگ ۾ ڪڙڪي لڳايوڙي هي.

11 پي ڏيوڻ آلي شيون اُونون ني چوڌاري بيناڙشي

هان اُونون رو لارو ڪونهي چوڙي.

12 بُوڪ ري ڪري او ڪمزور هوئي جاشي

هان او هر نيم مُصيبَت ۾ پڙيا ريشي.

13 اُونون ري شَرير ري چوڙي بيماري ري ڪري گڙي جاشي

هان ڪني بيماري اُونون ري شَرير ني کائي جاشي.

14 او آپري گهرون تي ڀروسو راکي هي،

پڻ او آپري گهرون شون ڪاڍيا جاشي

هان او موت ري بادشاه ري حوالي ڪيئا جاشي.

15 اُونون ري گهرون ماڻي باشڌي

هان گندرف برشائي جاشي.

16 او اهڙي بڻ جهڙا هوشي،

جڪي ري پائون گڙي جاوي هي

هان ٽالي شوڪي جاوي هي.

17 او ڌرتي شون ختم ڪيئا جاشي

هان اُونون رو ڪيٽ پي نون نِشون ڪونهي بچي.

18 اُونون ني اُجائي شون ڪاڍي،

پتال ري انداري ۾ نوڪيا جاشي

هان ڌرتي شون اُونون رو نون نِشون مٽايو جاشي.

19 اُونون ري قوم شون اُونون ري نسل ختم هوئي جاشي

هانَ جيتَ او ريتام اوتَ كو پيَ كونهيَ بچيَ-

20 اُونونَ رو حالَ جوئيَ آتوئيَ آلا گهبراشيَ

هانَ اُوگوئيَ آلا بيئاجشيَ-

21 ييشڪمَ بچيَ مينڪونَ رو حالَ اهتوجَ هوويَ هيَ

هانَ جڪو ايشورَ نيَ منتاَ كونهيَ،

اُونونَ شونَ ايئوجَ هوويَ هيَ-“

اُيُوبَ رو پلددَ نيَ بلتيَ ڏيوڻَ

1 پچيَ اُيُوبَ ڪهيو ڪمَ

# 19

2 ”تي ڪتريَ توڻيَ مهنيَ ڏڪَ ڏيئا ريشو

هانَ آپريَ باتونَ شونَ مهنيَ پريشونَ ڪرتا ريشو؟

3 تي گهڙيَ گهڙيَ الزومَ لگائيَ مهنيَ پريشونَ ڪرو هو،

تونِي شرمَ ڪونهيَ آوتي؟

4 جي مهنيَ شونَ ڪو غلطيَ هوئيَ هيَ،

تو ايئيَ ۾ تونرو ڪهڙو نقصونَ-

5 تي هرَ باتَ ۾ آپنيَ مهنيَ شونَ موتاَ شمعجو هو

هانَ شمعجو هو ڪه جڪو ڏڪَ مهنيَ تي آيا هيَ،

او مهاريَ پاپَ رو ٿوتَ هيَ-

6 پڻَ آيَ باتَ ڪونهيَ، پڻَ ايشورَ آپَ مهنيَ ڏڪَ ڏينو

هانَ آپريَ جالَ ۾ گهيريَ هيَ-

7 جوئو، هُونَ رڙيَ ڪرونَ پڙيو

ڪه مهنيَ تي ظلمَ هوويَ پڙيو،

پڻَ ڪو پيَ مهاريَ سُنتو ڪونهيَ-

هُونَ مددَ ريَ شارو پُڪارونَ هونَ،

پڻ مهني انصاف ڪونهي ملڻو.

8 ايشور، مهارا مارگ بند ڪيڻا رام،

ڪه هون لنگهي ني شگهون،

اُوئي مهاري مارگ ۾ اندارو ڪيڻو هي.

9 اُوئي مهارو مون مرتبو مهني شون ليئو هي

هان مهاري مائي آڻو تاج اُتاريو هي.

10 اُوئي مهني چارئي پاشي برباد ڪيڻو هي،

هون پوري نموني برباد هويو هون.

اُوئي مهاري اُميد ايئون ختم ڪي،

جون ٻڻ پالون شون اُڪوڙي هي.

11 او مهني آڀرو دشمن سمجهي هي

هان اُوئي رو ڪهر مهاري خلاف پڙڪيو هي.

12 اُوئي را فوجي مهني تي حملو ڪرڻ ري شارو پيڙا هويا هي

هان مهاري تنبو ري چوڌاري ڦري آيا هي.

13 اُوئي مهارا پائي مهني شون الگا ڪيڻا هي

هان مهاري اولڪوڻ آلا پي مهني اولڪنا ڪونهي.

14 مهارا عزيز مهني چوڙي گيا را

هان مهاري نيڙڪي دوستون پي مهني بونتريو رو.

15 مهارا ميموڻ هان مهاري بونهي،

مهني ڌاريو سمجهي هي،

هون اوئون ري نظر ۾ پرديسي هون.

16 جڏي هون آڀري نوڪر ني هيلو ڪرون هون،

تو او مهني ڪو پي بلتي ڪونهي ڏيتو.

هُون اُوئي نِي مِنتون پِي ڪرون،

تو پِي او مهاري ڪونهي سُنتو.

17 مهاري لُگائي نِي مهاري موڏي شون ڌب آوي هي

هان مهارا پائي مهِي شون نفرت ڪري هي.

18 نِنيا ٻال پِي مهني گهت سمجھي هي

هان او مهني ڏيکي، مهِي تي هاشي هي.

19 مهارا گهاتا دوست پِي مهِي شون نفرت ڪري هي،

جڪون شون هُون پريم ڪرتو، اوج مهاري خلاف هويا هي.

20 مهارو شيرِ تموم گهڻو ڪمزور هويو رو،

مهاري ڏيل تي رُگو ڪال هان هاڏڪي بچي هي

هان هُون مرتو مرتو بچو هون.

21 اي مهاري دوستون، مهارو ڪياس ڪرو، مهارو ڪياس ڪرو،

ڪيونڪ ايشور رو هات مهاري خلاف هويو هي.

22 ٿي ڪيون ايشور آلي ڪار مهني ڏڪ ڏينو هو

هان ڪتري توڻي مهِي تي حملا ڪرتا ريشو؟

23 پلو هوونت ڪه مهاري باتون ڪتاب ۾ لڪني جائونت،

هان آي باتون پڪي هوئي جائونت.

24 پلو هوونت ڪه آي باتون لوه ري چيرڻي

هان هتوڙي شون هميشا ري شارو پتر مائي لڪني جائونت.

25 پڻ مهني خبر هي ڪه مهارو چوڙاڻو آڻو جيتو هي

هان او مهاري مدد ري شارو ضرور آشي.

26 جي مهاري شيرِ شون ڪال اتاري جاوي،

تو پِي هُون ايشور نِي ڏيکين.

27 هاوي، هُون ايشور نِي ذِڪِين،

ڪو پيجو نام

پڻ هُون آپري اونڪيون شون اُوئي نِي جوئين،

مهارو من اُوئي پل ري شارو تَرِي هِي.

28 جي تي ڪو هو ڪ، ’مهِي اُوئي نِي ذُڪ ذِشون‘

هان او منشي ڪه شجي مسئلي رو ذميوار او آپ هِي.

29 تو تي ايشور ري سزا شون پيلاجوم

ڪيونڪه ايشور رو ڪهر ايئي رو بدلو ليشي

هان تي شمجهي جائو ڪه انصاف هوشي.

ضوفر رو پيجو گهمرو بات ڪرڻ

1 پچي ضوفر نعماتي بلتي ذيني ڪه،

# 20

2 ”تاري باتون مهني پريشون ڪيو هِي،

ايئي ري ڪري هُون ايئي باتون ري ضرور بلتي ذين.

3 مهِي تاري باتون شئي هِي،

جڪي شون مهاري بي عزتي هوئي هِي،

پڻ مهاري ذاهپ مهني بلتي ذيوڻ ري شارو مجبور ڪري هِي.

4 ڪي تني پروئي زموني ري ايئي بات ري خبر ڪونهي،

ڪه جدي شون انسون زمين تي راکيوڙو هِي،

5 اُوئي تيم شون بچري منڪون ري جيت توڙي ذنون ري هِي

هان جڪو ايشور نِي ڪونهي مننام

اُونون ري خوشي توڙي دير ري هووي هِي.

6 بيشڪ، اُونون رو قد آڪاش توڙي پڳي

هان اُونون رو ماڻو جائي باڏئون نِي لاڳي،

7 تو پي او ڪن آلي ڪار هميشا ري شارو برباد هوئي جاشي.

پچي جڪون اُونون ني پيل ڏينا هتا.

او ڪشي ڪم، ’هَمي او ڪيٽ هي؟‘

8 او شپني آلي ڪار هوشي

هان پچي ڏيڪيجڻ ۾ ڪونهي آوي،

منڪ اُونون ني رات ري شپني آلي ڪار پونتري جاشي.

9 جڪون پي اُونون ني ڏينا،

او پڙي اُونون ني ڪڏي پي ڪونهي ڏيڪي

هان اُونون را گهر آلام اُونون ني پڙي ڪڏي پي ڪونهي ڏيڪي.

10 جڪو ڏن پُونڏي منڪون پيڙو ڪيو هوشي،

او شجوني غريبون ني پاچو ڏيوڻو پڙشي

هان اُونون را اولاد غريبون شون پَنشي.

11 اُونون رو سَرير طاقت آڻو هي،

پڻ تو پي او راک ۾ ملي جاشي.

12 بِيڙون ني بِيڙائي ايئون پسند هي،

جهڙي ڪيني منوڻ.

13 اُونون ني منوڻ اُترِي توڙي ميني لاڳي هي،

جتري توڙي اُونون ري موڏي ۾ ري هي.

14 پڻ جڏي او موڏي شون بيت ۾ جاوي هي،

تو ناگ ري زهر آلي ڪار هوئي جاوي هي.

15 جڪو ڏن اُوئي نڳي شون پيڙو ڪيو هي،

او اُوئي ني هضم ڪونهي هووي

هان ايشور او ڏن اُوئي شون لي چوڙشي.

16 جڪي نِي او منوڻ سمجھي چُوشي پڙيو،

حقيقت ۾ او ناگ رو زهر هِي،

جڪي شون او مري جاشي۔

17 بچڙا منڪ، او دريا هانَ نَدِي ڪونهي ڏيکي،

جڪون ۾ ڏوڏ هانَ ماڪي نِي هِي۔

18 جڪي شيون رِي شارو اُوئي تموم گهڻي محنت ڪي هِي،

او اُوئي نِي هضم ڪونهي هووي،

اُوئي نِي او شجو ڪئين پاڇو ڪرڻو هِي۔

جڪو ڏن اُوئي آڀري ڪاروبار شون ڪمايو هِي،

اُوئي شون اُوئي نِي ڪو پي خُوشي ڪونهي ملي۔

19 ڪيونڪه اُوئي غريبن تي تموم گهڻو ظلم ڪيئو،

اُونون رو خيال ڪونهي راڪيو

هانَ اُوئي بيچون رِي گهرون تي زوري قبضو ڪيئو۔

20 اُوئي نِي لالچ رِي ڪري ڪڏي پي آروم ڪونهي مليو

هانَ اُوئي او شجو ڪئين ڪيئو، جڪو ڪرڻ رو سوچتو۔

21 اهڙي ڪو پي شني ڪونهي رئي،

جڪي تي اُوئي قبضو ني ڪيئو هووي۔

ايئي رِي ڪري او ڪڏي پي خُوشحال ڪونهي رِي۔

22 بيشڪم اُوئي ڪڍي تموم گهڻو ڏن هوشي،

پڻ تو پي اُوئي نِي آروم ڪونهي ملي

هانَ سَجِي آفتون پڙي هوئي اُوئي ماڻي آشي۔

23 جڏي اُوئي رو پيت پريچڻ آڻو هوشي،

تو ايشور اُوئي تي آڀرو ڪهر برشاشي،

هاوي، او مي آلي كار اُوئي تي آيرو كهر برشاشي.

24 جڏي او تلوار ري بي شون ناششي،

تو پيتل رو تير اُوئي ني بيندي چوڙشي.

25 جڏي او تير آيري پُون شون كاڏشي،

تو تير ري چوڪ اُوئي ري كائجي ني چيري باهر نڪرشي

هان اُوئي تي تموم گهڻا ڏڪ آشي.

26 اُوئي را خزونا برباد هوئي جاشي

هان ايشور رو باشدي اُونون ني ٻائي ختم ڪرشي،

اُوئي ري تنبو ۾ جڪو ڪئين بچوڙو هوشي،

او باشدي شون ٻلي راک هوئي جاشي.

27 آڪاش اُوئي را پاپ ظاهر ڪرشي

هان ڌرتي اُوئي ري خلاف گواهي ڏيشي.

28 ٻوڏ شون اُوئي رو گهر لڙهي جاشي

هان ايشور رو ڪهر اُوئي ني برباد ڪري چوڙشي.

29 پُچڙي منڪون رو نتيجو اِيئوج هووي هي.

ايشور آي سزام وراثت ۾ اُوئي ري سارو راکي هي.

اُيُوب ري صوفر ني بلتي

1 پچي اُيُوب بلتي ڏيني ڪ،

2 ”مهني اِيئي بات شون تسلي ملشي،

# 21

جڏي ٿي مهاري بات ڏهين ڏي سُڻشو.

3 مهروني ڪري صبر شون مهاري بات سُڻو.

جڏي مهاري بات پوري هوشي،

تو پچي ٿي مهني تي هاشا ڪريا.

4 هُون ڪي اِنسون شون شڪايت ڪونهي ڪرتوم

ايئي ري ڪري هُون صبر ڪيئون ڪرون؟

5 مهني ڏهيوڻ ڏي جوئوم

تو ٿي تموم گهڻا حيرون هوئي ماڻ هوشو-

6 جڏي هُون شجو ڪئين ياد ڪرون هونم

تو پي ۾ مهارو شير ڏڪي هي-

7 ٻيڙا منڪ ڪيئون مون تي عمر آلا هووي هي؟

او ڏوڪرا هوئڻ توڻي ڪيئون طاقت آلا هووي هي؟

8 اُونون را اولاد اُونون آگهي بدتا ري هي

هان اُونون ري نسلم

اُونون ري اونڪيون آگهي طاقت آلي هووي هي-

9 اُونون ري گهرون ۾ شڪ هان آروم هي

هان ايشور رو ڪهر اُونون تي ڪونهي پڙتو-

10 اُونون را ڍگا نسل بداوڻ ۾ ناڪام ڪونهي هوتا

هان اُونون ري ڍگي نيم تي بيٺاوي هي

هان اُونون را ڦل ڪڏي پي ڪرتا ڪونهي-

11 ٻيڙي منڪون را ٻال خوشي شون ٻاهر نڪري هي

هان جنارون آلي ڪار ناچتا ڪوڏتا ري هي-

12 او منڪ ڏف ساز هان تندورا بجائي گيت گاوي هي

هان بونشلي ري آواز تي خوش هووي هي-

13 او منڪ خوشحال هووي هي

هان آخر ۾ آروم شون مري هي-

14 او ايشور ني ڪي هي ڪم

’مهون شون بُوئو جام

ڪيونڪه مهونِي تاري مدد ري ضرورت ڪونهي.

15 قُدرت آئو ايشور ڪيو هي،

جڪي ري مهِي پگتي ڪرون؟

هانَ اُوئي شون پراتنا ڪرڻ شون مهورو ڪهڙو فائدو هوشي؟

16 او شمجهي هي ڪه خوشحالي اُونون ري آڀري هات ۾ هي،

پڻ هون اي بات ڪونهي منتو.

17 ڪي بچڙي منڪون ري زندگي، ڪڏي ختم هونِي هي؟

جون اُونون تي ڪڏي ڏک آيا هي؟

ڪي ايشور ڪڏي ريش ۾ آئي، اُونون ني سزا ڏي هي؟

18 ڪي بائرو اُونون ني بوه آئي ڪار

هانَ طوفون اُونون ني پون آئي ڪار، اُڏائي لي گيو هي؟ ڪڏي پي نا.

19 تونرو خيال هي ڪه ايشور اُونون ري پايون ري سزام

اُونون ري اولاد ني ڏيشي،

پڻ هون ڪونه هون ڪم،

اُونون ري پايون ري سزا اُونون ني ملڻ ڪڀي،

ڪه اُونون ني بچڙائي ري نتيجي ري خبر پڙي.

20 قُدرت آئي ايشور رو ڪهر اُونون تي پڙي

هانَ او آڀري بربادي آڀري اونڪيون شون ڏيڪي.

21 ڪيونڪه جڏي او مرشي،

تو اُونون ني ڪيڪر خبر پڙشي،

ڪه اُونون ري اولاد شون ڪي هويو هي؟

22 ڪيو، ايشور ني ڏاهپ ري باتون شيڪاوي؟

ڪيونڪه ايشور آڪاشي مخلوق رو پي انصاف ڪري هي.

23 هيڪ مينڪ آپري سڃي زندگي، طاقت، شڪ

هان آروم شون رئي مري هي.

24 اُوئي رو شرير شاجو سُورو هان هاڏڪي مضبوط هووي هي

25 هان هيڪ مينڪ بيماري ري ڪري مري جاوي هي

هان اُوئي ني ڪڏي پي شڪ ڪونهي ملتو.

26 پڻ مرڻ شون پڇي، او پيئي متي ۾ ملي هي

هان ڪيڙا مڪوڙا اُونون ني ڪاوي هي.

27 جوئو، مهني ٿونري شوچ ري خبر هي

هان اُوئي رٿائون ري پي خبر هي،

جڪو تون مهاري خلاف ڪيئي هي.

28 ٿي ڪو هو ڪم، همي امير مينڪ رو گهر هان او تنبو ڪيئا گيا،

جڪي ۾ بچڙا مينڪ ريتا؟

29 ٿي ڪڏي ڪي پرديسي شون پوچو،

تو او ٿوني سُٿاشي ڪم،

30 ڪهر آئي ڏن بچڙو مينڪ چوڙيو جاوي هي

هان ڏڪون ۾ اُوئي رو ڪو پي نقصون ڪونهي هوتو.

31 ڪو پي اُوئي ري موڏي تي اُوئي ني ڏوهي ڪونهي ڪيتو

هان اُوئي ري خراب ڪومون ري سزا ڪونهي ڏيتو.

32 تو پي اُوئي ني مڪوم ۾ ٻوري هي

هان اُوئي مڪوم ري سنپال ڪي جاوي هي.

33 اُوئي ري لاش تي تموم گهڻا مينڪ آوي هي

هان اُوئي ني مڪوم ري نرم متي شون ٻوري هي.

34 ٿي مهڻي اجائي باتون شون تسلي ني ڏيئو،

هُن تونري باتون ۾ ڪو پي شاچ ڪونهي ڏيڪنو۔“

اليفز رو تيجو گهمرو بات ڪرڻ

1 پڇي اليفز تيماني بلتي ڏيني ڪم

# 22

2 ”ڪي ڪو انسون ايشور ني فاندو ڏي شگهي هي؟

جي ڪن عقل آڻو پي هي، تو ايني ۾ رگو اوني رو آبرو فاندو هي۔

3 جي تو نيڪ هي هان آبري شجي زندگي شاچ شون بوئو هي،

تو ايني ۾ قدرت آڻي ايشور رو ڪهڙو فاندو؟

4 ڪي ٿني ايني ري ڪري سزا ملي هي

ڪه تو ايشور شون وفادار هي؟

5 ڪڏي پي نام

ٿي ضرور تموم گهڻا بچڙا ڪوم ڪيئا هي،

جون ڪو موتو پاپ ڪيئو هي۔

6 جڏي ٿي آبري پائي ني قرض ڏينو،

تو ٿي اوني ري آڏوڻي راڪيوڙي شيون تي قبضو ڪيئو

هان اوني را پيروڙا گاڀا پي ڪوشي ليئا۔

7 ٿي ترشي ني پوڻي ڪونهي پيٽاڙيو

هان ڪي بُوڪي ني بائي ڪونهي ڪلائي۔

8 ٿي آبري طاقت شون بني تي قبضو ڪيئو

هان هيڪي عزت آڻي منڪ آڻي ڪار اوڻ رهيو۔

9 ٿي رونڊپير ري مدد ڪونهي ڪي

هان يتيمون تي تموم گهڻو ظلم ڪيئو۔

10 ايني ري ڪري ٿاري چوڌاري ڏک ئي ڏک هي

هانَ تُو اوجتو بيئاجي هَي.

11 هاوي، اُئيچ كارڻ هَي،

ڪه تِي مائي اِترو انذارو آيو هَي

ڪه تُو ذِيڪي ڪونهي سگهتو.

تُو بوڏَ ري پوڻي ۾ بُوڏوڙو هَي.

12 جوم ايشور جڪو تارون شون پي مائي هَي،

او آڪاش ري هر هيڪ شئي تي نظر راڪي هَي.

13 پچي تُو ڪيئون ڪي هَي ڪم، 'ايشور ڪئين ڪونهي جوڻو

هانَ او ڪائي باڏئون ۾ ڪيڪر انصاف ڪري سگهي هَي؟

14 او تو گهائي باڏئون ۾ لڪيڙو ري هَي،

ايئي ري ڪري جڏي او آڪاش مائي بي هَي،

تو اُوئي ني ڪئين نظر ڪونهي اوتو.

15 ڪي تُو اُوئي پروڻي مارگ تي بيتو رهي،

جڪي تي بچڙا منڪ بيتا؟

16 او منڪ آڀري تيم شون پيل ماريجام

جهڙي نموني بوڏَ گهرون را بُنياد لوڙهي لي جاوي هَي.

17 او منڪ ايشور ني ڪيتا ڪم، 'مهون شون بُوڻو جا.'

هانَ آي پي ڪيتا ڪم

'قدرت آتو ايشور مهوري ڪي ڪرشي؟'

18 پچي پي ايشور اُوئون ري گهرون ني،

شئي شئي شيون شون پري هَي،

پڻ هون بچڙي منڪون ري رڻا شون الگو رون هون.

19 بچڙي منڪون ري بربادي جوئي،

نيڪ مينڪ خُوش هووِي هِي

هانَ بي ذوهي اُونون تي هاشي ڪِي هِي ڪم

20 'جوئو، آڀڻا دُشمن ختمه هويا را

هانَ اُونون ري ملڪيت نِي باشڏي ٻائي راک ڪِي هِي۔'

21 اي اُيُوب، تُو ايشورَ ري چرئون ۾ آم

هانَ اُوئي شون منيج،

تو تُو خُوشحال هوئي جائي۔

22 هُون تَنِي منڪ ڪرون هون ڪم

تُو ايشورَ ري حُڪمون تي نِي

هانَ اُوئي ري باتون آڀري من ۾ راک۔

23 جي تُو قُدرت آئي ايشورَ ڪيڍي پاڇو آوي

هانَ بُوڇڙائي آڀري گهر شون ڪاڏي،

تو او تَنِي پڙي خُوشحال ڪرشي۔

24 جي تُو آڀرو خزونو مِتي ۾

هانَ اوفير علائقي آئو شونو،

نڍي ري پٿرون ۾ نوڪي،

25 تو قُدرت آئو ايشورَ تاري شاروم

شونِي هانَ چونڊي رو خزونو هوشي۔

26 پڇي تُو قُدرت آئي ايشورَ ۾ خُوش رئي

هانَ تُو ڪڏي پي ايشورَ آگهي سرماوي ڪونهي۔

27 پڇي جڏي تُو ايشورَ شون پرائنا ڪري،

تو او تاري سُٺشي

هانَ تُو آڀري باشيورَ باسون پوري ڪري۔

28 جڪي بات رو تُو ارادو ڪري،

تُو اُوئي ۾ ڪامياب هوئي

هانَ تاري مارگ ۾ هميشا اُجالو ريشي.

29 جڪو منڪ هينا نوڪيوڙا هي،

جي تُو اُونون ري سازو پراتنا ڪري،

تو ايشور اُونون ني بجاشي.

30 ايشور بي ذوهي منڪون ني معاف ڪرشي،

ايئي ري ڪري جي تارا هات پويتر هي،

تو او تئي پي معاف ڪرشي.“

اُيُوب رو پڙي بات ڪرڻ

1 پڇي اُيُوب ڪهيو ڪم.

## 23

2 ”مهني آج پي ايشور شون تموم گهڻي شڪايت هي،

ڪيونڪه اي سزا مهاري برداش شون گهڻي هي.

3 جي مهني خبر پڙي ڪه ايشور ڪيٽ لادشي،

تو هون اُوئي ري تخت تي جائي ڳون.

4 پڇي هون آبرو ڪيس اُوئي آگهي راکونت

هانَ آڀري باري ۾ گهڻو ڪئين ٻولنت.

5 جڏي او بڻي ڏيئونت،

تو مهني اُوئي ري باتون ري خبر پڙونت

هانَ جڪو ڪئين او ڪونت، هون او سمجهونت،

6 ڪي قدرت آلو ايشور مهني شون پڙهونت؟

ڪڏي پي نام پڻ او مهاري بات دهيون ڏي شئونت.

7 پڇي هون ايشور شون بحث ڪرونت،

ڪه هُون شاڄو هون،

اِئي تي ايشور انصاف ڪرنت

هان هُون هميشا ري شارو بي ڏوهي هوئونٽ.

<sup>8</sup> جوئو، جي هُون اُوگُوئي جائون،

تو ايشور اوٽ ڪونهي هوونٽ

هان جي هُون آتُوئي جائون،

تو پي او اوٽ ڪونهي هوونٽ.

<sup>9</sup> جي هُون اُوئي ني اتر ڏيشا جوئون،

تو پي او ڏيڪيجڻ ۾ ڪونهي ائونٽ

هان جي ڏڪڻ ڏيشا جائون،

تو پي اوٽ او ڏيڪيجڻ ۾ ڪونهي ائونٽ.

<sup>10</sup> پڻ ايشور مهارو مارگ جوئي هي

هان جڏي او مهاري جانچ ڪرشي،

تو او مهني نج شوني آلي ڪار ڏيڪشي.

<sup>11</sup> هُون اُوئي ري بتايوئي مارگ تي بيتو رهيو،

هُون نڪو ڪاهي، نڪو شاڄي پاشي بُوئو،

پڻ سڏو بيتو رهيو.

<sup>12</sup> هُون ايشور ري حُڪمون تي بيتو رهيو

هان اُوئي ري باتون آپري ڪاڏي شون پي وڌيڪ سنپالي راڪئي.

<sup>13</sup> ايشور ري رٿائون ڪيو بدلاشي؟

جڪو اُوئي ري مرضي هي، اوج ڪري هي.

<sup>14</sup> ڪيونڪه جڪو ڪئين اُوئي مهاري شارو راکيو هي،

اُوئي ني او ضرور پورو ڪرشي،

اهڙي تموم گهڻي رٿائون اُوي رڙي هات ۾ هي.

15 ايني رڙي ڪري هون اُوي آگهي بيٺاجون هون.

جڏي هون اينون باتون تي شوچون هون،

تو بيٺاجون هون.

16 قُدرت آئي ايشور مهني بي همت ڪيو رو

هان اُوي مهني بيٺاڙيو هي.

17 ايشور مهاري زندگي ۾ گهور اندارو ڪيو هي،

پڻ هون چُپ ڪونهي رهيو.

### اُيُوب رڙي بات

پڇي اُيُوب ڪهيو ڪم

# 24

1 ”قُدرت آيو ايشور عدالت رو تيم ڪيون ڪونهي راکتو؟

ايشور را منڪ بچتون رو نتيجو ڪڏي ڏيڪشي؟

2 بچتا منڪ بني رڙي حد بڏاوي هي

هان بيجون را ڏڻ ڪوشي آڀري ڏڻ ۾ پيڙا ڪري هي.

3 او بيتيمون را گڏا هاڪلي لي جاوي هي

هان رونڊبير را ڍگا اڏوئي راکي هي.

4 او غريبون را حق ڪاوي هي

هان اُونون ني لڪڻ تي مجبور ڪري هي.

5 جوئوم غريب رڻ پت ۾

جهنگلي گڏي آئي ڪار ڪوم ڪري هي

هان سخت محنت ڪري ڪاڏي رڙي تلاش ڪري هي،

ڪيونڪه او رڻ پت ۾

آڀري ٻائون رڙي ساڙو ڪاڏو جووي هي.

6 او بيجون ري بني م پوک پيڙي ڪري هي  
هان بيجڙي منڪون ري انگورون ري باگ م.  
بچوڙا انگور توڙي هي.

7 او سڄي رات بنا گاپا پڙيا ري هي  
هان شي م اوڍڻ ري شارو،  
اُون کي ڪئين ڪونهي هوتو.

8 او جبلون تي پڙڻ آئي مي م پينتا ري هي  
هان پناه ليون ري شارو پٿرون لاري لڪي هي.  
9 بچوڙا منڪ يتيم ٻالڻا،

اُون ري ما ري ڪوڙي شون ڪوئي هي  
هان اُون ني اڏوئي راڪي قرض ڏي هي.  
10 غريب بنا گاپون ري ڦرنا ري هي

هان بُوڪيا رئي شتون را گڏا ڪتتا ري هي.  
11 بچوڙي منڪون ري شارو،  
غريب زيتون رو تيل ڪاڍي هي

هان انگور لتاڙي رس ڪاڍي هي،  
پڻ آپ ترشيا ري هي.

12 شهر ري منڪون را سُڌڪا سُڻجِي پڙيا  
هان زخمي منڪ مدد ري شارو پُڪاري پڙيا،  
پڻ ايشور اُون تي ذهيون ڪونهي لگاتو.

13 بچوڙا منڪ اُجائي ري خلاف هي،  
او اُوني ني ڪونهي اولڪتا  
هان نڪو اُوني م بيون رو سوچتا.

14 خُونِي مَنك شَاكَلِي تَارَهِي اُنِي هِي،

كُه مُحْتَاَج هَاَنَ غَرِيبَ نِي قَتْلَ كَرِي

هَاَنَ اَو رَات رُو چور آلي كار هُوِي هِي.

15 زَنَاكَار رَات رِي اِنْدَارِي رُو اِنْتِظَارَ كَرِي هِي

هَاَنَ نِكْرَتِي بِلَا اَپْرُو مَوْنَدُو دِكِي هِي،

كُه كُو اُوْتِي نِي دِيكِي نِي.

16 اَو رَات رُو اِنْدَارِي مِر گَهْرُون مِر كَات هُتِي هِي،

اَو دَن رُو لِكِي بِيَسِي هِي،

اِيئِي رِي كَرِي اَو اُجَالِي رِي بَارِي مِر كُونَهِي جُوئِنَا.

17 گَهْرُو اِنْدَارُو اُوْتُون رِي شَارُو،

دَن آلي اُجَالِي آلي كار هِي،

كِيونَكُه اِنْدَارِي آلو بِي اُوْتُون رُو دُوسْت هِي.

### ضُوفَر رُو اَپْرِي بَات كَرُت

18 ”بُجْرَا مَنك پُوْئِي رِي گُوگُه آلي كار هُوِي هِي،

اُوْتُون رِي حِصِّي رِي بِنِي تِي لَعْنَتَ هِي،

اِيئِي رِي كَرِي مَزُور،

اُوْتُون رِي اِنگُورُون رِي بَاگَ دِيَمَا كُونَهِي جَاوَتَا.

19 جِهِيَزِي نَمُونِي تَرَكِي هَاَنَ گَهِيِي گَرَمِي شُون،

بَرَف خَتَمَ هُوِي هِي،

اِيئِي نَمُونِي پَتَالِ پِي پَاپِيُون نِي خَتَمَ كَرِي هِي.

20 كِيْرَا مَكُوْرَا اُوْتُون نِي كَائِي جَاشِي

هَاَنَ كُو پِي اُوْتُون نِي يَادَ كُونَهِي كَرِي،

اِتْرِي تُوْئِي كُه اُوْتُون رِي مَا پِي اُوْتُون نِي پُونْتَرِي جَاشِي،

ايئي نمُونِي بُچُڙائي، بَنُ آلي كار باڊِي جاشِي.

21 بُچُڙا مِنڪ بونجڪِي لُگايون تي ظُلم ڪري هِي

هانَ رونڌپيرون شون شُنو سلُوك ڪونهي ڪرتا.

22 قُدرت آئو ايشورِ طاقت آئون نِي برباد ڪري هِي

هانَ جڏي ايشورِ اُونون ري خلاف هووي هِي،

تو اُونون ري جيتي ريوڻ ري اُميد متي جاوي هِي.

23 ايشورِ اُونون نِي آروم ڏي هِي

هانَ او آپني سُڪيا سَمجھي هِي،

پڻ تو پي ايشورِ ري اُونون تي نظر هِي.

24 اُونون نِي ٿوڙي دير ري شارو عزت ملي هِي،

پڻ پڇي او پيجون آلي ڪار برباد هوئي جاوي هِي

هانَ او پوک آلي ڪار باڊيا جاوي هِي.

25 جي ايئون ڪونهي،

تو ڪُڻ آي ثابت ڪرسي ڪه مهاري باتون ڪوڙي هِي.“

بلد رو تيجو گهمرو بات ڪرڻ

1 پڇي بلد سوخي ڪهيو ڪم،

# 25

2 ”ايشورِ شجون شون طاقت آئو هِي،

آيون ني رُگو اُوئي شون پيٺاجڻ ڪبي،

ڪيونڪه اوج آڪاش مائي سُڪ راکي هِي.

3 ڪي ڪُڻ ايشورِ ري فوج ني گڻي شگهي هِي؟

جون ڪُڻ هِي، جڪي تي اُوئي رو اُجالو ڪونهي پڙتو؟

4 تو پڇي ايشورِ ڪيڪر ايشورِ آگهي نيڪ هوئي شگهي هِي؟

جڪو لُگائي شون جايوڙو هِي،

او ڪيڪر پويتر هوئي شگهي هي؟

<sup>5</sup> جو ايشور ري نظر ۾ چندر رو اُجالو ڪئين ڪونهي

هان تارا پي اُوئي ري نظر ۾ پويتر ڪونهي-

<sup>6</sup> تو پڇي انسون ڪي هي؟

جڪي ري حيثيت رگو ڪيڙي مڪوڙي جتري هي-“

اُيُوب ري بلدد ني بلتي

<sup>1</sup> پڇي اُيُوب ڪهيو ڪم

# 26

<sup>2</sup>”واهم ٿي هيڪي لاجار منڪ ري سُني مدد ڪي

هان مهِي ڪمزور ني سُنو سهارو ڏينو-

<sup>3</sup> ٿي مهِي بي وقوف ني ڪهڙي سُني صلاح ڏيني هي

هان آپري ڏاهپ ري باتون مهني سُٺائي-

<sup>4</sup> ٿي اهڙي باتون ڪڙ ري سارو ڪي پريو

هان ڪي ٿي بولن ري اهڙي سمجه ڏيني؟“

بلدد ري اُيُوب شون بات

<sup>5</sup> پڇي بلدد اُيُوب ني ڪهيو ڪم

”پنال ۾ مُنوڙون ري آتمائون پي ۾ ڏڪي ري هي-

<sup>6</sup> ايشورم نرگ هان پنال رو تَل جتو ڏيڪي هي-

<sup>7</sup> ايشورم آڪاش ني چارئي پاشي پڪيڙيو

هان ڌرتي، بنا سهارو ڪالي جگها ماڻي راکي-

<sup>8</sup> اُوئي آبرا باڏل پوڻي شون پريام

پڻ او پوڻي ري پار شون ڦاٽا ڪونهي-

<sup>9</sup> او شجي چندر ني ڍڪي هي

هان اُوئي ني باڏئون لاري لڪاوي هي-

10 اُوئي پوٽي ري حد راڪي

هانَ اُجالو انداري شون دار ڪيئو.

11 ايشور ري چٽپ شون آڪاشي تونپا،

بي ۾ ڏڪي هي.

12 ايشور آپري قدرت شون شموندر ني اُپاري هي.

او آپري ڏاهپ شون شموندري مخلوق رهه رام

تُڪڙا تُڪڙا ڪري هي.

13 ايشور آپري قوڪ شون آڪاش ني شينگارو

هانَ آپري هاڻون شون خطرناڪ ناگ ماريو.

14 جو، آي هيڪ ايشور ري عجيب ڪومون رو نينو مثال هي،

آبي رگو اُوئي رو توڙيو ٻولڻ سُئون هون،

پڻ اُوئي رو گرج آڻو قدرت آڻو آواز ڪڻ سمجهي شگهي هي؟“

اُيُوب ري بات

1 اُيُوب پڙي ڪهيو ڪ،

# 27

2 ”جڪي مهني شون بي انصافي ڪي هانَ ڏک ڏينو،

اُوئي جيتي هانَ قدرت آڻي ايشور رو شونش،

3 جتري توڻي هون جيتو هون

هانَ مهني ۾ شاش هي،

4 اُتري توڻي هون ڪڏي پي ڪوڙ ڪونهي ٻولون

هانَ نڪو مهاري موڏي شون ڪو نڪي آڻي بات نڪري.

5 هون تونري باتون رو ڪڏي پي پروسو ڪونهي ڪرون

هانَ مرڻ توڻي شاچ تي پڪو رئين.

6 هون آپري شاچ تي پڪو هون هانَ هميشا رئين،

جَتَرِي تُوڻِي هُون جَبِتو هون،

مهارو من مَهِي تِي الزوم ڪونهي لگاوي۔

7 ايشور ڪري مهاري دُشمنون شون اوج سلُوك هووي،

جڪو بُوڇَڙون شون هوشي

هانَ مهاري خلاف هوڻُڻ آئون رو نتيجو پي اهڙوج هووي۔

8 جڪو ايشور رو انڪار ڪري هي،

اُوڻِي تيم اُوڻون ري ڪهڙي اُميد ريشي،

جڏي ايشور اُوڻون نِي ماري چوڙشي؟

9 جڏي اُوڻون تِي مُصِيبَت آشي،

تو ڪي ايشور اُوڻون ري پُڪار سُڻشي؟

10 ڪي او قُدرت آڻي ايشور ۾ خُوش ريشي

هانَ هر تيم اُوڻِي نِي پُڪارشي؟

11 هَمِي هُون تُوڻِي سُڻائين ڪم،

قُدرت آڻو ايشور ڪترو طاقت آڻو هي؟

هانَ اُوڻِي ري ڪو پي بات ٿون شون لڪائون ڪونهي۔

12 جوڻو، ٿون آپ شجو ڪئين ڏينو هي،

تو پڇي اجائي باتون ڪيئون ڪرو هو؟“

صُوفر رو تيجو گُهمرو بات ڪرڻ

13 پڇي صُوفر اُيُوب نِي ڪهيو ڪم،

”جو، بُوڇَڙِي مِنڪون رو نتيجو ڪهڙو هوشي؟“

ظُلَميون نِي قُدرت آڻي ايشور شون ڪهڙي وراثت ملشي؟

14 بيشڪم اُوڻون را تموم گهڻا اولاد هوشي،

پڻ او شجائي تلوار شون ماريا جاشي

هانَ اُوئون را اولاد بُوكي مرشي-

15 جڪو بچشي، او خراب بيماري شون مري جاشي،

پڻ اُوئون زي رونڊبيرون اُوئون تي ماتم ڪونهي ڪري-

16 بيشڪم، او چوندي را ڍگ لگاوي

هانَ اُوئون ڪيڍي تموم گهڻا گاپا هووي،

17 پڻ اُوئون ري چوندي بي ڏوهي منڪ آيت م بلاشي

هانَ اُوئون را گاپا نيڪ منڪ پيرشي-

18 پڇڙون را گهر،

ڪلاتري آئي جائي آئي ڪار پڪا ڪونهي،

جهڙي نموني چوڪيدار ري چپرڪي هووي هي-

19 او امير آئي ڪار اُونگاجي هي،

پڻ جڏي جاگي هي، تو اُوئون ڪيڍي ڪئين ڪونهي بچتو-

20 اُوئون تي بوڏ آئي ڪار بيناڙڻ آلا ڏڪ آشي

هانَ رات رو طوفون اُوئون ني ڪڪ آئي ڪار اڏائي لي جاشي-

21 اُوگوڙي رو طوفون اُوئون ني اڏائي لي جاشي

هانَ اُوئون ني آيري جگها شون ڪئي الگا نوڪشي-

22 او اُوئي بي رحم طوفون شون بچي ناشن رو شوچشي،

پڻ او اُوئون رو لارو ڪونهي چوڙي-

23 او طوفون اُوئون ني ايئون ڪاڏشي،

جهڙو منڪ ڪيني بي عزتو ڪري گهرون شون ڪاڏي هي-

ڏاهپ هانَ سمجه رو پيد

1 بيشڪم، چوندي ري ڪوئون هووي هي

هانَ هيڪي خاص جگها تي،

شونَ گاڙي نِج ڪريجي هِي۔

<sup>2</sup> لوهَ ڌرتي شون،

هانَ تونبو پٿرون شون ڪاڍي هِي۔

<sup>3</sup> انسُون انڌاري ۾ بڻي،

ڌرتي ري اُونڌي اُونڌي جگهائون تي،

آي شيون تلاش ڪري هِي۔

<sup>4</sup> انسُون آبادي شون الگا سُرنڱ ڪوتري هِي

هانَ جڏي او رنڊوڙيون ري مدد شون،

جائي ڪوم ڪري هِي، تو آوڻ جاوڻ آئون نِي،

اُونون ري ڪو پي خبر ڪونهي پڙتي۔

<sup>5</sup> ڌرتي ماتي پوک اُگي هِي،

پڻ ڌرتي رو مئيلو حصو اينون بدليجي هِي،

جهڙو اُوئي ۾ باشڌي لاڳوڙو هووي۔

<sup>6</sup> ڌرتي هينا نيلم پٿر هِي

هانَ اوڻ شوني را نُڪڙا پي هِي۔

<sup>7</sup> اينون سُرنڱون ري باري ۾،

ڪي پي شڪاري پڪي ني خبر ڪونهي هِي

هانَ نڪو باز ڏيکي شگهتا۔

<sup>8</sup> اينون ري باري ۾،

ڪي خطرناڪ جناار ني ڪو پي خبر ڪونهي

هانَ نڪو بير شينهن اوڻ پگ راکي شگهتو۔

<sup>9</sup> انسُون پکا پٿر پي پونگي هِي

هانَ جبلون را بُنياد پي لوڌي چوڙي هِي۔

10 اِنسون جبلون ۾ سُرنگ ڪوتريءَ،

اُئون ۾ لڪيوڙي قيمتي شيون جوئي لِي هيءَ۔

11 اِنسون بيتي ندي بند ڪريءَ،

اُئون ۾ لڪيوڙي شيون ظاهر ڪري هيءَ۔

12 پڻ ڏاهپ ڪيٽ شون آوي هيءَ

هانَ سمجھ ڪيٽ شون ملي هيءَ؟

13 اِنسون ايئي رو قدر ڪونهي جوڻو

هانَ آي ايئي جگت ۾ ڪونهي مليءَ۔

14 سُموندر ڪي هيءَ ڪم،

”ڏاهپ مهِي ڪيڏي ڪونهي۔“

اُوندو پوڻي پي ڪي هيءَ ڪم،

”آي مهِي ڪيڏي ڪونهي۔“

15 ڏاهپ نج شونَ هانَ چوندي شونءَ،

مولءَ لي ڪونهي شگهتا۔

16 ڏاهپ اوفير علائقي رِي شونيءَ،

قيمتي سُلِيموني پتر هانَ نيلم پتر شون پيءَ،

مول لي ڪونهي شگهتا۔

17 شونَ هانَ قيمتي شيسو،

ڏاهپ رِي برابر هوئي ڪونهي شگهتا

هانَ نڪو آي نج شوني رِيءَ،

گيئون شون مول لي شگهتا۔

18 قيمتي هانَ چمڪيلا پتر پيءَ،

ڏاهپ رِي مُقابلي ۾ ڪئين ڪونهي۔

ڏاهپ رو قدر، قيمتي موتيون شون پي وڌيڪ هي۔

19 اٽوپيا مُلڪ رو پُڪراج پٿر،

ڏاهپ ري برابر ڪونهي هان ڏاهپ رو قدر،

نج شوئي شون پي وڌيڪ هي۔

20 پٿ ڏاهپ ڪيٽ شون آوي هي

هان سمجه ڪيٽ شون ملي هي؟

21 ڏاهپ سڄي جنارون شون لڪيوڙي ري هي

هان پڪي پي اوئي ني جوئي ڪونهي سگهتا۔

22 پتال هان موت اوئي ري بازي ۾ ڪي هي ڪم،

”مهون رگو ڏاهپ ري مشهورِي شُئي هي۔“

23 پٿ رگو ايشور، ڏاهپ رو مارگ جوئي هي

هان اوئي ني خبر هي ڪم ڏاهپ ڪيٽ شون ملي هي۔

24 ڪيونڪ ايشور سڄي ڌرتي هان آڪاش هينام

سڄي شيون ڏيڪي هي۔

25 ايشور، بائيري رو وزن راڪيو

هان باڏئون ري پوئي ري شارو خاص حد نائي۔

26 ايشور، مي ري شارو قانون ناهيو

هان باڏئون ۾ ڪيوڙ ري شارو مارگ پي ناهيو۔

27 ايشور، اوئيچ تيم ڏاهپ ڏيئي

هان اوئي ني آزمائي اوئي ني راڪي۔

28 پڇي پرميشور انسون ني ڪهيو ڪم،

”جو، مهارو پي راڪڻ ڏاهپ هي

هان بچڙائي شون الگو ريوڻ سمجه هي۔“

اُيُوب نِي آيُوب شُنُو تِيم ياد آوڻ

# 29

<sup>1</sup> اُيُوب كِهيو ڪه،  
<sup>2</sup> ”ڪترو پلو هوونت،

ڪه مهاري زندگي ايشور هوونت، جون پيل هتي،

جڏي ايشور مهاري سنڀال ڪرتو.

<sup>3</sup> جڏي ايشور رو اُجالو مهِي تي چمڪتو،

تو هُون اُوئي ري اُجائي ري مدد شون انداري ۾ لنگهي جاوتو.

<sup>4</sup> جڏي هُون خوشحال هتو،

تو ايشور مهاري گهر ري سنڀال ڪرتو.

<sup>5</sup> جڏي قُدرت آڻو ايشور مهِي پيڙو هتو،

تو مهارا ٻال مهاري چوڌاري هوتا.

<sup>6</sup> جڏي مهِي ڪڍي شجو ڪئين هتو،

تو مهِي ڪڍي دُودَ هانَ زيئون ري تيل ري ندي بيئي.

<sup>7</sup> هُون جڏي پي شهر ري در ڪڍي چوڪ تي،

منڪون را فيصلا ڪرڻ ري شارو ڪُسي تي بيشتمو،

<sup>8</sup> تو نوجوان مهني ڏيڪي هتي مارگ ڏينا

هانَ ڏوڪرا مهاري عزت ري شارو اُپي ريتا.

<sup>9</sup> سردار مهني ڏيڪي ماڻ هوتا

هانَ آڀري موڏي ماڻي هات راکتا.

<sup>10</sup> اڳوڻ سقا چُپ هوئي جاوتام

جهڙو اُونون ري زبون تي تائو لاڳوڙو هووي.

<sup>11</sup> جڪو پي مهاري باتون سُنتوم

او مهني برڪت آڻو ڪيتوم

جڪي مهني ڏينو، اُوئي مهاري بڪوڻ ڪي۔

12 ڪيونڪه جڏي ڪو غريب

هان بنا سھاري يتيم آئي مهني ڪيڍي فرياد ڪرتو،

تو هون اُوئي ري مدد ڪرتو۔

13 جڏي هون رونڊپيرون

هان ڏڪ ري ماريوڙي منڪون ري مدد ڪرتو،

تو اُوئون را من خوشي شون پريجتا

هان او مهني برڪت ري آشيش ڏيتا۔

14 هون شاچ هان انصاف شون فيصلا ڪرتو،

مهني انصاف ني جُبي هان پوتيني آئي ڪار پيريو هتو۔

15 هون اونڌون ري شارو اونگي

هان پونگڙون ري شارو پگ هتو۔

16 هون غريبنون ري شارو باب آئي ڪار هتو،

جڏي هون اڻ جوڻ منڪون را فيصلا ڪرتو،

تو پيل سُني نموني جانچ ڪرتو،

ڪه متان اُوئون شون بي انصافي ني هووي۔

17 هون ظلمي را ڏونت پونگي،

اُوئي ري موڏي شون لاچار ني چوڙاوتو۔

18 اُوئي تيم هون آي شوچنو ڪم،

مهاري عمر موتي هوشي

هان هون آپري گهري آروم شون مرين۔

19 هون اهڙي بن جهڙو هون،

جڪي ري پالون پوڻي توڻي بڪريوڙي هووي هي

هانَ شَجِي رات اُوئي رِي پونون تي ماڪ پڙِي هِي۔

<sup>20</sup> مهاري هميشا عزت هوتي ريشي

هانَ مهاري طاقت ڪڏي پي ختم ڪونهي هووي۔

<sup>21</sup> منڪ مهاري باتون سُٺن رِي سارو انتظار ڪرتا

هانَ مات هوتي مهارا مشورا سُٺتا۔

<sup>22</sup> او مهاري باتون رو پروسو ڪرتا

هانَ مهاري باتون اُوئون نِي مي رِي بُوند آئي ڪار سُئي لاگتي۔

<sup>23</sup> منڪ مهارو ايئون انتظار ڪرتا

جون هائي مي رو انتظار ڪري هِي،

منڪ مهاري باتون رِي سارو ايئون شيڪتا

جهڙي ترشي بني مي رِي سارو شڪي هِي۔

<sup>24</sup> جڏي او پريشون هوتا

تو مهارو هاشتو مونڌو اُوئون نِي حوصلو ڏيتو۔

<sup>25</sup> هُون سردار هوتي اُوئون رِي اڳوڻي ڪرتو۔

هُون فوج ۾ بادشاه آئي ڪار هتو

هانَ ڏک آئون رو سهارو هتو۔“

اُيُوب رو آپرا ڏُڪي سُٺاڻ

<sup>1</sup> پڇي اُيُوب ڪهيو ڪم،

# 30

”همي او منڪ پي مهِي تي هاشي هِي،

جڪو عُمر ۾ مهِي شون نِنيا هِي۔

هُون تو اُوئون را باب ڏاڏا،

مهاري مال رِي سنڀال ڪرڻ آئي ڪُئي رِي برابر پي ڪونهي سمجهتو۔

<sup>2</sup> اُوئون شون مهني ڪو پي فاندو ڪونهي هويم،

ڪيونڪه او طاقت ۾ ختم هويا هتا.

3 او بُوڪ هان دُڪال ري ڪري ڪمزور هويا هتا.

او رات رو جهنگ هان ويرون جگها ۾.

شُوڪوڙي پالون ڪاوڻ ري شارو جوڻ جاوتا.

4 او لُوڻڪ هان شاوا پون توڙي ڪاوتا

هان بئون ري پالون اوئون رو ڪادو هتو.

5 مينڪون اوئون ني آپ شون ڪاڍيا هتا

هان اوئون ني چور چور ڪئي ناشاڙتا.

6 او شُوڪي نديون، جبلون ري چرون

هان ڌرتي ري سُرنگون ۾ ريتا.

7 او بئون ري بچ ۾ بُوڪ ري ڪري رڙي ڪرتا

هان ڪونتن آلي بئون هينا پيڙا پيڙا ريتا.

8 او بي وقوف هتا، جڪون ني ڪو پي اوڻڪنو ڪونهي

هان جڪون ني مينڪون ماري ڪوٽي،

مُڪ شون ڪاڍيا هتا.

9 پڻ همي اوئون را اولاد مهني تي هاشي هي

هان او مهارو خراب حال ڏيڪي مثالون ڏي هي.

10 همي او مهني شون نفرت ڪري هي

هان انگا ابي مهني مائي ٿوڪي هي.

11 ايشور مهني تي آفت ميلي مهاري ڪمون پونگي ري

هان مهني ڪمزور ڪيو رو،

همي مينڪون ني جڪو وٺي، او مهني شون ڪري شگهي هي.

12 مهاري شاجي پاشي آلا مينڪ مهني تي حملو ڪري

مهنِي لاري دَكِي هِي.

او مهنِي برباد كرڻ ري شارو رتا كِري هِي.

<sup>13</sup> جڪون رو ڪو پي مددگار ڪونهي،

اوج مهارو مارگ بند ڪري مهنِي دُڪ دِي هِي.

<sup>14</sup> او مهنِي برباد ڪرڻ ري شارو پست پونگي،

دُشمن آلي ڪار حملو ڪري هِي.

<sup>15</sup> پي مهنِي گهيري هِي

هانَ مهاري عزت هانَ دن،

راڪ ۾ مليا هِي.

<sup>16</sup> مهنِي دُڪون گهيري ليئو هِي

هانَ همي مهاري موت پڪي هِي.

<sup>17</sup> مهاري هاڻڪي رات رو دُڪي هِي

هانَ آي سُورم مهنِي سُوڻڻ پي ڪونهي ڏيئا.

<sup>18</sup> ايشور مهنِي گلي شون جهالي، ڪاڻو ڪيئو هِي.

<sup>19</sup> اُوئي مهنِي گپ ۾ ڏڪيو هِي،

همي هُون مٽي هانَ راک آلي ڪار هون.

<sup>20</sup> اي ايشورم هُون تني پُڪارون هون،

پڻ تُو مهاري ڪونهي سُٺتو،

جڏي هُون پراڻا ڪرون هون،

تو تُو مهِي ڏيشا ڏهيون ڪونهي ڏيتو.

<sup>21</sup> همي تُو مهِي تي دايا ڪونهي ڪرتو

هانَ آپري طاقت شون مهنِي دُڪ دِي هِي.

<sup>22</sup> تُو مهنِي بائيري آلي ڪار اڏائي لي جاوي هِي

هانَ طُوفونَ آلي كار الگو اُچلاوي هَي.

23 هاوي، مهني خبر هَي كم.

همي تو مهني نُپ ماري چوڙي

هانَ مهني اُوئي گهر ۾ پُگائي،

جيٽ هيڪ ڏن شجون ني جاوڻو هَي.

24 حقيقت ۾ اهڙي منڪ تي ڪڏي پي هات ڪونهي ڪٿيڄتو،

جڪو پيل شون مُصِيبَت ۾ هووي هانَ مدد ري سارو پُڪارتو هووي.

25 ڪي هون ڪيني ڏڪ ۾ ڏيڪي، رُونو ڪونهي؟

ڪي غريبن ري حالت ڏيڪي، مهني ڪياس ڪونهي آتو؟

26 جڏي هون پلائي ري اُميد ڪرون هون،

تو مهني شون بُرو هووي هَي

هانَ جڏي هون اُجائي رو انتظار ڪرون هون،

تو اندارو هوئي جاوي هَي.

27 مهارا اونترا بلي پڙيام،

مهني آروم ڪونهي ملتو،

ڪيونڪه مهاري سارو مُصِيبَت را ڏن آيا هَي.

28 مهارو رنگ تَرَڪي شون نام،

پڻ ڏڪون ري ڪري ڪاڻو هوپو هَي.

هون مينڪون ري رش ۾،

اُپي مدد ري سارو پُڪارون هون.

29 مهاري پُڪار گِڏڙ هانَ اُونت پڪي ري آواز آلي كار بيڪار هَي.

30 مهاري چوڙي ڪاڻي هوئي شَرير شون اُتري پڙي

هانَ مهاري هاڏڪي تا ري ڪري بلي هَي.

31 هَمِي مهاري بربط ساز شون دُڪ رو آواز

هان مهاري بونشلي شون،

روئڻ رو آواز نڪري هي۔“

اُيُوب ري آخري باتون

1 پڇي اُيُوب كهيو ڪم،

# 31

”مهِي آڀري اونڪيون شون وڃن ڪيئو هي،

تو پڇي هُون ڪيئون، ڪي ڪناري چوڪري ڏيشا بڇڙي نظر راکون؟

2 اهڙي منڪ ني ايشور ري طرفون ڪي ملشي

هان قدرت آئي آڪاشي ايشور شون ڪهڙي وراثت ملشي؟

3 ڪي ايئون ڪونهي ڪه بڇڙي ري شارو دُڪ

هان پُونڌي ري شارو بربادي راکيوڙي هي؟

4 ايشور مهارا مارگ اولڪي هي

هان مهاري هر وڪ جوڻي هي۔

5 جي هُون بڇڙي مارگ تي بُوئو هون

هان مهارا پگ دوڪي آئي مارگ تي بُوئا هي،

6 ايشور تُو مهني انصاف ري تاڪڙي ۾ تولي اولڪ،

ڪه هُون بي ڏوهي هون۔

7 جي هُون صحيح مارگ شون هتيو هون

هان مهاري اونڪيون مهارو من هتايو هووي،

جون مهاري هاتون ڪو پاپ هوپو هي،

8 تو مهاري بابوڙي پوک ڪو بيجو کاوي

هان مهاري بني ري پوک برباد هوئي جاوي۔

9 جي مهِي ڪيري لُگائي ني بڇڙي نظر شون ڏيني هووي

هانَ آڀري پاڙي زي در تي نظر راڪي هوڙي،

10 تو مهاري لڳائي ڪي بيڄي ري غلوم هوڙي

هانَ ڌاريا منڪ اُئي شون زنا ڪري.

11 جي هون اهڙا شرم آلا پاپ ڪرونت،

تو جڄ مهني ضرور ايني ڏوه ري سزا ڏيئونت.

12 بيشڪم، زنا هيڪ اهڙو باشڏي هي،

جڪو پتال توڙي شجو ڪئين ٻائي ختم ڪري هي.

جي مهني ائون ڪيو هوونت،

تو مهاري شجي پوک برباد هوئي جائونت.

13 جي مهني آڀري بونهي هانَ بونهي رو حق کاڌو هي،

جون مهني ائون ري شڪايت ڪونهي شئي،

14 پڇي جڏي ايشور انصاف ڪرشي،

تو هون ڪي ڪرين؟

هانَ جڏي او جانچ ڪرشي، تو هون ڪهڙي بلتي ڏئين؟

15 جڪي مهني ناهيون،

اُئي مهارا بونهي پي ناهيا

هانَ اُئي مهوني آڀري ما ري پيت ۾ پي راڪيا.

16 مهني هميشا غريب هانَ روندپير ري مدد ڪي.

17 مهني جڏي پي ٻائي کاڌي،

تو يتيم ني پي ڪلائي.

18 مهني نئي ٽڪي شون يتيم ني،

اولاد آلي ڪار پائيو

هانَ نئي ٽڪي شون روندپير ري مدد ڪي.

19 جڏي منڪ گايون بنا مرتا پڙيا،

جون ڪي غريب نِي ڪٿي ري ضرورت هتي،

20 تو مهِي اُونون نِي،

آپري رڍون ري بائون را ناهيوڙا گرم گاپا ڏينا

هانَ اُونون مهني آشيرواد ڏيني.

21 مهِي ڪڏي پي ڪي يتيم تي هات ڪونهي ڪٿيو،

اُوئي تيم پي نام جڏي فيصلو ڪرڻ آلا مهِي پيڙا هئا.

22 جي ائون ڪونهي، تو ايشور مهارو ڪيو جوڙ شون پونگي

هانَ مهاري بونه پاڳي.

23 مهني ايشور رو پي هتو،

ڪيٽ او مهِي تي ڪو آفت ني ميلي،

هُون اُوئي ري قدرت هانَ طاقت شون بيٺاجتو.

24 مهِي شوني تي، ٻڻ نيچ شوني تي، ڪڏي پي يروسو ڪونهي ڪيو.

25 مهِي ڪڏي پي ايني بات رو بدائو ڪونهي ڪيو،

ڪه مهِي ڪڍي تموم گهڻو ڏن هي،

جون مهني شجو ڪئين مليو رو.

26 مهِي ڪڏي پي چمڪيلي شوج،

جون چمڪيلي چندر ري پوجا ڪونهي ڪي.

27 مهاري من ڪڏي پي اُونون ني منيو ڪونهي

هانَ نڪو هات جوڙي اُونون ني عزت ڏيني.

28 اي اهڙو ڏوه هي، جڪي ري جج سزا ڏي هي،

ڪيونڪه جي هون ائون ڪرونٽ،

تو آڪاشي ايشور شون بي وفائي ڪرونٽ.

29 هُونُ آڀري دُشمنون ري بربادي تي ڪڏي پي خوش ڪونهي هويو

هانَ نڪو اِئي بات شون خوش هويو.

جڏي اُونون تي ڪو دُڪ آيا هوڙي.

30 مهاري موڏي شون ڪڏي پي آي پاپ ڪونهي هويو.

ڪه اُونون تي لعنت ميلون.

31 مهارا پاڙي آلا آي بات مني هي ڪه.

اُيُوب ري گهر شون ڪو پي بُوڪيو ڪونهي گيو.

32 ڪو پي پرديسي ٻاهر گهٽي ۾ رات ڪونهي رهيو.

ڪيونڪه مهاري گهر رو در هميشا اُونون ري شارو ڪليوڙو ريتو.

33 مهِي بيجون آئي ڪار آڀرا پاپ من ۾ ڪونهي لڪايا.

34 هُون منڪون جون عزيزون شون ڪونهي بيٺاجتو.

ڪه او مهني ڪي ڪشي.

ڪيونڪه مهِي اهڙو ڪو پي ڪوم ڪونهي ڪيئو.

جڪي شون مات ڪري گهري پيشون.

35 پلو هوونت، ڪو مهاري بات سُئونت،

هُون آڀري باتون تي صحيح ڪرون هون.

اي قُدرت آلا ايشور، مهني بلتي ڏي.

پلو هوونت، مهِي تي الزوم لگاڻو آلا،

او الزوم لڪي لي ائونت،

جڪو اُونون مهِي تي لگايا هي.

36 هُون شاچيلي، او الزوم را ڪاگڏ آڀري ڪوئي مائي ڪي ليئونت،

پڻ آڀري مائي تي پوتيني آئي ڪار ٻونڌي چوڙنت.

37 هُون ايشور ني آڀري ڪومون رو شجو حساب ڏي،

هيڪي شهزادي آلي كار بنا بي ايشور ڪڍي جائونٽ.

38 جي مهاري بني مهاري خلاف فرياد ڪري هي

هان اوئي را ڪيريا پيٽا هوئي رونا هي،

39 جون مهي موري بنا، بني شون پيداوار لي هي،

جون اوئي را مالڪ مهاري ڪري برباد هويا هي،

40 تو مهاري شارو ڏوٽون ري بدلي ڪانديرام

جئو ري بدلي ڪارا ڏوٽا اڳي.“

ايئي نموني اُيُوب ري شجي باتون پوري هوئي.

### اليهو ري ريش

32<sup>1</sup> نيٺ اُيُوب ري تينون دوستون بحث ڪرڻ چوڙيو، ڪيونڪ اُيُوب آيو آبي نيڪ شمعجهتو. <sup>2</sup> پڇي بوز قبيلي آلي براڪيل ري ڏيڪري اليهو ني ريش آبي. اليهوم رام ري خاندان رو هتو. اوئي ني ايئي بات تي ريش آبي، ڪيونڪ اُيُوب، ايشور ني نام پڻ آبي نيڪ ڪهيو هتو. <sup>3</sup> او اوئون تينون دوستون شون پي ناراض هتو، ڪيونڪ اوئون نڪو اُيُوب ني صحيح بلتي ڏيني هان نڪو اوئي ني ڏوهي ثابت ڪيو. <sup>4</sup> اليهو ايئي ري ڪري مات هتو، ڪيونڪ او تينئي اوئي شون عمر ۾ موتا هتا. <sup>5</sup> پڻ جڏي اوئي ڏينو ڪه او تينئي مات هي، تو اوئي ني ريش آبي.

### اليهو ري باتون

<sup>6</sup> پڇي بوز قبيلي آلي براڪيل ري ڏيڪري اليهو ڪهيو ڪه،

”هون هئون توڻي ايئي ري ڪري مات هتو

هان عزت ڪرتو پڙيو، ڪيونڪ ٿي مهي شون عمر ۾ موتا هو.

<sup>7</sup> مهي شوچو ڪه، او پيل ڏاهپ آلي بات ڪري،

جڪو مهي شون موتا هان تجربي ۾ وڌيڪ هي.

<sup>8</sup> پڻ جڪو آتما انسون ۾ قدرت آلي ايشور ري طرفون هي،

اوج انسون ني ڏاهپ ڏي هي.

<sup>9</sup> رگو ڏوڪرا عقل آلا ڪونهي هوتا

هانَ ضروريٰ ڪونهي ڪه رڱو ڏوڪرا انصاف ڪرڻ سمجھي هي.

10 ايڻي ري ڪري مهاري بات سُٺو.

مهني جڪو ڪئين خبر هي، اوج ٿوئي سُٺائين.

11 جوئو، هون اُترِي توڻي ماڻ رهيو،

جڏي ٿي ٻولتا پڙيا،

هون ٿونري ڏاهپ آلي باتون تي ذهيون ڏيتو پڙيو.

12 هون پوري من شون ٿونري باتون سُٺو پڙيو.

پڻ ٿون ۾ ڪي پي ايوب ني غلط ثابت ڪونهي ڪيو

هانَ نڪو اُوئي ني صحيح بلتي ڏيني.

13 خبردار، آيو آڻي ڏاها ني سمجهو،

ڪيونڪه ايوب ني ايشور شون نال، بيجو ڪو پي بلتي ڏي ڪونهي شگهتو.

14 ايوب آڻي باتون شون مهني نشونون ڪونهي ناهيو

هانَ هون اُوئي ني ٿون آلي ڪار بلتي ڪونهي ڏيون.

15 پڇي اليهو، ايوب ني ڪهيو ڪه،

”ٿارا تيني دوست پيئاجي ماڻ هويا رام

ڪيونڪه همي ايئون ڪڍي، ڪيوڻ ري شارو ڪئين ڪونهي.

16 همي او ماڻ هي هانَ بلتي ڪونهي ڏينا.

ڪي هون آيون پي ماڻ رون؟

17 همي هون پي بلتي ڏين

هانَ جڪو ڪئين مهني خبر هي، اوج ٿوئي سُٺائين.

18 مهاري من ۾ تموم گهڻي باتون هي

هانَ مهاري آتما مهني ٻولڻ تي مجبور ڪري هي.

19 جوئو، جي مهني آڻي بات ني سُٺائي،

تو هون ايئون قاتين،

جون نوني شراب شون بند ديڙي پريجي قاتي هي۔

<sup>20</sup> هون ضرور ٻولين، ڪه مهني تسلي ملي،

هون آڀرو مونڌو کولي ضرور بلتي ڏين۔

<sup>21</sup> هون ڪي پي انسون رو پاشو ڪونهي ليئون

هان نڪو ڪيري خوشامد ڪرون۔

<sup>22</sup> ڪيونڪه مهني خوشامد ڪرڻ ري خبر ڪونهي،

جي مهني ايئون ڪيئون،

تو ايشور چيڪو مهني ماري چوڙشي۔“

<sup>1</sup> پڇي اليهو ڪهيو ڪه،

# 33

”اي ايوب، همي مهاري بات سٺ

هان مهاري سڃي باتون ڏهيون ڏي سٺي۔

<sup>2</sup> جوم هون جڪو ڪئين ڪونه

هان جڪو باتون ٿي شون ڪرون،

<sup>3</sup> هون او سڃي باتون ساڃي من شون ڪرين

هان جڪي ري مهني خبر هي، او ايمونداري شون سٺائين۔

<sup>4</sup> ايشور ري اتما مهني ناهيو

هان قدرت آلي ايشور مهني زندگي ڏيني هي۔

<sup>5</sup> جي تو مهني بلتي ڏي شگهي،

تو آڀري باتون سٺاوڻ ري ساڙو تيار هو هان مقابلو ڪر۔

<sup>6</sup> جوم ايشور ري نظر ۾ آبي برابر هون،

ڪيونڪه آبي بيئي مٽي شون ناهيوڙا هون۔

<sup>7</sup> مهارو مقصد تي بيٺاڙڻ ڪونهي

هانَ نَڪو مهاري مرضي هيَ ڪه ٿئي پريشون ڪرون-

<sup>8</sup> ٿي جڪو ڪئين ڪهيو هيَ،

او شاچيلي مهِي سُڻيو هيَ،

<sup>9</sup> ٿي ڪهيو ڪه، 'هُون ڏوهي ڪونهي

هانَ مهِي ڪو پي ڏوه ڪونهي ڪيئو،

مهِي ڪو پي پاپ ڪونهي ڪيئو

هانَ نَڪو مهِي ڪو بچڙائي ڪي-

<sup>10</sup> تو پي ايشور مهاري خلاف بل جووي هيَ

هانَ مهني آڀرو ڏسمن سمجهي هيَ-

<sup>11</sup> اوئي مهاري پگون ۾ شونڪڙ گهاتي هيَ

هانَ مهاري سجي مارگ تي نظر راڪي هيَ-

<sup>12</sup> اي اُيُوب، جو، هُون ٿئي ڪونه هون ڪه،

تاري آي باتون غلط هيَ،

ڪيونڪه ايشور، انسون شون گهڻو مهان هيَ-

<sup>13</sup> تُو آي ڪئي ايشور شون ڪيئون جهڙو ڪري هيَ،

ڪه او ڪي پي بات ري بلتي ڪونهي ڏيتو؟

<sup>14</sup> ايشور فرق طريقي شون بات ڪري هيَ،

پڻ انسون اوئي ني سمجهتو ڪونهي-

<sup>15</sup> ايشور، ڪڏي شوچ ۾، ڪڏي شپني ۾،

ڪڏي گهڙي اُونگ ۾

هانَ ڪڏي بچوئي تي اُونگاجتي بلام

انسون شون باتون ڪري هيَ-

<sup>16</sup> اوئي تيم ايشور اُونون ني آڀري باتون سُڻاوي هيَ

هانَ بيٺاڙي اُوئون ني خبردار ڪري هيءَ،

17 ڪه اِنسون ني بچڙي ڪومون

هانَ مگرور هوڻ شون پاليءَ.

18 ايشور اُوئي ري آتما پتال شون

هانَ اُوئي ري جان موت شون بچاوي هيءَ.

19 ايشور اِنسون ني بيمار ڪري چيني هيءَ

هانَ اُوئي ري هاڙڪي هميشا ڏڪتي ري هيءَ.

20 اترِي توڻي ڪه اُوئي ني ٻاتي

هانَ سُئي ڪاڏي شون پي نفرت هووي هيءَ.

21 اُوئي رو ڏيل سُڪي ڪمزور هوئي جاوي هيءَ

هانَ اُوئي ري هاڙڪي ڏيڪيڄڻ لاڳي هيءَ.

22 او موت ري نيڙو هووي هيءَ

هانَ اُوئي ري بچڻ ري ڪو پي اُميد ڪونهي ريتي.

23 جي هزار فرشتون ۾ ڪو هيڪ آئيءَ،

اِنسون ني سُٿاوي ڪه،

اُوئي ني ڪي ڪرڻو هيءَ.

24 تو فرشتو اُوئي تي ڪياس ڪري ايشور ني ڪشي ڪه،

’تو اِئي ني موت ري ڪڏ شون بچام

ڪيونڪه مهني اِئي رو ايوزو مليو رو.

25 اِئي رو شرير ٻال ري شرير جهڙو هووي

هانَ آي پڙي پاڇو جوان هووي.

26 پڇي او اِنسون ايشور شون پرائنا ڪرشي

هانَ ايشور اُوئي تي دايا ڪرشي.

او خُوش هُوئي ايشور ري پڳني ڪرشي

هان ايشور اُوئي ني پڙي ڪامياب ڪرشي.

<sup>27</sup> او منڪون آگهي منشي ڪم.

’هُون پاپ ڪري سنڌي مارگ شون ڦريو هتو.

پڻ ايشور مهني اترِي سزا ڪونهي ڏيني، جترا مهارا پاپ هتا.

<sup>28</sup> ايشور مهني موت ري موڏي شون بچايو هي،

همي هُون زندگي رو اُجالو ڏيڪين.

<sup>29</sup> جوم انسُون شون ايشور گهڙي گهڙي ايئون ڪري هي،

<sup>30</sup> ڪم انسُون موت ري مُنهن ۾ جاوڻ شون بچي

هان اُوئي ري زندگي ۾ خُوشي آوي.

<sup>31</sup> اي اُيُوب، ماڻ ڪر

هان مهاري بات ذهيون ڏي سُڻ.

<sup>32</sup> جي ٽني ڪئين ڪيوڻو هي، تو مهني سُڻام

ڪيونڪه مهاري مرضي هي،

ڪه ٿي ۾ ڪو پي ڏوه ثابت ني هووي.

<sup>33</sup> جي تُو ڪونهي ٻولي، تو مهاري باتون سُڻم،

ماڻ ڪري سُڻم، تو هُون ٽني ڏاهپ ري باتون شيڪائين.

<sup>1</sup> پڇي اليهو آي پي ڪهيو ڪم.

<sup>2</sup> ”اي ڏاهون، مهاري باتون سُڻم“

# 34

اي عقل آئون، مهاري بات تي ذهيون لڳائو.

<sup>3</sup> آبي ڪون شون بات اولڪون هون،

جهڙي نموني زبون شون ڪاوڻ رو سواد اولڪون هون.

<sup>4</sup> آئون، آبي ايئون باتون ري جانچ ڪرون

هانَ جوڻون ڪه شاچ ڪي هِي؟

<sup>5</sup> ڪيونڪه اُيُوب ڪهيو هِي ڪه،

’هُون شاچو هون هانَ ايشورَ مَهِي شون بي انصافي ڪي هِي-.

<sup>6</sup> هُون حق تي هون،

تو پي مهنِي ڏوهي ڪِي هِي-.

هُون ڏوهي ڪونهي، پڻ مهنِي اهڙا زخم مليا هِي،

جڪون رو ڪو پي علاج ڪونهي-‘

<sup>7</sup> اُيُوب جهڙو ڪُڻ هِي،

جڪو ايشورَ رِي خلاف بولتو رِي هِي؟

<sup>8</sup> او پاپيون پيڙو اُئي بيشِي هِي

هانَ بچڙون پيڙو بي هِي-.

<sup>9</sup> ڪيونڪه اُوئي ڪهيو ڪه،

’ايشورَ رِي پگتي ڪرڻ رو ڪو پي فائدو ڪونهي-‘

<sup>10</sup> اِئي رِي ڪري اي ڏاهون، مهاري بات سُٺوم

آي هُوئي ڪونهي شگهتو ڪه ايشورَ بچڙائي ڪري،

جون قُدرت آڻو ايشورَ پاپ ڪري-.

<sup>11</sup> ايشورَ اِنسون نِي اُوئي رِي ڪومون رو اِنوم ڏيشِي

هانَ هر هيڪ نِي اُوئي رِي ڪومون رو اجر ملشي-.

<sup>12</sup> شاچيلي ايشورَ بچڙائي ڪونهي ڪرتو

هانَ قُدرت آڻو ايشورَ بي انصاف ڪونهي-.

<sup>13</sup> ڪي ڌرتي نِي ايشورَ رِي حوالي ڪي؟

هانَ ڪي ايشورَ نِي جگت رو اختيار ڏينو؟ ڪي پي نا-.

<sup>14</sup> جي ايشورَ اِنسون رو شاش ڪوشي لِي،

15 تو شجائي ختم هوئي جاشي

هان انسون پڙي مٽي ۾ ملي جاشي۔

16 اي اُيُوب، جي ٿي ۾ سمجھ هي، تو سُڻ

هان مهاري باتون ذهيون ڏي سُڻ۔

17 جڪو انصاف رو دُشمن هي،

ڪي او حڪومت ڪري شگهي هي؟

تو قدرت آئي ايشور تي الزوم لگاوي هي،

جڪو انصاف ڪري هي۔

18 جڏي بادشاه هان اڳوڻ بچڙائي ڪري هي،

تو ايشور اُئون ني چيني هي۔

19 او اميرون رو پاشو ڪونهي ليتو،

اُوي ري نظر ۾ امير هان غريب برابر هي،

ڪيونڪه اُئون بيئون ني ايشور ناهيا هي۔

20 انسون آڏي رات رو يڪدم مري هي،

او گهڙائي ختم هووي هي

هان طاقت آلا منڪ پي، بنا هات لگائي مري هي۔

21 ايشورم انسون ري شجي ڪومون ني جوئي هي

هان اُوي ري هر وڪ تي نظر راڪي هي۔

22 اهڙو ڪو پي اندارو، جون گهور اندارو ڪونهي،

جيٺ پاپي منڪ لڪي شگهي۔

23 ايشور ني ڪو پي ضرورت ڪونهي،

ڪه او ڪي انسون ني آڀري عدالت ۾ آڻاوي۔

24 او بنا جانچ ري طاقت آئي منڪون را،

تُڪڙا تُڪڙا ڪري هي

هانَ اُوئون ري جگهه پيجون ني راکي هي-

25 ڪيونڪه ايشور اُوئون را ڪوم جوئي هي

هانَ رات رو اُوئون ني برباد ڪري هي-

26 ايشور اهڙي بچڙون ني،

شجون آگهي سزا ڏي هي،

27 ڪيونڪه اُوئون ايشور رو انڪار ڪيو

هانَ اُوئي رو هيڪ پي حڪم ڪونهي منيو-

28 اُوئون ري ظلم ري ڪري،

غريبون ري فرياد ايشور توڻي پڳي

هانَ ايشور لاجار منڪون ري پڪار سُڻي-

29 جڏي ايشور ماڻ هي،

تو پڇي ڪٿ اُوئي تي الزوم لگائي؟

جي ايشور آڀرو موندو لڪاوي،

تو ڪٿ اُوئي ني جوئي شگهسي؟

ڪيونڪه او هر قوم،

پڻ هر هيڪ انسون تي بادشاهي ڪري هي،

30 ڪه بچڙا منڪ بادشاهي ني ڪري

هانَ انسون اُوئون ري قاشي ۾ قاشي ني-

31 ڪي ڪٿ ايشور ني ڪئي شگهسي هي،

'ڪه مهني مهاري پاپون ري سزا ملي ري،

همي هون پڙي پاپ ڪونهي ڪرون-

32 جڪو هون ڏيڪتو ڪونهي، او مهني بتام

جي مهِي پاپ ڪيئو هِي، تو هَمِي ايتون ني ڪرون۔‘

<sup>33</sup> ايشور جڪو ڪئين ڪيئو،

تُو او ڪونهي منتوم

ڪِي ايشور تئي او اجر ڏيئي،

جڪو تاري مرضي هِي؟

هَمِي فيصلو تاري هات ۾ هِي، ني ڪه مهاري هات ۾۔

تُو جڪو ڪئين جوئي هِي او سُٺا۔

<sup>34</sup> ڏاها هان عقل آلا منڪ،

جڪو مهاري باتون سُٺي پڙيا،

او آي ڪشي ڪه،

<sup>35</sup> ايوب ڪالهون آئي ڪار بولي پڙيو

هان اوئي ري باتون ڏاهپ شون ڪالي هِي۔

<sup>36</sup> پلو هوونت، ايوب پوري نموني آزمايو جائونت،

ڪيونڪه او بچري منڪون آئي ڪار بلتي ڏي هِي۔

<sup>37</sup> او ايشور شون بگاوت ڪري آيا پاپ بدوي هِي

هان تاري بجائي ايشور ري خلاف تموم گهڻو بولي هِي۔“

<sup>1</sup> پچي اليهو ايوب ني آي پي ڪهيو ڪه،

<sup>2</sup> ”تُو جڪو آيو آبي ايشور آگهي شاجو سمجھي هِي،

# 35

ڪي تاري آي بات صحيح هِي؟

<sup>3</sup> تُو آي ڪي هِي ڪه، ’مهني ايني رو ڪهڙو فائدو،

جون پاپ ني ڪرڻ شون مهارو ڪهڙو نفو؟‘

<sup>4</sup> هون تئي هان تاري دوستون ني ڪونه هون ڪه،

<sup>5</sup> آڪاش ڏيما جو هان نظر ڪر

هانَ باڏئون تي ذهيون لڳام

جڪو تِي شونِ تمومِ گهڻا اُونچا هيَ-

6 جِي تُو پاپِ ڪري، تو ايشورَ نِي ڪو فرق ڪونهي پڙتو

هانَ جِي ٿارا پاپِ بدتا جاوِي، تو پِي اُوئي تي ڪو پِي اثر ڪونهي پڙتو-

7 جِي تُو نيڪِي ڪري هي، تو ايشورَ تي ڪهڙو ٿورو ڪري هي؟

جون ٿاري هاڻون اُوئي نِي ڪهڙو فائدو؟

8 ٿاري پاپِ ڪرڻ شونِ،

رُگو اِنسون رو نُقصون هووي هي

هانَ ٿاري نيڪِي شونِ رُگو منڪون رو فائدو هووي هي-

9 جڏي منڪون تي تمومِ گهڻو ظلمِ هووي هي،

تو او ظلميون ري خلافِ ايشورَ نِي پُڪاري هي-

10 پڻ ڪو پِي اي ڪونهي ڪيتو ڪم،

ايشورَ ڪيٽ هي، جڪي مهوئي ناهيا هي

هانَ مهوئي ڏکون ۾ گاڻن ري ساڙو خوشي را گيت ڏينا؟

11 ايشورَ آيون نِي ڌرتي ري جنارون شونِ وڌيڪِ سمجھ

هانَ پڪيون شونِ پي وڌيڪِ ڏاهپِ ڏي هي-

12 جڏي اِنسون پُڪاري هي، تو ايشورَ بلتي ڪونهي ڏيتو،

ڪيونڪه منڪِ بچڙا هانَ مگرور هي-

13 اي شاچ هي ڪه ايشورَ ڪوڙي منڪون ري پُڪار ڪونهي سُڻتو

هانَ قدرتِ آڻو ايشورَ اُونون ڏيما ذهيون ڪونهي ڏيتو-

14 اي اُيُوب، پڇي ايشورَ ٿارو ڪيس ڪيڪر سُڻشي،

جڏي تُو ڪي هي ڪم، هُون ايشورَ نِي ڏيڪتوئي ڪونهي،

مهارو ڪيس اُوئي آگهي هي

هانَ مهني فيصلي رو انتظار هي۔

<sup>15</sup> تُو آي پي كي هي كه، ايشور آپري ريش ۾ سزا كونهي ڏيتو

هانَ نڪو پاپون تي ذهيون لگاوتو۔

<sup>16</sup> ايئي ري ڪري اي اُيُوب، جڏي تُو بولي هي،

تو بيڪار باتون ڪري هي

هانَ ٿاري باتون ۾ ڪو پي ڏاهپ ڪونهي۔

<sup>1</sup> پڇي اليهو اُيُوب ني آي پي ڪهيو ڪه،

# 36

<sup>2</sup> ”توڙي دير مات ڪر هان مهاري باتون سُٺ،

ڪيونڪه هون ايشور ري حق ۾ آيون پي بولين۔

<sup>3</sup> مهني ڪڍي تموم گهڻو علم هي،

ڪه هون آپري مالڪ ني شاجو ثابت ڪري شگهون هون۔

<sup>4</sup> شاجيلي، مهاري باتون ڪوڙي ڪونهي،

ڪيونڪه هون تموم گهڻو ڏاهو هون۔

<sup>5</sup> جوم قدرت آلو ايشور ڪيني پي گهت ڪونهي سمجهتوم

ڪيونڪه او ڏاهپ شون پڙور هي۔

<sup>6</sup> ايشور بچتون ني جيتا ڪونهي راڪتو

هانَ جڪو مُصيب ۾ هي، اوتون رو انصاف ڪري هي۔

<sup>7</sup> او نيڪ منڪون ري سنپال ڪري هي

هانَ اوتون ني عزت ڏي،

هميشا ري شارو بادشاهي تخت ماتي پيشاڙي هي۔

<sup>8</sup> جڏي بچڙا منڪ شونڪڙون شون بونڊيا جاوي هي،

جون اوتون تي تموم گهڻا ڏڪ آوي هي،

<sup>9</sup> تو ايشور اوتون ني اوتون را پاپ هان ڪوم بتاوي هي،

ڪيونڪه اُوئون مگروري ڪي هتي۔

10 ايشور اُوئون ني سُدارڻ ري شارو اُوئون را ڪون ڪولي هي

هان اُوئون ني حڪم ڏي هي ڪه او بچڙائي ني ڪري۔

11 جي او ايشور ري بات مني اُوئي ري پگني ڪري،

تو ايشور اُوئون ري زندگي خوشحال هان ڪامياب ڪري هي۔

12 جي او ايشور ري بات ڪونهي منتم

تو او اوچتام تلوار شون ماريا جاشي۔

13 بچڙي منڪون را من ريش ۾ پريوڙا ري هي،

پڻ جڏي ايشور اُوئون ني سزا ڏي هي،

تو او مدد ري شارو ڪونهي پڪارتا۔

14 اُوئون ري زندگي بي شرمي ري ڪومون شون برباد هووي هي

هان او جواني ۾ مري جاوي هي۔

15 پڻ ايشور ڏڪون ۾ ڦاٽوڙا منڪ چوڙاوي هي

هان ڏڪون ري وسيلي اُوئون ني شيڪاوي هي۔

16 اي اُيُوب، ايشور ري مرضي هي ڪه او ٿني پي ڏڪون شون چوڙاوي

هان ٿني اهڙي ڪُلي جگها تي لي آوي،

جيٺ تارو تيبيل سُني سُني ڪاڏي شون پريوڙو ري۔

17 پڻ هٿون ٿني او سزا ملي هي،

جڪو بچڙون ني ملي هي،

ايئي ري ڪري ايشور ٿني عدالت

هان انصاف ري شارو جهاليو هي۔

18 خبردار، ٿاري ريش ٿني گهمرا ني ڪري

هان تموم گهڻو ڏن ٿني رلاوي ني۔

19 ڪي ٿاري طاقت ٿئي ڏڪون شون بچائي؟

جون ٿاري ملڪيت ٿئي ايئن ڏڪون شون چوڙائي؟

20 ٿو اُوئي موت آئي رات رو انتظار ني ڪر.

جڪي رات قومون جيٽ پي هووي، برباد هوئي جاوي هي.

21 خبردار، بچڙائي ني ڪر.

ڪيونڪه ڏڪون ٿئي آزموتِي ري شارو چُونڊيو هي.

22 جو، ايشور آيري قدرت شون موتا موتا ڪوم ڪري هي،

ڪُن اُوئي آئي ڪار شيڪائي شگهي هي؟

23 ڪيو ايشور ني مارگ بتائي شگهي هي؟

جون ڪُن اُوئي ني غلط ڪئي شگهي هي؟ ڪو پي ڪونهي،

24 جون منڪ گيت گائي ايشور ري بڪوڻ ڪري هي،

اُوئيچ نموني ٿو پي اُوئي ري ڪومون ري بڪوڻ ڪر.

25 هر هيڪ منڪ اُوئي رو ڪوم ڏينو هي

هان انسون الگي پون شون اُوئي ڏيشا جووي هي.

26 جو، ايشور مهان هي،

مهِي اُوئي ري قدرت رو اندازو لگائي ڪونهي شگهتا.

ڪي ڪُن ايشور ري عمر رو حساب لگائي شگهي هي؟

27 ايشور پوڻي ري بوندون شون باڏل ناوي هي

هان ايئن باڏلون شون مي برشاوي هي.

28 ايشور آڪاش شون ڌرتي ماتي،

انسونون ري شارو تموم گهڻو مي برشاوي هي.

29 ڪي ڪُن شمجهي شگهي هي،

ڪه آڪاش ماتي باڏل ڪيڪر بڪري هي

هانَ او ڪيڪر گرجي هي؟

<sup>30</sup> جوڻ ايشور ڪيوڻ رو اُجالو آڀري چوڌاري پڪيڙي هي

هانَ شُمندر رو تَل ڍڪي هي.

<sup>31</sup> او باڏئون شون

قومون ري سنڀال ڪري هي

هانَ اوئون ني تموم گهڻو ڪاڏو ڏي هي.

<sup>32</sup> او ڪيوڻ ني جيت پي حُڪم ڏي هي،

او اوڻ جائِي ڪري هي.

<sup>33</sup> باڏئون ري گرج شون طُوفون ري خبر پڙي هي

هانَ جنار پي طُوفون ري اوڻ ري خبر سُٺاوي هي.

<sup>1</sup> پڇي اليهو ڪهيو ڪه،

# 37

”مهارو من اي شوچي ڏوجي هي

هانَ زور شون ڌڙڪي هي.

<sup>2</sup> تي شجائي ايشور رو آواز سُٺو

هانَ اوئي ري گرج آلي گوڙ تي ذهيون لڳائو.

<sup>3</sup> او ڪيوڻ ني آڪاش شون هيٺا ميلي هي

هانَ اوئي ري اُجائي شون ڌرتي چمڪي هي.

<sup>4</sup> پڇي گرج آلو آواز سُٺيڃي هي

هانَ ايشور آڀري جلووي ۾ گرجي هي.

جڏي ايشور رو آواز آوي هي،

تو ڪيوڻ چمڪتي ري هي.

<sup>5</sup> ايشور عجيب نموني گرجي هي،

او اهڙا موتا موتا ڪوم ڪري هي،

جڪو آڻي شمعو شون باهر هي۔

6 ايشور برف ني حڪم ڏي هي،

ڪه او جائي ڌرتي مائي ڪري

هان مي ني زور شون برش رو حڪم ڏي هي۔

7 ايئي نموني ايشور منڪون ني ڪوم ڪرڻ شون پالي هي،

ڪه سجي مخلوق اوي ري قدرت ني اولڪي۔

8 پچي جهنگلي جنار پي آري چرون ۾ لڪي هي

هان آري گهرون ۾ پناه لي هي۔

9 ڏڪڻ شون خطرناڪ طوفون آوي هي

هان اتر ري بائري شون شي ٻڌي هي۔

10 ايشور ري فوڪ شون برف جمي هي

هان سجو پوڻي برف ني هي۔

11 ايشور ٻاڏون ني پوڻي شون پري هي

هان اوئون شون چوڌاري ڪيوڻ چمڪاوي هي۔

12 ايشور ري مرضي شون ٻاڏ،

اينا اونا بيتا ري هي

هان اوي ري حڪم شون،

ٻاڏل ڌرتي مائي برشي هي۔

13 ايشور ايئون ٻاڏون شون،

منڪون ني شيڪاوي هي۔

ايشور ڌرتي ني برڪت ڏي هي

هان آري دايا بتاوي هي۔

14 اي اُيُوب، مهاري بات ڏهين ڏي سُڻ،

ماٺ ڪري ايشورَ رِي عجيب ڪومون تي ڏهيون لڳا.

15 ڪي ٿئي خبر هِي ڪه ايشورَ ڪيڪر باڏئون نِي حُڪم ڏي هِي

هانَ ڪيڪر آپري باڏئون شون ڪيوڻ چمڪاوي هِي؟

16 ڪي ٿئي خبر هِي ڪه باڏل ڪئي پاشي جاشي؟

اِي عجيب ڪوم رُگو ايشورَ ڪري هِي، جڪو تموم گهڻو ڏاهو هِي.

17 جڏي ڏڪڻ آلي لُو لاڳي هِي،

تو ڌرتي ويرون هوي جاوي هِي

هانَ تارا گايا اونا هووي هِي.

18 جڏي ايشورَ آڪاش نِي،

پيتل رِي شيشي آلي ڪار چمڪيلو ناهيو،

تو ڪي ٿي اُوئي رِي مدد ڪي هتي؟

19 مهوني شُڻا ڪه مهِي ايشورَ نِي ڪي ڪونه؟

ڪيونڪه جتري توڻي مهوني پوري بات رِي خبر نِي پڙي،

اُترِي توڻي مهِي آپرو ڪيس پڙهي ڪونهي سگهتا.

20 ڪي ڪُن ايشورَ نِي ڪشي،

ڪه هُون ڪئين بولون؟

شاچيلي، جڪو پي اينون ڪشي،

تو او جيتو ڪونهي بچي.

21 جڏي بائرو بي هِي هانَ باڏل هتي هِي،

تو اُوئي تيم چمڪڻ آلي سُورج ڏيشام،

ڪو پي جوئي ڪونهي سگهتو.

22 اُتر شون چمڪتو اُجالو آوي هِي،

جڪي شون ايشورَ رِي موتي مهما ڏيڪيجي هِي.

23 آبي فُدرت آلي ايشور توڻي پُگي ڪونهي شگهتا،

ڪيونڪه او موتو طاقت آڻو هي.

او انصاف هان شاچ شون فيصلو ڪري هي.

24 ايڻي زي ڪري منڪ اوڻي شون پيئاجي هي.

جڪو آڀرو آڀني ڏاها شمجهي هي،

او ايشور آگهي ڪئين ڪونهي.

پرميشور ري اُيُوب ني بلتي

1 پچي پرميشور پتوڙي ۾ اُيُوب ني ڪهيو ڪم،

# 38

2 ”تو ڪيو هي، جڪو بي وقوفي آلي باتون ڪري پڙيو

هان مهاري رٿائون مائي پڙو راکي پڙيو؟

3 همي همت ڪر هان تيار هو.

همي هون تي شون جڪو پي پوچون، او سٿا.

4 جڏي مهني ڌرتي رو بنياد راکيو،

تو اوڻي نيم تو ڪيٽ هتو؟

جي تو عقل آڻو هي، تو مهني سٿا.

5 ڪي ٿني خبر هي ڪم،

ڌرتي ري لونبائي هان ويڪرائي ڪي راکي هي؟

هان ڌرتي ري ماڀ ڪي ڪي هي؟

6 ڌرتي رو بنياد ڪي مائي راکيوڙو هي،

جون اوڻي ري بنياد رو خاص پڙ ڪي راکيو؟

7 اوڻي نيم ساڪلي را تارا پيڙا هوڻي گيت گاوتا پڙيا

هان مهارا شجائي فريشتا، خوشي را نارا لگاوتا پڙيا.

8 جڏي شموندر ني ناهيوم، تو اوڻي ني ڪاڻو ڪرڻ ري ساڙو،

ڪي اُوئي ري حدون ناهئي؟

9 مهِي اُوئي تيم شَمُوندر نِي باڏئون شون ڍڪيو

هانَ اُوئي نِي گهور انداري ۾ اِينون بيڙهيو،

جون نِينا بال گاڙيون ۾ بيڙهيجي هي.

10 مهِي شَمُوندر ري حد راکي،

جهڙي نموني ڪي شي نِي روڪڻ ري شارو،

در هانَ ڪُنڊا لگاوي هي.

11 مهِي شَمُوندر نِي ڪهيو ڪ،

تني رُوگو اترِي توڻي آوڻو هي

هانَ تاري طاقت آئي چولي ايت اُهي.

12 ڪي نِي آڀري زندگي ۾ ڪڏي ساڪلي تي حُڪم هلايو هي؟

ڪي تُو شُورج تي حُڪم هلائي سگهي هي؟

13 ڪي نِي ساڪلي رو اُجالو،

سجِي ڌرتي مائي پڪيڙيو هي؟

جڪي ري ڪري بچڙا منڪ ناشي لڪي هي.

14 ساڪلي ري اُجالِي شون ڌرتي اِينون بدليجي هي،

جهڙو اُوئي ڪو قوترا گاڙيا پيريا هووي.

15 جڏي آي اُجالو بچڙي منڪون تي پڙي هي،

تو اُونون را بچڙائي ڪرڻ آلا هات پونگيا جاوي هي.

16 ڪي تُو شَمُوندر ري نديون ڪڍي گيو هي؟

ڪي تُو اُوئي ري تل توڻي پُوگو هي؟

17 ڪي نِي موت نِي نيڙڪي ڏيئي هي؟

ڪي نِي ڪڏي پتال رو اندارو ڏينو هي؟

18 ڪي ٿئي خبر هِي ڪه ڌرتي ري ويڪر ڪتري هِي؟

جي ٿئي سڄي خبر هِي، تو مهني سُٺا.

19 ڪي ٿئي خبر هِي ڪه اُجالو

هان انڌارو ڪيت شون آوي هِي؟

20 ڪي تُو اُونون ني اُونون ري جگها تي پُگائي سگهي هِي؟

ڪي تُو اُونون ري گهر رو مارگ جوئي هِي؟

21 ڪي تُو سڄو ڪئين جوئي هِي؟

ڪي تُو اُوني تيم جايو هتو؟

ڪي ٿاري عمر تموم گهڻي هِي؟

22 ڪي تُو اوت پُگي سگهي هِي،

جيٽ برف را ڊگ هِي؟

جون تُو گڙون را گڏوم جوئي هِي؟

23 جڪون ني هون مُصبيت ري ڏنون ري سارو،

سنيپالي راڪون هون،

اهڙي تيم ري سارو،

جڏي جهيڙو جون جنگ شروع هووي هِي.

24 مهني سُٺام اُجالو ڪيت شون آوي هِي

هان اُوگوي رو بائيرو ڌرتي مائي ڪيڪر بي هِي؟

25 ڪي مي هان گرجڻ آئي طوفون ري سارو،

آڪاش شون مارگ ناهيو؟

26 ڪه اُوني شون ويرون بي آباد هووي،

اهڙي ويرون بي، جيٽ ڪو پي انسون ريتو ڪونهي.

27 ايڻي ري ڪري ويرون هان غير آباد بي ري ترش بُجهي

هانَ جيتَ كيتَ شاوڪَ قُوتِي۔

28 مي رو باپَ ڪُڻَ هِي؟

جون ماڪَ ريَ بُوندَ ڪيڪرَ نِي هِي؟

29 برفَ ريَ ما ڪُڻَ هِي؟

آڪاشَ شونَ ڪِرڻَ آڻو پارو ڪيڪرَ نِي هِي؟

30 پوڻِي پترَ هوڻِي جاوِي هِي

هانَ شَمُوندرَ ماڻِي جِمِي هِي۔

31 ڪِي تُو تارونَ ريَ تُولِي ڪَتِي نِي،

پيڙا بونديَ شگهيَ هِي؟

جون تارونَ ريَ تُولِي تِيڙو نِي،

ڌار ڌار ڪريَ شگهيَ هِي؟

32 ڪِي تُو تارونَ را تولا،

اُونونَ ريَ نيمَ تي اُگائيَ شگهيَ هِي؟

ڪِي تُو تارونَ ريَ تُولِي ڪاتَ هانَ اُونِي ريَ سائونَ تي

حُڪمَ هلائيَ شگهيَ هِي؟

33 ڪِي تُو آڪاشَ را قانونَ جوڻِي هِي؟

جون ڌرتيَ تي اُونونَ نِي اختيارَ ڏي شگهيَ هِي؟

34 ڪِي تُو زورَ شونَ باڏئونَ تي حُڪمَ هلائيَ شگهيَ هِي،

ڪهَ او تِي ماڻِي تِڪو مي برشاوِي؟

35 ڪِي تُو ڪيوڻَ نِي ڌرتيَ ماڻِي ميليَ شگهيَ هِي؟

ڪِي او تِي ڪيڏي آئي ڪِي هِي ڪه، ’هُونَ حاضرَ هونَ؟‘

36 اِنسونَ نِي شمعجھَ ڏيڙوڻَ آڻو ڪُڻَ هِي؟

اِنسونَ نِي ڏاهپَ ڪُڻَ ڏي هِي؟

37 کُن اِترُو ذاهو هَي، جِكو باذَل گِيي؟

کيو آکاش شون مي برشاوي هَي؟

38 جِکي شون مِتي گيلي هوئي نرم هووي هَي

هانَ بانا آبت مِ چِبي هَي.

39 کي تُو شينهن رِي شارُو شِکار کري سِگهي هَي

هانَ بَر شينهن رِي بُکي بچيون نِي کلائي سِگهي هَي؟

40 جَدِي او آبري چُرُون مِ بينوڙا هووي،

جون جهنگ مِ لکي شِکار رِي شارُو پينا هووي؟

41 کُن جهنگلي هاڏي نِي کاڌو ڏي هَي؟

جَدِي اُوئي را بچيا بُک مِ ايشور نِي پُکاري هَي

هانَ کاڌو نِي ملڻ شون اينا اونا رُلنا رِي هَي.

<sup>1</sup> پچي پرميشور آي پي کهيو ڪه،

## 39

”ڪي تني خبر هَي ڪه جابلو بکري ڪڏي بيٺاوي هَي؟

جَدِي هرڻي بيٺاوي هَي، تو ڪي تِي اُوئي نِي ڏيني هَي؟

<sup>2</sup> ڪي تني خبر هَي ڪه هيرڻ را ڦٽيا،

ڪترا مهيتا آبري ما رِي پيت مِ رِي هَي؟

ڪي تني اُوئي رِي بيٺاڻ رِي خبر هَي؟

<sup>3</sup> جَدِي هرڻي جُهڪي ڦل ڏي هَي،

تو اُوئي نِي ڏوڪن شون آروم ملي هَي.

<sup>4</sup> اُوئي را ڦٽيا متالا هووي هَي

هانَ کُلي ميدون مِ موتا هووي هَي،

پچي او نڪري جاوي هَي

هانَ پاچا آبري ما ڪيڏي ڪونهي آوتا.

5 ڪي جهنگلي گڏو آزاد ڪيو

هانَ ڪي اُوئي نِي ڪولي چوڙيو؟

6 مهي جبلون ۾ اُوئي رو گهر ناهيو

هانَ اُوئي ري ريون ري سارو ڪلراني بني ڏيني-

7 او شهر ري هل شون انگو ري هي

هانَ هاڪلڻ آتون رو آواز ڪونهي سُتو-

8 او چرڻ ري سارو جبلون ۾ ڦرتو ري هي

هانَ ساوي گاش ري تلاش ۾ ري هي-

9 ڪي جهنگلي ڍگو ٿاري شيوا ڪري سگهي هي؟

ڪي او ٿاري مال ري آهري ڪي رات رڻي سگهي هي؟

10 ڪي تُو جهنگلي ڍگو هڙ ۾ جوتري سگهي هي؟

ڪي تُو اُوئي شون شوواگو ڦيري سگهي هي؟

11 ڪي تُو اُوئي ري گهڻي طاقت ڏيڪي،

اُوئي تي پروسو ڪري؟

ڪي تُو اُوئي شون آبرو ڏڪيو ڪوم ڪرائي سگهي؟

12 ڪي ٽني اُوئي تي پروسو هي

ڪه او ٿاري ڪنڪ پيڙي ڪري

هانَ اُوئي نِي ڪلي تي راڪي؟

13 جڏي اُونت پڪي آبري پونڪي خوشي شون ڦڙڦڙاي هي،

تو ڪي اُوئي ري پونڪي بگلي جهڙي هي؟

14 او آبرو ايندا ذرتي مائي ڦٽا ڪري هي

هانَ او بيٺو مائي پڪتا ري هي-

15 اُوئي نِي آي گهڻي ڪونهي،

ڪه ڪو اُوئي را ايندا پگون هينا لتاڙشي،

جون ڪو جهنگلي جنار اُوئي ماڻي چڙشي۔

<sup>16</sup> اُوئي رو من آپري پچيون ري ساڙو اُترو ڪانو هي،

جوڻي او اُوئي را بچيا هائي ڪونهي۔

پلي اُوئي ري محنت اجائي جاوي،

تو پي اُوئي ني ڪو پي گهڻي ڪونهي۔

<sup>17</sup> ڪيونڪه مهڻي ايشور اُوئي ني،

نڪو سمجه ڏيني، نڪو عقل۔

<sup>18</sup> جڏي اُونٽ پڪي ناشن ري ساڙو اُئي هي،

تو گهوڙي هان اُوئي ري سوار ني ڪئين ڪونهي سمجهتو۔

<sup>19</sup> ڪي گهوڙي ني طاقت ني ڏيني هي؟

جون اُوئي ري ڪونڊي آلا ڦوڙا بال تي ناهيا هي؟

<sup>20</sup> ڪي تُو اُوئي ني تيد آئي ڪار تيا ڏيوڻ ري طاقت ڏي هي؟

اُوئي ري هينگات آلو آواز ڪترو روب آلو هي۔

<sup>21</sup> او آپري طاقت ري خوشي ۾ واڍي ۾ ناشن ري تياري ڪري هي

هان ناشي جائي جنگي ميدون ۾ پڳي هي۔

<sup>22</sup> اُوئي ني ڪو پي پي ڪونهي

هان نڪو او ڪي شون پيئاجتو،

او تلوار ڏيڪي لاري ڪونهي هنتو۔

<sup>23</sup> اُوئي ماڻي تيرون رو ٿيلو باجي هي،

برچي هان پالا چمڪي هي۔

<sup>24</sup> او جوش ۾ زور شون زمين تي ناشي هي

هان نر شينگي ري آواز تي ڏهيون ڪونهي لگاوتو۔

25 جڏي نر شينگو باجي هيءَ،

تو او زور شون هينگات ڪري هيءَ،

اُوئي ني الگي پون شون خبر پڙي هيءَ،

ڪه اي جنگ هان جنگي منڪون ري نارون رو هل هيءَ.

26 جڏي باز ڏڪڻ شون پونڪي ڪولي اڏي هيءَ،

تو ڪي، اُوئي ني اڏڻ ري سمجه ٿي ڏيني هيءَ؟

27 ڪي باز ٿاري حڪم شون ايترو اُنچو اڏي هيءَ

هان اُنچي جگهائون مائي آيو آڻو ناوي هيءَ؟

28 او جبل مائي آيو گهر ناوي هيءَ

هان جبلون ري چوتيون مائي ري هيءَ.

29 اوڻ شون او آيو شڪار ٿاڙي هيءَ

هان اُوئي ري اونڪي،

الگي پون شون شڪار ڏيڪي هيءَ.

30 اُوئي را ٻچيا لوئي پئي هيءَ

هان جيت لاش هووي هيءَ، اوڻ او پڻگي هيءَ.

1 ٻچي پرميشور اُيُوب ني اي پي ڪهيو ڪ،

# 40

2 ”ڪي الزوم لگاڻ آڻوم.

قُدرت آئي ايشور شون جهيڙو ڪري شگهي هيءَ؟

جون ڪڻ باڏ ڪري اُوئي شون بلتي مونگي شگهي هيءَ؟“

اُيُوب ري پرميشور ني بلتي

3 ٻچي اُيُوب پرميشور ني ڪهيو ڪ،

4 ”اي ايشور جوم هون تو ڪئين ڪونهي،

هون ڪيڪر ٿي شون ٻولي شگهون هون؟

هُون آيرو مونڌو بند راڪون هون۔

<sup>5</sup> هُون تموم گهڻو بوليو هون،

پڻ همي هُون ڪونهي بولون۔“

پرميشور ري ايوب شون پڙي بات

<sup>6</sup> پڇي پرميشور پتوڙي ۾ ڪهيو ڪم،

<sup>7</sup> ”اي ايوب، همي همت ڪر هان تيار هوم

همي هُون ٿي شون جڪو پي پوچون، او سڻا۔

<sup>8</sup> ڪي تُو مهارو انصاف ڪوڙو ثابت ڪري؟

ڪي تُو آبي ساچو ثابت ڪرڻ ري سارو،

مهني ڏوهي ڪري؟

<sup>9</sup> ڪي ٿي ۾ مهني جتري طاقت هي؟

ڪي تُو مهني آلي ڪار گرجڻ آلي آواز شون بولي شگهي هي؟

<sup>10</sup> همي آيرو آبي ني عزت هان جلووي شون تيار ڪر۔

<sup>11</sup> آيري تموم گهڻي ريش مگروون تي استعمال ڪر

هان اوئون ني متي ۾ ملا۔

<sup>12</sup> هر هيڪ مگروور ني جو هان هرائي چوڙ

هان بچيون ني اوڻج برباد ڪر۔

<sup>13</sup> اوئون شجون ني متي ۾ ملا

هان اوئون ني پتال ۾ قيد ڪر۔

<sup>14</sup> پڇي مهني خبر پڙشي،

ڪه تُو آيري طاقت شون بچي شگهي هي۔

<sup>15</sup> همي تُو دريائي گهوڙو جو،

جڪو ڊگي آلي ڪار گاش گاوي هي۔

جَدِّي مَهِي تَنِّي نَاهِيوم، تو اُوئي نِي پِي نَاهِيو.

16 جو، اُوئي رِي طاقت اُوئي رِي كِرِك مِ هِي

هانَ اُوئي رو زور اُوئي رِي پِيَت اَلِي جَاذِي موش مِ هِي.

17 اُوئي رو پُوجِ دِيال رِي بَن اَلِي كارِ مَضْبُوطِ هُوِي هِي

هانَ اُوئي رِي تونگِي تمومِ گَهِي مَضْبُوطِ هُوِي هِي.

18 اُوئي رِي هَاذَكِي پِيَتل اَلِي كارِ مَضْبُوطِ هُوِي هِي

هانَ اُوئي رو ذَبيل لوه اَلِي كارِ طاقت اَلو هُوِي هِي.

19 او مَهاري نَاهِيوِي مَحْلُوقِ مِ شَجونِ شونِ خاصِ هِي.

مَهني اُوئي نِي مارِ رو پِي اِختِيارِ هِي.

20 او جِبلونِ مِ آپرو كَاذو كَاوي هِي،

جِيَتِ تمومِ گَهِي جِنارِ كُلي مِيدونِ مِ رُومي هانَ تِيَا ذِي هِي.

21 او كوَتونِ اَلِي بَنونِ هينا آرومِ كَرِي هِي

هانَ او شَرونِ هانَ گِپِ مِ لِكِي بِيَشِي هِي.

22 كوَتونِ آلا بَن اُوئي مَائِي چانِ كَرِي هِي

هانَ نَدِي را بَن پِي اُوئي مَائِي چانِ كَرِي هِي.

23 جو، جَدِّي دريا مِ طُوفونِ آوي هِي، تو او پِيِناجتو كونهي،

بِيَشِكِ، يردنِ دريا رو پوِئي اُوئي رِي موذِي توِئي پُگِي،

تو پِي او پَرِيشونِ كونهي هوتو.

24 كِي كُن اُوئي نِي اِگهي شونِ جِهالي شِگهي هِي؟

جونِ قَانِي مِ جِهالي اُوئي رو ناكِ بِيِنذِي شِگهي هِي؟“

1 پِچِي اِيشورِ اُيُوبِ نِي آي پِي كِهيو كم

# 41

”كِي تُو موتِي شُموندرِي بلا نِي مِچِي اَلِي كُنْدِي شونِ جِهالي شِگهي؟“

جونِ رِنْدوِزِي شونِ اُوئي رِي زِبونِ بونذِي شِگهي؟

2 ڪي تُو اُوئي رِي ناک ۾ نَت گهاتي شگهي هي؟

جون اُوئي رِي جاڙي سُوتِي شون چيري شگهي هي؟

3 ڪي او رحم رِي سارو تِي منت ڪرشي؟

جون مهربوني رِي سارو ميني ميني باتون ڪرشي؟

4 ڪي او تِي شون وچن ڪرشي،

ڪه هون هميشا تارو بونهون هوي رين؟

5 ڪي تُو اُوئي پيڙو پڪي آلي ڪار رومي شگهي هي؟

جون اُوئي ني بوندي رُمڻ رِي سارو،

آپري بونهيون ني ڏي شگهي هي؟

6 ڪي مهوڻا اُوئي ني مول ليشي؟

جون ڪي واپاري اُوئي رو ڪاروبار ڪرشي؟

7 ڪي تُو پالي شون اُوئي رِي ڪال چيري شگهي هي،

جون پالي شون اُوئي رو ماڻو ڦاڙي شگهي هي؟

8 تُو رگو هيڪ گهمرو،

اُوئي رِي هات لگائي تو جو،

تُو پيڙي ڪڏي پي اهڙي حرڪت ڪونهي ڪري.

9 اُوئي ني ڪاڻو ڪرڻ رِي اُميد راکڻ بيڪار هي،

ڪيونڪه منڪ اُوئي ني ڏيڪي ناشي جاوي هي.

10 اهڙو ڪو پي دلير ڪونهي، جڪو اُوئي ني هات لگاڻ رِي همت ڪري،

تو پچي ڪڻ مهارو مُقابلو ڪري شگهي هي؟

11 ڪي ڪي منڪ مهني ڪئين ڏينو هي،

ڪه هون اُوئي ني پاڇو ڏيون؟

آڪاش هينا هر هيڪ شئي مهاري هي.

12 هُونُ تَنِي مَوْتِي شَمُونَدَرِي بَلَا رِي بَارِي مِرِ ضَرُورِ شُتَائِينِ،

كِه اَو كَتَرِي مَوْتِي، طَاقَتِ آلي هَانَ قُوتَرِي هِي.

13 كُنْ أُوْتِي رِي كَالِ اُتَارِي شِگَهِي هِي؟

جَوْنِ كُنْ أُوْتِي رِي مَوْدِي مِرِ لَگومِ گَهَاتِي شِگَهِي هِي؟

14 كُنْ أُوْتِي رِي جَاوِي چِيرِي شِگَهِي هِي؟

كِيونَكِه اُوْتِي رَا ذَوْنَتِ تَمومِ گَهَتَا خَطَرِنَاكِ هِي.

15 اُوْتِي رَا پُنَا اِينونِ دَبِكِيجِي هِي،

جَوْتِي لَوهِ رِي مَضْبُوطِ دَالونِ.

16 اَو هِيكِي بِيجِي شونِ اَهَرِي مَلِيوَرِي هِي، جَكِي مِرِ بَايِرُو بِي كُونَهِي لَنگَهَتو.

17 اَو آپَتِ مِرِ اِينونِ جُتِيوَرَا هِي،

كِه كَوِ بِي اُوْتِي نِي دَارِ كَرِي كُونَهِي شِگَهَتو.

18 جَدِي اَو چِينَكِ دِي هِي، تَو اِينونِ لَگِي هِي،

جَوْتِي بَجَلِي چِمَكِي پَرِي.

اُوْتِي رِي اَونَكِي شَاكَلِي رِي اُجَائِي آلي كَارِ چِمَكِيَلِي هِي.

19 اُوْتِي رِي مَوْدِي شونِ بَلَنِ آلا تَوَنَدَا نَكَرِي هِي،

جَوْتِي بَاشَدِي رِي چِشْگُونِ.

20 اُوْتِي رِي نَاكِ شونِ اَهَرُو ذَوْنَتُو نَكَرِي هِي،

جَوْنِ بَاشَدِي مَائِي رَاكِيوَرِي دِيگِ شونِ بَاقِ نَكَرِي هِي.

21 اُوْتِي رِي شَاشِ لِيوُنْ شونِ كِيئَالونِ مِرِ بَاشَدِي لَگِي هِي

هَانَ اُوْتِي رِي مَوْدِي شونِ بَلَنَا تَوَنَدَا نَكَرِي هِي.

22 اُوْتِي رِي كَوْنَدِي مِرِ اِتَرِي طَاقَتِ هِي،

كِه اُوْتِي نِي دَبِكِي هِرِ هِيكِ دَكِي هِي.

23 اُوْتِي رُو دِيلِ آلو موشِ تَمومِ گَهَتُو سَخَتِ هُووِي هِي

هانَ اُوئي را نرم عُضوا يي لوه آلي كار پكا هي.

24 اُوئي رو دل پتر آلي كار مضبوط

هانَ گهتي ري پُر آلي كار سخت هي.

25 جدي موتي شُموندري بلا شومهي آوي هي،

تو پهلوون يي بيئاجي هي

هانَ گهبرائي لاري هتي هي.

26 جي كُئ اُوئي مائي تلوار هلاوي،

تو اُوئي ني كئين كونهي هوتو.

اُوئي تي پالو، برجي جون تير يي اثر كونهي كرتو.

27 او لوه ني بوه هانَ بيتل ني نرم لكڙي سمجهي هي.

28 او تيرون ري بي شون ناشتي كونهي

هانَ كپوڙي ري پٿرون ني بوه سمجهي هي.

29 گيڙي اُوئي ري شارو گاش آلي كار هي

هانَ پالو ڏيكي هاشي هي.

30 اُوئي ري ڏيل رو هينلو باشو ٽڪي نيڪري جهڙو هووي هي،

او گپ ۾ اينون بي هي،

جهڙو ڏوٿون ري هار گائيجي پڙي.

31 جدي او اُونڌي شُموندر ۾ بي هي،

تو شُموندر رو پوڙي اُپڙن آلي ديگ آلي كار هووي هي.

اُوئي ري بيوڻ شون شُموندر رو پوڙي،

تيل آلي كار اُڪڙي هي.

32 جدي او پوڙي ۾ بي هي،

تو اُوئي لاري پوڙي ۾ چمڪيلي هانَ آچي گوگه نڪري هي.

33 ڌرتي ماڻي اُوئي جهڙو ڪو پي ڪونهي،

جڪو اُترو دلير ناهيوڙو هوڙي.

34 او پيجون ني آپ شون گهت شمعهي هي

هان سجي ٻڌائو ڪرڻ آئون رو بادشاهه هي.

اُيُوب رو توبهون ڪرڻ

1 پچي اُيُوب پرميشور ني بلتي ڏيني ڪم،

# 42

2 ”اي پرميشور، مهني خبر هي،

ڪه تُو شجو ڪئين ڪري شگهي هي

هان ٿاري رٿائون ڪو پي روڪي ڪونهي شگهو.

3 اي پرميشور، ٿي ڪهيو ڪم،

’آي ڪيو هي، جڪو بي وقوفي آلي باتون ڪري،

مهاري رٿائون ماڻي پڙدو راڪي پڙيو؟‘

’آي شاجي هي ڪه مهني اهڙي عجيب باتون ڪيئي،

جڪو مهاري شمعو شون باهر هتي.

4 اي ايشور، ٿي ڪهيو ڪم،

’تُو مهاري بات سُڻم، تو هون ٿي سُٿائون،

همي هون ٿي شون جڪو پي پوچون،

تُو اُوئي ري بلتي ڏي.

5 اي ايشور، پيل مهني ٿاري باري ۾ سُٿيو هتم،

پڻ مهني همي آپري اونڪيون شون ڏينو رو،

6 ايئي ري ڪري مهني آپرو آپ شون نفرت هوئي ري.

’هُون آپ ماڻي متي هان راک گهاتي توبهون ڪرون هون.

اُيُوب رِي آيْرِي دُوسْتُون رِي شَارُو پْرَاتْنَا

7 جَدِي پْرِمِيشُور اُيُوب شُون بَاتُون كَرِي هُنُو كِئُوم تُو پِچِي اَلِفِز تِيمَانِي نِي كِهِيو كِه، ”هُون تِي شُون هَان تَارِي بِيئِي دُوسْتُون شُون تَمُوم گِهِنُو ناراض هُون، كِيونكِه جُون مِهَارِي بُونَهِي اُيُوب مِهَارِي بَارِي مِ شَاچِي بَاتُون كِيئِي هِي، تُون اِيئون كُونَهِي كِئُوم. 8 هَمِي تِي آيْرِي شَارُو شَات دِگَا هَان شَات گِهِيئا لِي، مِهَارِي بُونَهِي اُيُوب كِيدي جَانُو. تِي آيْرِي شَارُو اُوئون شُون بَالُو آلا بَلِيدُون كَرُو. پِچِي مِهَارُو بُونَهُو اُيُوب تُونَرِي شَارُو پْرَاتْنَا كَرَشِي هَان هُون اُوئي رِي پْرَاتْنَا قُبُول كَرِين. نِي تُو هُون تُونَرِي بِي وَقُوفِي رِي سَزَا تُونِي ضُرُور دَنِين، كِيونكِه جُون مِهَارِي بُونَهِي اُيُوب مِهَارِي بَارِي مِ شَاچِي بَاتُون شُئَائِي هِي، تُون اِيئون كُونَهِي كِئُوم.“

9 پِچِي اَلِفِز تِيمَانِي، بَلَد سُوخِي هَان ضُوفَر نَعْمَاتِي اِيئُوج كِئُوم، جُون پْرِمِيشُور اُوئون نِي حُكْم دِينُو هَتُو. پِچِي پْرِمِيشُور اُيُوب رِي پْرَاتْنَا شُئِي.

10 جَدِي اُيُوب آيْرِي دُوسْتُون رِي شَارُو پْرَاتْنَا كِي، تُو پْرِمِيشُور اُيُوب نِي تَمُوم گِهِنِي بَرَكْت دِينِي، جِتْرُو اُوئي كِيدي پِيل هَتُو، اِيشُور اُوئي نِي اُوئي شُون پِي وَدِيك دِينُو. 11 پِچِي اُوئي رَا شَجَائِي بِيِن پَائِي هَان اُولُكُوڻ آلا اُوئي رِي گِهَرِي آيَا هَان اُوئي پِيئَرِي بَاتِي كَاڏِي. پِچِي اُوئون آفَتُون تِي دُك كِئُوم، جِكو پْرِمِيشُور اُيُوب تِي مِيلَنِي هَتِي هَان اُوئي نِي تَسْلِي دِينِي. پِچِي هَر هِيك اُوئي نِي هِيك شُونِي رِي بَالُكِي هَان هِيك شُكُو پِي دِينُو.

12 اِيئِي نَمُونِي پْرِمِيشُور اُيُوب نِي آخَرِي دَنُون مِ پِيل شُون پِي وَدِيك بَرَكْت دِينِي. هَمِي اُوئي كِيدي چَنُودِي هَزَار رِدُون، چِي هَزَار اُونْت، هِيك هَزَار جُوڙَا دِگون رَا هَان هِيك هَزَار گَدِي هَتِي. 13 اُوئي رَا شَات دِيكْرَا هَان تِن دِيكْرِي پِي هُوئِي. 14 اُوئي آيْرِي مَوِيڻ دِيكْرِي رُو نُون يَمِيمَا، بِيچِي رُو نُون قَصِيعَا هَان تِيچِي دِيكْرِي رُو نُون قَرَن هُپُوك رَاكِيو. 15 سَجِي مُلُك مِ اُيُوب رِي دِيكْرِيون جِهِيئِي قُوئَرِي دِيكْرِي كِيرِي پِي كُونَهِي هَتِي.

اُيُوب آيْرِي دِيكْرِيون نِي آيْرِي دِيكْرُون پِيئَرِي وِرَاثْت دِينِي. 16 اِيئِي شُون پِچِي اُيُوب هِيك شُو چَالِيه شَال جِيئُو رِهِيو هَان چُوئِي پِيئَرِي تُوئِي آيْرِي اولادُون رَا اولاد دِينَا. 17 پِچِي اُيُوب مَوْتِي عُمَر رُو هُوئِي مَرِي گِيو.